


HINGPIT NGA GAHUM PINAAGI

SA HINGPIT NGA KALUYA

 Maayong buntag, mga higala. Maanindot gayud nga mahibalik ako dinhi pag-usab karong buntaga sa niining maulan, ug medyo niyebhon nga buntag. Nasayod ko nga daghan kaninyo ang naglisod sa pagdrayb, nga gikan pa sa halaya. Ug nagkaaduna kita og pipila . . . sa niining bililhon nga mga higala nga gikan pa sa Chicago ug Alabama ug Georgia ug Tennessee ug Illinois ug ang tanan na, niining mga adlawa, busa kita . . . nagasalig nga ihatag sa Dios kaninyo ang Iyang pagbantay samtang kamo nagabiyahe. Ug amo kining pagampo nga pagapanalipdan Niya kamo sa mga kadalanan, sa niining piligroso nga mga dalan tungod kay nagakadanglog ang mga niini sa panahon sa tingtugnaw. Ug kini nga nasud dili gayud maayo sa panahon sa tingtugnaw. Kini mao ang pinakamaanindot nga nasud inig-tingpamulak o inig-tinglagas, apan sa panahon sa tingtugnaw ug panahon sa ting-init dili gayud maayo dinhi.

² Karon, sa hunahuna ko wala pa sila nagarekord dinha. Ug buut kong mohimo og usa ka pahayag mahitungod niadtong miaging Domingo, sa mensahe. Ang hinungdan nga akong—akong gipugnan ang teyp ug wala sila tugoti nga ibaligya ang maong teyp, ug ipagawas kadto, bueno, mao'y tungod nga kinahanglan ko una nga tan-awon kadto. Tungod kay sa makadaghang higayon, kanang paagi, nga mosulti ko og mga butang dinhi sa iglesia nga dili ko mahimong ipahayag sa publiko, usahay nagapahinungdan kana og kapandulan. Ug usahay magpahinungdan pa gani kana og mga pagduhaduha sa atong mga kaigsoonan dinhi sa tabernakulo. Ug kini'y . . .

³ Wala ko ginasulti kini . . . ginasulti ang ingon niining mga butang . . . nga walay-pagtagad, apan usahay man gud pag-anaa ka na ilalum sa pagdihog nakahibalo ka na nga adunay mga butang nga dili mo mahimong . . . dili ka mahimong mangahas sa pagsulti sa mga tawo. Pero usahay ilalum sa pagdihog may butang nga maisulti mo, nakita n'yo, ug dili mo kini mahimatikdan. Ug ang usa sa mga butang nga nagatoo kong naisulti ko (niadtong miaging Domingo) nga mahimong magpahinungdan sa usa ka tawo . . . kadtong nasulti ko nga wala ako nagatoo sa mga pagtawag ngadto sa altar. Kita n'yo?

⁴ Gusto kong isulti kana ug iklaro kana aron nga masabtan ninyo. Wala gayu'y ni usa ka pagtawag ngadto sa altar nga gihimo sa tibuok Biblia. Walay ingon nianang butang sa

Kasulatan. Walay ingon niana sa tanang mga kapanahonan hangtud nga miabot ang kapanahonan sa Methodist, mga duha ka gatus ka tuig na ang milabay, kita n'yo.

⁵ Ang mga pagtawag ngadto sa altar mao'y sa dihang mangduol ang mga tawo ug paninguhaong agdahon sila ug aghaton ang mga tawo, "Umari ka, John. Kahibalo ka, sila. . . Namatay ang imong inahan, nga nagaampo alang kanimo. Umari ka, John." Dili kana kombiksyon, mga higala. Dili. Ang ingon-anang—ingon-anang matang, ako. . . panagsa ra kaayo ka makadungog nga may usa nga nagpadayon gayud. Ug, sa ingon-ana, tanan na nga matang ang mahimong naaghat mo. Mao kana'y hinungdan nga nagkagubot ang iglesia nga sama niini karon, mao'y tungod sa ingon nianang mga butang.

⁶ Ang kombiksyon, dili mo na kinahanglan nga mosulti og unsa man, igsoon, anaa ang Dios dinha ug human nang gihimo ang maong buhat. "Sa nagasulti pa si Pedro niini nga mga Pulong mikunsad ang Espiritu Santo kanila nga mga nagpatalinghug sa Pulong." Kita n'yo? Kita n'yo? Kita n'yo? Walay pagtawag ngadto sa altar, kita n'yo, walay ingon-anang butang.

⁷ Karon, ang altar mao ang dapit kon diin magaampo una ang matag tawo nga nagasulod sa iglesia, moluhod sa altar, mahilomon nga mag-ampo sa Dios ug isulti ang ilang mga paghangyo diha sa pag-ampo nga—nga alang sa ilang mga minahal sa kinabuhi, ug magapasalamat sa Dios alang sa kung unsa'y nahimo nila para kanila, dayon mobalik na sa ilang lingkoranan.

⁸ Ug dayon ang iglesia usab mao ang dapit kon diin ang Pulong sa Dios. . . "Ug nagasugod ang paghukom sa Balay sa Dios," kon diin ginapahayag ang paghukom sa Pulong. Busa. . . Apan karon, giusab na gyud nato—nato kana.

⁹ Karon, wala ako'y unsa man nga batok kang bisan kinsa man nga nagahimo og mga pagtawag ngadto sa altar, kita n'yo. Kana'y. . . Ug ako mismo sa kaugalingon ko nakahimo na niana sa makadaghan, ug tingali mohimo ako og daghan pa niini kung magpadayon ako. Apan para kanako. . . Kita n'yo, kamo—kamo—mitutok mo og ayo niini. Ug wala ako'y batok niana, wala ma'y dautan niana. Okey lang kana. Kita n'yo?

¹⁰ Tungod kay, paminaw, miingon si Jesus, "Walay tawong makahimo sa pag-ari Kanako gawas kon pagadanihon siya sa Akong Amahan una. Ug ang tanan nga gikahatag Kanako sa Amahan magaari Kanako." Husto kana. Busa kung ingon-ana, kita n'yo, sila'y. . . Mao kana'y nagahimo nga walay kahilambigitan ang pagtawag ngadto sa altar kung ingon-ana. Kita n'yo? Kita n'yo kana? "Ang *tanang* nga gikahatag sa Amahan. . ." Inyong. . .

¹¹ Ang atong—atong katungdanan mao'y "iwali ang Pulong." Miingon ang Biblia, "Ang tanan nga nanagpanoo

gibautismohan.” “Paghinulsol kamo, ug magpabautismo sa Ngalan ni Jesus Cristo alang sa pagpasaylo, kapasayloan sa mga sala.” Unsa man? “Magpabautismo sa Ngalan ni Jesus Cristo alang sa kapasayloan sa mga sala, kita n’yo, ug madawat ninyo ang gasa nga Espiritu Santo.”

¹² Apan kung ginaaghat ug ginapugos ug ginahadlok ninyo ang mga tawo, ug ginaawhag ang mga tawo. . . Kinahanglan nga moduol ang mga tawo nga nasabtan niya, kinaugalingon, nga may kombiksyon, nga dawaton si Cristo. Dayon ang unang butang nga ilang pagabuhaton pagkadawat nila kang Cristo samtang nagalingkod sa ilang mga lingkoran, ang sunod mao ang mabautismohan sila sa Ngalan ni Jesus Cristo alang sa kapasayloan sa mga sala ingon nga naamgo nilang sayup gayud sila. Sa ingon niana nga paagi nga mapasaylo sila sa ilang mga sala, kita n’yo. Tungod kay nanaghinulsol na sila; nabautismohan na ingon nga usa ka handumanan para sa mga tawo, nga, “Gidawat ko na si Cristo ingon nga akong kaugalingong Manluluwas”; dayon kandidato ka na alang sa Espiritu Santo.

¹³ Ug, karon, daghang mga tawo ang padayon sa gihapon, nga nagaaghat ug nagapanawag nga mangduol ang mga tawo ngadto sa altar, ug uban pa nga sama niana, nga okey lang. Okey lang kana kanako, kana’y maayo gayud sa hunahuna ko, kung aduna ma’y si bisan kinsa nga gustong maghimo niana. Apan, para nako, wala kana sa Kasulatan, nakita n’yo, ug mao nga ako—gusto ko lang nga magpabilin sa Kasulatan.

¹⁴ Ug busa ang hinungdan nga gipugngan kong maipagawas kadto nga teyp tungod kay kung inyong ipagawas kadto magkaaduna gyud kita og lima ka gatus ka mga sulat matag semana nga pagatubagon. Matag. . . Adunay diyutay’ng tradisyon lang sa usa ka tawo nga imong matamakan, ug mao lang kana ang buhaton mo, ug dayon balik na sad ta niana pag-usab.

¹⁵ Ug sa hunahuna ko, makadaghan nang higayon, nga medyo masinawayon ako bahin sa nagkalainlaing mga butang nga sama niana. Ug wala ko kini ginatuyo nga mahimong ingon niana, apan usahay tungod sa mga katungdanan nga nagakahimo kang ingon niana, nakita n’yo, ginahimo—ginahimo ka nga mamaingon niana gayud. Ug busa nagatoo ko nga masabtan kana sa mga tawo.

¹⁶ Karon, mapasalamatong gayud kita nga aduna sa gihapon kita og usa ka buutan nga Langitnong Amahan Nga—Nga wala nagalantaw sa atong mga kasaypanan ug wala ginaisip ang mga niini batok kanato.

¹⁷ Nabasa ko diha sa Basahon sa—sa Mga Taga-Roma, sa ika-4 nga kapitulo, diin gisulat ni Pablo ang—ang Balaanong pagsaysay mahitungod sa kinabuhi ni Abraham. Karon, nasayod

kita nga si Abraham sa makadaghang higayon kaniadto nagkalibog usab sama kanato. Apan sa dihang . . . nahisulat na ang pagsaysay mahitungod kaniya, walay bisan unsa man nga mga kalibog niya ang nahisgotan, kita n'yo, wala man lang nahisgotan. Ang ingon:

Si Abraham wala nagduhaduha sa saad sa Dios tungod sa kakulang sa pagtoo; kondili malig-on . . . nga nagahatag og pagdayeg ngadto sa Dios;

¹⁸ Kita n'yo, ug nagalaum ako nga ingon niana usab ang mahisulat mahitungod kanako Didto, dili ang akong mga kasaypanan ug tanan na, kondili kung unsa lang ang mga gipanguhaan kong buhaton, ang mga tinguha sa akong kasingkasing nga mamuhat alang sa katawhan sa Dios.

¹⁹ Ug karon nanganhi kita niining buntaga aron—aron magdala og usa ka hamubong mensahe dinhi nga gisugo kanato sa Ginoo aron ikahatag ngadto sa mga tawo. Ug nagalaum ko nga maayo ang mahatag niini kaninyo ug maayo usab ang mahatag niini kanako, tungod kay magkauban kitang tanan ug magakinabuhi sa usa ka grabe nga panahon, ug sa niining kaulahiang mga adlaw. Busa sa dili pa kita mag-ampo, buut kong magbasa og duha ka mga bahin diha sa Pulong; ang usa sa dili pa kita mag-ampo, ug ang usa usab pagkahuman sa atong pag-ampo. Ug una, aron sa pag-abli sa atong panerbisyo dinhi sa Niini nga bahin, gusto kong magbasa gikan diha sa Basahon sa Mga Hebreohanon. Sa ika-11 nga kapitulo sa Mga Hebreohanon, ug sa ika-traynta- . . . ika-32 nga bersekulo, ang sugod, nagahisgot mahitungod sa *pagtoo*.

Karon unsa pay akong igapamulong? kay pagakulangon ako sa panahon kung magahisgot pa ako mahitungod kang Gideon, . . . kang Barac, . . . kang Samson, . . . kang Jepte; . . . kang David. . . kang Samuel, ug sa mga profeta:

Nga tungod sa pagtoo nanagpakadaug sa mga gingharian, nanagbuhat sa pagkamatarung, nakabaton og saad, nakagtak-up sa baba sa mga leon,

Nagpalong sa gahum sa kalayo, nakalikay sa sulab sa espada, ug gikan sa kaluhayon . . . nangahimong malig-on, nangabaskug sa gubat, nakapakalagiw sa mga langyaw, sa mga kasundalohang langyaw.

Mga babaye nanagdawat sa ilang minatay pinaagi sa pagkabanhaw . . . ug ang uban ginasakit, nga wala modawat sa ilang kagawasan; aron lamang mabatonan nila ang labing maayo nga pagkabanhaw:

Ug ang uban may mga pagsulay . . . mga pagbiaybiay . . . hampak, oo, ug labaw pa niini sa mga gapus . . . mga pagkabinilanggo:

Gibato sila, gipanaggabas sila, gipanagtintal sila, . . . gipamatay sa espada: . . . nagasuroysuroy nga nagasaput sa mga panit sa carnero ug sa mga panit sa kanding; sanglit mga nahutdan, . . . ug gisakit;

20 Tan-awa ninyo kining parentesis:

(Kanila ang kalibutan dili takus:) nahadiindiin sila sa mga kamingawan, ug sa mga kabukiran, ug sa mga lungib ug sa mga langub sa yuta.

. . . kining tanan, sa nabatonan nila ang pagpamatuod kanila tungod sa ilang pagtoo, wala makadawat sa saad:

Sanglit ang Dios nakagtagana na og labing maayong butang mahitungod kanato, nga gawas kanato dili sila pagahingpitan.

21 Sa dihang ginabasa ko kana nga mga sugilanon sa niadtong maisog nga mga sundalo, naghunahuna ako kung asa kaha mapahimutang ang atong diyutay'ng testimonyo kauban nianang mga tawo pag-abot na nianang Adlaw.

22 Sa dili pa kita mag-ampo, aduna ba'y gustong mahinumduman diha sa atong pag-ampo sa Dios? Ipataas lang ang inyong kamot, ug bisan unsa man ang panginahanglan ninyo hinaut nga makita Niya ug madungog ug ihatag kini diha kaninyo karon samtang ginaduko nato ang atong mga ulo.

23 Maloloy-on ug mahigugmaon namo nga Amahan, mapainubsanon kami nga nagaduol sa Imong Trono niining buntaga sa Ngalan ni Jesus, nga Imong Anak, aron magtanyag og pag-ampo alang sa among mga kaugalingon ug alang sa uban. Ikaw una, Ginoo, magapasaylo kanamo sa among mga kalapasan ug sa among mga kadautan. Ug dayon igaampo namo ang uban, Ginoo, nga sila usab mapasaylo.

24 Ug nga ang Imong Iglesia mas mapahiduol pa diha Kanimo. Kay sa tinud-anay, Ginoo, sa among kasingkasing nagatoo kami nga andam na Ikaw nga mobuhat og usa ka buhat sa Imong Iglesia, andam na nga pagakuhaon Kini gikan sa kalibutan ug pagalalinon ngadto sa Gingharian sa Dios. Apan, Ginoo, tabangi kami nga makaandam sa among mga kaugalingon alang niana nga takna. Hinaut nga kining buntaga mao na ang panahon, Ginoo, nga gikan sa matag usa hangtud sa tanan kanamo nga "isalikway ang matag kabug-aton ug ang sala nga nagapiit paglikos kanamo, aron nga mahimo namong dalaganon nga mapailubon ang lumba nga gitanyag sa among atubangan."

25 Ug nagaampo ako, Langitnong Amahan, karong adlawa, nga Imong ayohon ang mga may sakit ug ang mga nagaantus. Daghan ang nagaantus sa tibuok nasud, ug daghan ang mga balatian, ug mga "virus" maingon nga mao ang tawag niini sa mga doktor. Nagaampo ako nga ang Imong gahum sa pagpang-ayo, Ginoo, maanaa sa maong mga tawo.

26 Dayon nanganhi sila dinhi sa among gamay'ng panagtigum karong buntaga. Daghan kanila ang mibiyahе pa og gatusan ka milya, sugod pa kagabii ug sa tibuok gabii ug hangtud buntag, karong adlaw, ug bisan nagkalisod sa pagmaneho aron lamang makadangat dinhi sa tabernakulo. Ug nagaulan pa gani og yelo sa mga dalanon. Dios, nagaampo kami nga Imo gayud silang pagapanalanginan. Daghan gayud kanila ang migahin og dakung bahin nga alang unta sa ilang pagkaon sa sunod nga semana, o para sa unsa pa man unta, o sa ubang butang nga paga-gamitan unta nila sa ilang kuwarta, apan gigasto nila alang sa gasolina ug uban pa, aron lang makaanhi.

27 Dios, ang nagaduol Kanimo nga waysulod magabiya dinhi nga puno. Gisaad Mo kini. Ug nagaampo ako nga pun-on Mo ang ilang mga kasingkasing ug ang ilang mga basket (sa ilang mga kalag) nga puno gayud sa mga maayong butang nga iya sa Dios aron nga manglakaw sila nga nagaawas ang “dili-ikaasoy'ng kalipay ug puno sa Himaya.” Hinaut nga magaawas gayud ang mga copa sa niining bililhon nga mga tawo, sa espirituhanon ug mga maayong butang nga gikan sa Dios.

28 Panalangini ang matag kamot, nasayod Ikaw sa mga panginahanglanon sa luyo nianang mga kamot, Ginoo. Ginapangamuyo ko nga Imo gayud silang panalanginan. Nakita Ka namo niadtong miaging semana kung daw sa unsa ka milagroso gayud nga Imong gitubag ang pag-ampo sulod sa pipila ka gutlo, sa mga panahon sa grabe nga kahimtang ug mga sakit ug mga problema. Ikaw mao ang Dios, nga ania pirme, nagatindog tapad sa Iyang mga alagad. Nagaampo ako, Dios, nga magabarug Ikaw tapad sa mga niini karong buntaga. Ihatag kanila ang ginatinguha nila, Ginoo, sa ilang kasingkasing. Nagatoo ko nga dili kini alang sa bisan unsa mang kahakog nga butang, sa bisan unsa—bisan unsa mang dautan nga motibo luyo niini. Nagaampo ako nga pagapanalanginan Mo sila.

29 Ug karon, Amahan, hinumdumi ako, kami, karon, ug hinaut nga maipadaplin ko ang akong kaugalingon. . . Kaming tanan, gikan sa pastor hangtud sa—sa mga kabataan, hinaut nga maipahimutang namo ang among mga kaugalingon diha sa altar sa Dios ug ablihan ang among mga kasingkasing ug patalinghugan ang Balaang Espiritu samtang magpakigsulti Siya kanamo. Hinaut nga maiplastar ang among mga sudlanan sa Imong panala-. . . aron nga madawat ang Imong mga panalangin, sa husto nga posisyon. Dayon ibubo ang gahum sa Lana nga igdidihog nganha kanila. Ug hatagi kami og kusog, Ginoo, nga pagakinahanglanon namo alang sa mga adlaw nga moabot. Ihatag kini nga panalangin. Ginapangamuyo namo kini sa Ngalan ni Jesus. Amen.

30 [Ginaestorya ni Igsoong Branham ang usa ka tawo nga nagsulti kaniya mahitungod sa usa ka tawag sa telepono—Ed.] Hmm, wala pa ako makahibalo. Kuhaa lang ang iyang numero

ug sultih siya nga ako ra siyang tawagan pagkahuman sa panimbahon. Wala pa ako mahibalo.

³¹ Iampo ko ninyo. Si Igsoong Jack Moore kadto sa telepono, ug ginaaghat pa gihapon ko niya nga moadto didto niining semanaha. Kita n'yo? Wala ko batia nga... magdesisyon na niini, kita n'yo, ug mao nga wala pa ako mahibalo kung unsa'y buhaton. Gihigugma ko si Igsoong Jack. Ug adunay dakung konbensyon nga igapahigayon didto ug may gibalibaran siya nga mga tawo, sama ni Booth-Clibborn ug uban pa, nga moadto man unta didto. Mao nga nagahulat gyud gihapon siya, nagmantala na siya og mga pagpahibalo ug tanan na sama niana, ginapahayag nga moadto kono ako. Busa ako—mabati ko nga daw sa mapugos gyud ko nga moadto, nakita n'yo. Ug ako...

³² Ug, karon, samtang ablihan nato pag-usab karon sa Ikaduhang Mga Taga-Corinto, ug sugdan nato sa ika-12 nga bersekulo sa Ikaduhang Mga Taga-Corinto, ug mobasa kita og usa ka bersekulo sa Kasulatan alang sa maong teksto, kung itugot sa Dios. Unang Mga Taga-Corinto, sa... O Ikaduhang Mga Taga-Corinto, diay, sa ika-12 nga kapitulo ug sa ika-9 nga bersekulo. Gusto kong basahon ang una nga bahin... O ang ikaduha nga bahin sa ika-9 nga bersekulo, ang usa ka bahin niini:

Ug siya nag-ingon kanako, Ang akong gracia igo kanimo: kay ang akong gahum ginahingpit diha sa kaluya...

³³ Tugoti akong basahon Kini pag-usab karon aron nga siguradong makuha ninyo ang maong teksto:

Ug siya nag-ingon kanako, (ang Dios kini nga nagapakigsulti kang Pablo), Ang akong gracia igo kanimo: kay ang akong gahum ginahingpit diha sa kaluya...

³⁴ Ug kung pagatawgon ko man kini nga usa ka teksto, gusto kong gamiton ang, gahum... *Hingpit Nga Gahum Pinaagi Sa Hingpit Nga Kaluya*. Kung aduna kita'y kaluya aduna pud kita'y gahum. Usa kini ka talagsaon nga teksto alang sa... sa usa ka Pentecostal nga panagtigum, nga maghimo... mogamit og usa ka teksto bahin sa *kaluya*, tungod kay kanunay natong ginapamatuod nga “kusgan kaayo kita.”

³⁵ Ug maingon sa gisulti ko na kaganina, nga, gipaninguhaan kong iampo sa tibuok semana ug aron hibaloon kung unsa ba ang maayo nga akong pagadalhon sa atubangan sa kongregasyon. Kung ang pag-anhi ko maoy aron lang nga madunggan ninyo, mas gustohon ko pa nga maminaw na lang sa uban karong buntaga nga mobarug dinhi.

³⁶ Sa tinuod lang, mga duha na ka adlaw ang milabay, atua ako sa Kentucky kauban ang mga paryente ni Igsoong Gabehart didto. Sa dihang pabiya na ko sa ilang dapit, sa niining bililhon

nga igsoon ug sa iyang asawa ug pamilya ug nilang tanan, ug nga misantop kini sa akong hunahuna.

³⁷ Nakabisita ako sa usa ka panimalay sa wala pa ako nakaadto kanila. Nagatindog ako sa gawas, ug dunay gining nga miingon, “Gusto kong makig-estorya niana nga ministro.” Ug misulod ako sa diyutay’ng panimalay nila. Ug atua siya didto . . . Miingon siya, “Ikaw ba si Igsoong Branham?”

Ingon ko, “Oo madam.”

³⁸ Ingong siya, “Naulaw kaayo ko sa hitsura sa akong balay,” ug miingon siya, “naulaw gyud kong magpasulod nimo.” Misugod na siya sa paghilak. Miingon siya, “Apan ako—aduna ako’y dakung panginahanglan ug aduna gyud ko’y pagsalig nimo.”

³⁹ Ug akong nahibaloan nga kang Igsoong babayeng Cox diay kadto nga among gisak-an didto—didtong dapita, usa ka—usa ka luoy’ng lola nga adunay usa ka teyp rekorder ug nagaadto siya sa mga kasilinganan og ginapatukar ang maong mga teyp. Mao kadto! Mao kadto kon nganong nakaila sila kanako! Kita n’yo?

⁴⁰ Mitan-aw ako sa palibot niadtong maong panimalay, usa ka gamay’ng ubos nga panimalay, nga daw sama ra sa kon diin ako midaku, apan ang bungbong niadto puno og mga hulagway ni Cristo. Adunay nakapatong nga usa ka Biblia sa lamesa. Miingon ko, “Wala pa gayud ako nagkaaduna og dakung pribilihiyo sa tibuok kong kinabuhi, ingon niini nga matang sa panimalay ang gusto kong pagasudlan.” Mihangyo siya og usa ka paghangyo alang sa usa ka tawo. Ug lima lang ka oras gikan sa higayon nga nag-ampo kami’g dungan, ako ug kadtong maong lola nagdungan kami’g ampo, mitubag dayon ang Dios.

⁴¹ Busa nag-ampo kami pag-usab, ug si Nanay’ng Cox ug ako ug sila usab nga nakapalibot sa lamesa niadtong buntaga, miduko kami ug mihangyo sa Dios nga hatagan kami og kahigayonan nga makahimo og usa ka butang tungod sa mga pagpaningkamot nga nahimo niya. Ug, human sa among paghangyo niadto, nag-abli ang Dios og usa ka paagi. Nakita n’yo? Siya’y Dios gayud!

⁴² Ginasulayan natong himoong pasumangil ang atong mga kaluyahon. Gusto natong isulti kung unsa kita ka daku, kung unsa kita ka maayo. Sa hunahuna ko usa kana sa mga hinungdan nga akong . . . nga gihatag kanako sa Dios ang maong teksto, aron mawagtang kana sa atong hunahuna. Kita n’yo?

⁴³ Adunay gagmay’ng mga butang nga mahimo nato. Ug mao kana kon nganong nagasimba kita, aron mahibaloan kon diin kita nagakasayup, ug ang mga butang nga mahimo natong ayohon pa sa atong mga kaugalingon. Kung nagasimba man kita alang sa uban—uban pa nga katuyoan gawas niini, nahadlok ako nga basin wala kita’y maayong butang nga makuha sa pag-adto sa iglesia. Nagasimba kita aron hibaloan ang mga kaluyahon nato, hibaloan ang mga dautang bahin diha kanato ug ang

atong . . . kung unsa . . . makita kung unsa kita ka gamay, ug aron ipahimutang ang atong pagsalig sa Usa ka Tawo nga gamhanan. Apan sa diha nga aduna kita'y mga kaluyahon . . .

44 Daghan kanato ang gustong magpahayag o gustong maghunahuna nga kulangan gyud kita ug, busa, ginahimo nato kana nga pasumangil, “Wala ako'y edukasyon, wala ako'y kahanas, wala ako'y kasarang sa paghimo *niini*.” Ug kung ipadayon ninyo kana ug padayon nga buhaton ang ingon niana, padayon ninyo nga pagahimoon kana, nan wala gyud mo'y mapaingnan. Apan ang mismong butang nga ginahimo natong pasumangil, ang atong mga kaluyahon, pagagamiton sa Dios kanang maong mismong kaluyahon aron mahimo nato ang ginapahimo nga buluhaton. Kita n'yo? Nagahulat ra Siya kanato nga mahidangat kita niana nga kahimtang aron nga magamit Niya kita. Kita—mohimo man kita og mga pasumangil ug moingon, “Bueno, ako—ako—ako—akong . . . dili ko mahimo kini, kulang gyud ako. Ako—dili ko mahimo kini.” Ug pagagamiton sa Dios kanang mismong butang aron mahimo nato ang ginapahimo nga buluhaton. Tinuod kana.

45 Mao kana'y hinungdan kon nganong Iyang—gipili Niya kita, tungod kay anaa kita niana nga kahimtang. Karon, daw sa talagsaon kana, apan sa pipila ka minuto moadto na kita sa hinungdan niini, kung itugot sa Dios.

46 Atong—atong nahibaloan, sama sa gibasa nato, nga ang mga kaluyahon ug pagkasinalikway . . . ug nahibaloan nato nga kadtong pinakamahuyang nga mga tawo ug ang mga sinalikway sa kalibutan, sila hinoon ang mga bayani sa Dios, ang mga nagmadaugon diha sa unahan sa panggubatan, ang mga gigamit maoy kadtong mga—mga . . . nagbati sa ilang mga kaugalingon nga sila'y dili-takus.

47 Adunay usa ka igsoong lalaking Methodist, tulo sila ang nagaanhi sa niining iglesia nga mga taga-Ohio, o mga taga-amihanang Indiana. Miingon sila kanako dili pa lang dugay, miingon, “Igsoong Branham,” ang ingon, “nadawat na namo ang Espiritu Santo, mahimo na ba namong pangitaon karon ang mga gasa alang sa among ministerio?”

Ingon ko, “Ayaw ninyo kana buhata! Pasagdi lang kana.”

48 Ug milingi siya ug mitutok kanako, miingon, “Bag-ohay ko lang nabasa ang usa ka libro sa usa ka igsoong lalaki nga miingon kanamo nga pagkahuman nga nadawat na kono namo ang Espiritu Santo ‘kinahanglan na namong pangitaon ang mga gasa,’ aron gamiton kini sa Espiritu Santo.”

Ingon ko, “Ug dayon mamahimo nang hambugiro!” Kita n'yo?

49 Kung mahimatikdan ninyo sa Biblia, kanunay kini nga kadtong mga naninguhang makalikay niini, mao ang pagagamiton sa Dios. Sa diha nga ang usa ka tawo . . . gusto

kaayong mobuhat og usa ka butang ug naghunahuna nga aduna siya'y igong kahanas nga mahimo niya ang maong buluhaton, dili gayud magamit sa Dios kana nga tawo. Tan-awa ninyo si Moises, milikay; tan-awa ninyo si Pablo, milikay usab; ug ang tanang uban pa kanila, naninguha gayud nga makalikay niini.

⁵⁰ Miingon ko, “Ayaw kamo pagpangita og unsa man. Kung aduna man ang Dios og unsa man nga butang alang kaninyo, ihatag gyud Niya kini para kaninyo.” Kita n’yo? “Ug pasagdi lang Siya nga—Siya na ang bahala niana.” Ingon ko, “Mao nga anaa na kamo niining panahona sama, sa karon, nga ang tanan gustong mobuhat og *ingon niini* ug mobuhat sa *ingon niana* ug aron nga mamahimong usa ka bantugan nga tawo. Tan-awa ninyo kung unsa na’y atong gidangatan tungod niana, nakita n’yo.”

⁵¹ Imbis nga maningkamot nga mamahimong daku-dako angay unta nga maninguha—maninguha kitang mahibaloan kung unsaon nga mamahimong ubos pa. Kita n’yo? Kung ingon-ana mahimo na kitang gamiton sa Dios. Aduna ako’y pipila ka mga Kasulatan nga gisulat dinhi nga gusto kong ipahinungod, unta, apan ako . . . kita . . . tingali’g wala na ako’y oras para himoon kini. Apan kita’y . . .

⁵² Himatikdi ninyo nga ang gikinahanglan mao ang mga—mga pinakamahuyang ug ang mga sinalikway, ug halos ang tanang bayani sa Dios nga gipangbutang Niya didto sa unahan sa panggubatan mao’y ingon-ana nga matang sa mga tawo. Ang usa ka tawong sinalikway, usa ka tawong naghunahuna nga siya’y kulang, nga wala man lang siya’y kaarang, nan ingon-niana nga tawo ang mao’y angayan nga pagagamiton sa Dios. Husto kana. Kana’y sa dihang nabati nila nga dili gayud nila mahimo, nga wala gyud sila og bisan unsa man, dinha ang Dios makagunit kanila ug mobuhat og usa ka butang para kanila. Kita n’yo? Sa dihang . . . Apan sa dihang ginahunahuna nato nga makahimo kita niini, nan dili kita mahimong gamiton sa Dios tungod kay gusto man nato kining himoon sa atong mga kaugalingon.

⁵³ Ug, dayon, sa pikas bahin, mabati nato ang mga ingon niini ug mahunahuna dayon nato nga kulang kita, ug dili nato gusto nga himoon kini; apan kung maminaw lang kita sa pagtawag sa Dios, mao kana ang mismong butang nga gusto sa Dios nga atong madangatan, ang ingon nianang matang sa kahimtang, aron nga magamit Niya kita.

⁵⁴ Pag dili kita igo, kung sa kaugalingon lang nato, nan angay kitang magpailalum sa Espiritu sa Dios. Samtang nga ginahunahuna nato nga mahimo nato kini, nan dili nato kini mahimo. Apan kung moabot kita sa punto diin nasayod kita nga dili nato kini mahimo, nan isurender nato ang atong kaugalingon ngadto sa Dios ug Siya ang mohimo niini. Busa kung kita ang nagapaningkamot nga mohimo niini mapakyas gyud kita, apan

kung isurender lang nato ang atong kaugalingon sa Dios kung ingon-ana dili gayud mapakyas ang Dios. Adunay usa lamang ka butang ang dili mahimo sa Dios, ug, kana'y ang mapakyas. Mahimo Niya ang unsa pa mang uban nga butang gawas sa mapakyas. Ug dili gayud Siya mahimong mapakyas.

⁵⁵ Busa samtang nga nagapaningkamot kita sa atong mga kaugalingon ug nagasalig kita sa kaugalingon natong mga abilidad, ug sa uban pa, bueno, wala gyud kita'y mahimo. Apan pagmoabot kita sa usa ka punto diin nasayod kita nga wala gyud kita'y kapuslanan, nan mahimo kitang gamiton sa Dios.

⁵⁶ Ang importanteng butang, usa sa mga importanteng butang nga gikinahanglan natong daugon. . . Karon hinumdumi ninyo kini, ug ilabina kamong mga batan-on pa nga magwawali, ug ang tanang mga miyembro usab. Adunay usa ka butang nga gikinahanglan natong daugon kung nagalaum kita nga mamatuman ang katuyoan sa Dios sa atong kinabuhi, kana mao'y, kinahanglan natong daugon ang panghunahuna bahin sa *tawhanong abilidad*. Kung moabot man kita sa usa ka punto diin maghunahuna kita nga atong mahimo ang usa ka butang pinaagi sa kaugalingon natong kaalam ug sa kaugalingon natong mga abilidad, kinahanglan gyud natong daugon kana sa paagi nga mahimo natong isalikway ang maong butang ug ipadaplin kana aron nga mahimo kitang gamiton sa Dios. Husto kana.

⁵⁷ Ug himoa ang bug-os nga pagsurender! Dili nato magamit ang usa man ka abilidad. Kinahanglan natong himoon ang bug-os nga pagsurender! Ug, ang pagduol sa Dios, kinahanglan mong isurender Kaniya ang imong kalag, lawas, ug espiritu. Ang tanan-tanan kung unsa ikaw kinahanglan nga isurender gayud sa Dios, aron nga mabuhat Niya ang Iyang kabubut-on diha kanimo ug dinhi kanako.

⁵⁸ Karon, malisud kana, nasayod ko, tungod kay kanunay natong gustong itampo ang atong bahin, butang nga *nahibaloan* nato, butang nga nahibaloan nato nga gusto natong buhaton. Moingon kita, "Bueno, ako—kahibalo ko nga kinahanglan nga ingon niana kini." Apan samtang ginahimo mo kana sa ingon-ana nga paagi mamahimong sayup gyud kana, ug dili gyud gamiton sa Dios ang ingon niana nga pagpaninguha. Tingali'g (sa tabang sa Ginoo) mopaingon na kita niana sa pipila ka mga minuto, ug aron ipakita kaninyo nga dili gayud mahimong gamiton sa Dios ang inyong abilidad.

⁵⁹ Ug mao na kana'y nagakahitabo sa kalibutan karon: daghan na kaayong pang-seminaryo nga mga kasinatian, hilabihan ang paghatag og importansiya sa edukasyon, hilabihan ang paghatag og importansiya sa pagpakighigala o pagpakig-fellowship diha sa denominasyon, nagasalig na kita sa usa'g usa, nagasalig kita sa mga tawo nga may abilidad.

60 Miingon ang Biblia, “Unsaon man ninyo sa pagpakabaton og pagtoo kung kamo—kung kamo’y. . .” Tan-awon nato, kung unsa ang pagkasulti niana sa Kasulatan? “Unsaon man ninyo sa pagpakabaton og pagtoo kung nagapalabwanay kamo og pagtahud sa usa’g usa?”

61 Kung nagapaabot kita, nga dunay moingon, “Kana nga lalaki, usa siya ka hawud kaayo nga tawo. Usa ka hawud kaayo nga tawo, mosalig gyud ko kaniya,” dili nahimuot ang Dios pagginabuhat ninyo kana. Kinahanglan sa Dios kita mosalig ug sa Dios lamang! Dili gyud kita angay’ng mosalig sa atong mga kaugalingong abilidad o kang kinsa man. Kinahanglan nga bug-os kitang nakasurender sa Dios.

62 Walay abilidad-abilidad, bisan kang kinsa pang abilidad kana, dili gayud kana magamit sa atubangan sa Dios. Kinahanglan una nga wagtangon sa Dios ang tanan natong mga abilidad dinhi kanato sa dili pa Niya pagatumanon ang Iyang katuyoan. Kung aduna man Siya’y butang nga ipabuhat kanato, ug sa diha gani nga sa tan-aw nato ginabuhat nato kini og maayo sa atong kaugalingon, kon ingon-ana dili gayud kita magamit sa Dios.

63 Karon, moingon kamo, “Grabe na man kanang ginasulti mo, Igsoong Branham.” Ug kana—kana’y grabe lage, apan tan-awa lang ang palibot ug hibaloa ninyo kung husto ba kini o dili.

64 Tan-awa ninyo ang palibot karon sa tanan nga gidahum natong dagkung kalampusan nga atong nahimo, ug hain na man ang Cristianismo sa Estados Unidos? Tan-awa ninyo ang tanan natong mga kaiglesiahan ug mga denominasyon, ug ang atong mga ebanghelista ug mga dagkung buluhaton sa pagpang-ayo, ug ang tanang uban pa nga nagkaaduna kita, ug naunsa na man kini? Mas grabe pa kini kaysa kaniadtong sa sinugdanan! Mas grabe pa karon kay sa kaniadto, tungod kay ginapaningkamotan nato kining buhaton basi sa abilidad sa tawo.

65 Nagakatigum sila ug nagahimo og hatag-as nga mga pagampo ug mogawas dinha. Ug niadtong miaging adlaw daghan kaayo sila, usa ka gatus ug singkwenta ka libo, o mora’g ingon niana, nagakatigum sila, ang Protestante ug Katoliko; naghimo og pipila ka mga pag-ampo, ug nanag-ampo, ug naghimo og nanag-ampo, ug uban pa. Mas maayo pa nga wala na lang sila nagkatigum didto, tungod kay wala man gihapon kadto’y bili sa atubangan sa Dios.

66 Karon, kung nahimo na akong masinawayon, pasayloa ako. Kita n’yo? Apan akong—akong. . . Kinahanglan gyud nimong isulti ang maong butang. Kita n’yo? Kinahanglan mong mapuntirya gayud ang maong butang.

67 Ug unsa ma’y maayo nga nabuhat niadto? Wala. Ug wala gayud kini’y mahimo nga maayo hangtud nga hikalimtan sa matag tawong nagapamahayag nga usa siya ka Cristohanon

ang kaugalingon niyang abilidad ug isurender ang iyang kaugalingon ngadto sa Dios.

⁶⁸ Pag-ingon niana mahimong tumanon sa Dios ang Iyang katuyoan pinaagi sa pagpadala... dili nga usa ka rebaybal, kondili, igsoon, ang kinahanglan Niyang una nga himoon mao ang magpahigayon og pagpatay, husto kana, aron nga *magkaaduna* kita og rebaybal. Kinahanglan n'yo una nga mamatay sa dili pa kamo matawo pag-usab, ug kinahanglan gyud ninyo... Gikinahanglan Niya nga mamatay una kita sa atong mga kaugalingon. Kinahanglan nga mamatay kini nga tabernakulo, ug ako usab kauban niini. Kitang tanan, gikinahanglan nato nga—nga mamatay aron nga mabuhi kita diha sa usa ka bag-ong kinabuhi, usa ka bag-ong baruganan, usa ka bag-ong paglaum, usa ka bag-ong kasinatian! Gikinahanglan una nato og usa ka adlaw sa pagbalata.

⁶⁹ Kinahanglan natong moabot ngadto sa pagsurender sa Espiritu imbis nga nagasalig kita og ayo sa pagpang-eskwela ug sa atong mga programa, ug atong... sa atong dagkung mga buluhaton ug sa tanan nga aduna kita. Kita—kita—nagadepende kita sa panagtambayayong sa daghang nagkalain-lain mga ministro nga makigduyog. Ginatugotan nato ang daghan kaayong... “Kung dili kaayo kita daghan, aba, dili na nato ipahigayon kini. Dili na kita mangadto sa mga siyudad kung dili kita ingon-ana ka daghan.” Ug dayon, pagginahimo nato kana, daw sa mora lang kita og usa ka dakung makina nga aduna na’y nagkagulkol nga carbon, kita n’yo.

⁷⁰ Busa kinahanglan natong—natong likayan ang ingon-anang butang, kanang tawhanong abilidad. Kinahanglan natong moabot sa usa ka punto diin mahimo natong isurender ang atong mga kalag ug mga kinabuhi, bisan kung usa man kamo ka asawa, mag-uuma, mekaniko, o kung kinsa man kita, kinahanglan gyud natong bug-os nga mosurender sa Dios ug hibaloong nga “kita wala gayud.” Dayon dinha na magasugod ang Dios. Ug mosugod na Siyang manglihok, magapamuhat. Ug lakip kitang tanan niini, ang matag usa. Mao kana ang—ang butang nga kinahanglan natong buhaton.

⁷¹ Ginapamatud-an sa kasaysayan, bisan karon, ginapamatud-an (sa kasaysayan) nga kanunay’ng nagapili ang Dios og mga dili-mahinungdanong tawo aron mamahimong Iyang mahinungdanong tawo. Mga tawong dili-mahinungdanon ang ginakuha sa Dios.

⁷² Sa karon, gawas lang kung aduna ka’y maayong pang-teolohiyang pagbansay, mas maayo nga dili mo na lang sulayan nga moadto sa siyudad, mas maayo nga dili mo na lang sulayan nga magpahigayon og usa ka panagtigum. Apan kung aduna ka’y maayo kaayo nga kasinatian, adunay maayo kaayo nga pagbansay ug mga butang nga ingon niana, mahimo kang

moadto sa bisan unsang siyudad ug makakuha og kooperasyon, aron makapahigayon og dakung panagtigum. Bueno, dili kana usa ka panagtigum. . . Siguro usa kini ka panagtigum, sama sa uban pang panagtigum, apan unsa man nga kaayohan ang mahimo niini? Kita n'yo, imo—imo sa gihapon. . . Ang makuha mo kanang mga batan-ong babaye ug mga lalaki, nga nanggi-usap—nanggi-usap og bubble gum samtang nagaduol sa altar, ug mga kababayan-an ug kalalaken-an nga mangduol usab aron lang ingnon nga “nangduol gyud sila sa altar,” manulod pud sa kuwarto aron matudloan ug manggawas aron mawisikan o matuslob, o unsa man kana, ug sa usa—usa ka tuig human niana. . .

⁷³ Miingon ang usa sa mga pinakabantugan nato nga ebanghelista, nga kung mahimo lang unta niya kono nga masiguro ang kaluwasan sa napulo ka porsiyento sa mga nakabig niya sulod sa usa ka tuig, malipay na siya. Busa, kon ingon-ana, kung aduna siya'y usa ka libo nga mga nakabig, pagkasunod tuig kinahanglan, nga aduna na og napulo ka libo ang makabig niya. Kita n'yo, misimang sa tinuod nga tuyo, misimang kita sa maong katuyoan.

⁷⁴ Ang pipila kanato ginabasi kini sa intelektuwal nga panghunahuna, “Oh,” kining, “usa ka-nahibalo-sa-tanan, usa ka binansay nga eskolar kini nga tawo. Kinahanglan natong bansayon ang atong mga tawo ug paeskwelahon sila.”

⁷⁵ Ang uban usab ginabasi kini sa kung unsa nga sensasyon sa—sa paglihok, pagkurog, paghilak, pagsinggit, pagsayaw sa Espiritu, o sa kung unsa pa man, usa ka emosyonal nga pang-gawas nga pamuhat. Ug ingon usab kana ka dili-maayo sama sa edukasyon! Kung dili ka gani makuha sa yawa sa *niini* nga bahin, ituklod ka niya diha *niana* nga bahin.

⁷⁶ Apan ang pinaka-importante niini, mao'y dili ka gyud mosalig sa imong kaugalingon o sa kung unsang butang nga mahimo mo, ang gikinahanglan lang mao ang tibuok og, bug-os nga pagsurender sa imong mga kaluyahon ngadto sa Dios, ug moingon, “Ania ako.” Walay bisan unsa man, walay kahanas ang mahimo mong saligan!

⁷⁷ Susiha ninyo balik ang Kasulatan ug hibaloa, ingon nga nahisulat ko na dinhi ang mga Kasulatan nga akong ginapahinungod. Sa pipila niana nga mga Kasulatan, nahibaloan nato, nga kanunay'ng ginagamit sa Dios ang mga dili-mahinungdanong tawo aron mamahimong Iyang mahinungdanong tawo. Kanunay gyud Niyang ginakuha kadtong mga gisalikway sa kalibutan, gisalikway sa modernong panahon, ug ingon niana nga matang ang ginapili Niya aron nga pagagamiton.

⁷⁸ Hunahunaa ninyo ang—ang mga apostoles. Hunahunaa ninyo si Pedro, ang usa ka mangingisda, nga walay igong

edukasyon aron maisulat ang kaugalingon niyang ngalan. Si Juan, nga walay-hibangkaagan ug walay nakat-onan. Kadto nga mga lalaki! Gilabyan Niya ang mga halangdon ug mga edukadong sacerdote ug mga bantugang tawo sa niadtong mga adlaw, ang mga eskolar, ang mga miyembro sa iglesia, ug gilabyan kadtong . . . kadtong mga tawo nga naghunahuna nga sila’y mga mahinungdanon, ug gipili hinoon kadtong mga dili-mahinungdanong tawo ug gigamit sila.

⁷⁹ Karon, ang usa ka mahinungdanong tawo mahimo man usab nga mamahimong usa sa Iyang mga katawhan, mahimo silang gamiton sa Dios kung andam sila nga hikalimtan nga sila’y mahinungdanon. Kung andam ka nga hikalimtan nga usa ikaw ka *mahinungdanong tawo* ug mamahimong usa ka *dili-mahinungdanong tawo*, kon ingon-ana mamahimo kang gamiton sa Dios ug himoon ka nga usa ka mahinungdanong tawo. Kita n’yo? Apan gikinahanglan mo una nga hikalimtan nga importante ka nga tawo.

⁸⁰ Daghan kanato, daghan kanato ang nagabuhat niana sa—sa atong mga kinabuhi. Sa dihang . . . Ang ubang tawo, sa diha nga nahimo na silang mga Cristohanon, nahimo na hinoon silang mga mapahitas-on, walay-pagtagad, husto kana, baliklad na ang ginalakwan nila nga dalan. Nagaatras sila imbis nga paabante unta. Sa diha nga . . . Sa diha nga labaw mo pang ginapadaplin ang imong kaugalingon, mas daghan ang lawak sa sulod nimo nga mahimong pagasudlan sa Balaang Espiritu.

⁸¹ Sama sa gisulti ni Eliseo kang Josaphat ug sa mga kauban niini, miingon, “Himoa kini nga dapit nga mapuno sa mga kanal. Kung mas halawom ang inyong pagkalot, mas daghan ang lawak nga masudlan ninyo og tubig.” Ug sa diha nga sige natong ginakubsan ang atong mga kaugalingon, og mga—og sa diha nga samot pa natong ginalabay pagawas kining mga basura sa kinaugalingon natong abilidad, magkaaduna kita og mas daghang lawak nga mahimong pun-on sa Espiritu sa Dios; kung mahimo nato kana.

⁸² Si Pablo, nga bag-ohay lang natong gibasa dinhi sa—sa Mga Taga-Corinto, sa Ikaduhang Mga Taga-Corinto, nahibaloan nato nga kini nga lalaki usa ka bantugan nga tawo. Usa siya ka eskolar, usa gyud ka bantugan nga tawo. Apan gikinahanglan una niyang hikalimtan ang tanan niya nga nahibaloan, aron nga maila niya si Cristo.

⁸³ Akong paga . . . pagabasahon ko ang usa sa mga Kasulatan dinhi, kung inyong—gusto ninyong basahon kini uban kanako. Ablihan nato sa Unang Mga Taga-Corinto, sa ika-2 nga kapitulo ug sa ika-unang bersekulo, sa makadiyut. Ug basahon nato sa makadiyut kung unsa’y gisulti ni Pablo, kining bantugang manggialamon nga tawo, kung unsa’y gisulti niya mahitungod sa kaugalingon niya, kung unsa’y angay niyang pagabuhaton.

Unang Mga Taga-Corinto, sa—sa ika-2 nga kapitulo sa Unang Mga Taga-Corinto, ug magsugod kita sa ika-unang bersekulo. Paminawa ninyo kining maong eskolar.

⁸⁴ Binansay kini nga lalaki. Makasulti siya og halos bisan unsa nga pinulongan nga aduna sa kalibutan. Ginapangandak niya kana. Namatuto siya ilalum sa estrikto nga sekta sa mga Fariseo, ug usa ka Fariseo ang iyang amahan. Sa katapusan nahimo siyang “usa ka Fariseo sa mga Fariseo,” ug nagkahulogan kana nga siya—siya mao ang—ang pinaka—estrikto sa tanang mga Fariseo. Usa siya ka bantugang lalaki. Ug aduna siya’y kagahum, ug maalamon siya.

⁸⁵ Gihatagan siya sa iyang amahan og edukasyon ilalum sa pinakamaayo nga magtutudlo nga aduna kaniadto sa tibukok nga yuta, si Gamaliel, nga mao’y pinakabantugan nga magtutudlo kaniadtong panahona sa bisan unsa man nga eskwelahan. Nahimong ingon niadto nga klase sa tawo si Pablo. Nakakat-on siya sa matag pinulongan. Nakakat-on siya og sikolohiya. Nakakat-on siya sa tanang nagkalainlaing mga butang nga aduna kaniadto...nga mahimo niyang makatonan. Ug ginadapigan gyud niya ang—ang tabernakulo sa—sa mga sacerdote ug ang kauban niyang mga—mga bantugang kalalaken-an. Ug nagalibot siya’g nagahimo og dakung mga kadaut sa Iglesia.

⁸⁶ Paminawa ninyo kining maong lalaki, nga bisan sa tanan niyang naangkon nga edukasyon, human nga iyang nadawat si Cristo. Paminawa ninyo kung unsa’y gisulti niya. Bisan unsa pa siya ka gamhanan ug ka halangdon, gikinahanglan niyang hikalimtan kadto. Gikinahanglan niyang maamgo nga dili siya mahimong mosalig sa iyang kaugalingon. Gikinahanglan niyang maamgo nga walay-kapuslanan ang iyang edukasyon. Gikinahanglan niyang masayran, nga ang tanang pagbansay nga iyang nabatonan, ang tanan niadtong pagbansay gikinahanglan niyang hikalimtan. Paminawa siya karon.

. . . ako, mga igsoon, sa pag-anha ko kaninyo, . . . wala ako moanha nga may mahapsay nga pagpamulong . . . kon sa kaalam, kita n’yo, sa pagmantala kaninyo sa pagpamatuod sa Dios.

“Wala gayud ako moanha kaninyo aron sa pagsulti kaninyo, ‘Karon, ako si Doktor Saulo nga gikan sa Eskwelahan nga *Ingon niini-ug-ingon niana*, ako mao ang . . . gikan sa bantugang sekta sa niini nga denominasyon.’ Wala ako moanha kaninyo nga sama niana.”

Kay gituyo ko ang dili pagkahibalo sa bisan unsa nga anaa kaninyo, gawas kang Jesus Cristo, ug kaniya nga gilansang sa krus.

⁸⁷ Dinha, paminawa ninyo ang testimonyo sa usa ka lalaki nga sama niana.

“Gituyo ko ang dili pagkahibalo sa bisan unsa man mahatungod sa inyong mga abilidad. Nasayod ko nga walay bisan unsa man nga anaa kaninyo ug gituyo ko lang nga mahibaloan ang usa ka butang nga nakita ko diha kaninyo, kana mao si Jesus Cristo ug Kaniya nga gilansang sa krus. Ang gilansang sa krus nga Manluluwas nga anaa sa taliwala ninyo, mao lang kana ang kinahanglan kong mahibaloan.”

⁸⁸ Paminawa ninyo siya.

Ug ako uban kaninyo sa... (sa kabantugan ba? Sa unsa man?)... kaluya, ug sa kahadlok, ug... sa dakung pagkurog.

⁸⁹ Mahunahuna ba ninyo ang usa ka lalaki, usa ka Fariseo sa mga Fariseo, usa ka magtutudlo sa mga magtutudlo, usa ka lalaki nga gibansay na gikan pa sa pagkabata (alang sa ministerio) aron mamahimong usa ka tawo nga maayong manulti ug maalamon ug utokan, nga moanha sa atubangan sa usa ka matang sa mga tawo nga sama sa mga taga-Corinto ug moingon, “Ako uban kaninyo sa kaluya, ug sa kahadlok, ug sa dakung pagkurog”? Ang tawo nga maoy nagpabalintong sa kalibutan, ang pinakabantugang misyonero nga nailhan sukad-sukad, misugid nga “mianha siya sa kaluya,” dili ingon nga usa ka binsay nga eskolar, kondili “diha sa kaluya, sa kahadlok,” kay basin unya’g mahitipas siya sa Dalan nga iyang ginalakwan. “Diha sa dakung pagkurog,” tungod kay dili man siya makasalig sa kaugalingon niyang abilidad.

⁹⁰ Ang hinungdan nga siya’y “nahadlok,” dili tungod kay nahadlok siya sa unsa mang butang, kondili nahadlok siya nga tingali’g dili niya mapahimuot ang Dios sa unsa mang pamaagi, nga basin iyang masagol Niini ang kaugalingon niyang abilidad; butang nga nakat-onan niya, nga iyang... Ginasultihan niya sila nga, “Wala ako moanha kaninyo nga aduna niining mga mahapsay nga pagpamulong (mianha ako kaninyo sa *kahadlok* nga tingali’g mahianha ako sa ingon-anang paagiha), apan mianha ako kaninyo nga walay unsa mang nahibaloan gawas kang Cristo, ug Kaniya nga gilansang sa krus.”

Ug mianha ako kaninyo sa kahadlok, ug kaluya ug sa dakung pagkurog.

Ug ang akong pulong ug ang akong pagwali wala sa madanihong pulong sa kaalam, kondili sa pagpadayag sa Espiritu ug... gahum:

⁹¹ Paminawa ninyo kini nga lalaki nga usa ka manggugubat nga gihukas ang iyang kaugalingon. Amen! Kung aduna ma’y butang nga gikinahanglan ang atong mga eskwelahan karon, kung aduna ma’y butang nga gikinahanglan ang atong mga kaiglesiahan karon, mao ang paghukas sa mga kaugalingon nila, sa kaugalingon n’yong mga panghunahuna ug sa kaugalingon n’yong mga abilidad. Panghukasa ang inyong mga kaugalingon

sa atubangan sa Dios kay basin mosulay pa mo'g paghimo og butang sa kinaugalingong paagi.

⁹² Nanghinaut ko nga inyong . . . motuhop gayud kana kanato, para sa mga ania dinhi ug sa kadtong mga magapaminaw niining maong teyp, usab, nga maamgo ninyo nga kinahanglan gyud ninyong mamahimong walay-pulos. Dili nga usa ka nahibalo-sa-tanan, dili nga usa ka bantugang mahinungdanong-tawo, kondili usa ka *dili-mahinungdanong tawo*. Kinahanglan ninyong . . . mahunahuna nga mga abog lamang kamo. Kinahanglan nga moabot kamo sa punto diin maamgo ninyo nga kamo wala gayud. Ug ayaw gayud pagpaibabaw niini, kay sa higayon nga mopaibabaw kamo niini nagapaibabaw na kamo sa Dios. Kinahanglan ninyong ipabilin ang inyong kaugalingon diha sa abog ug diha sa dalan paingon sa Damascus. Kinahanglan ninyong ipahilayo ang inyong kaugalingon gikan sa inyong mapahitas-on nga kinaiya. Ug alang kini sa bisan asa, dinhi ug sa kadtong magapaminaw niining teyp.

⁹³ “Ang akong pulong,” ang ingon niya, “wala . . . sa madanihong mga pulong sa tawo ug sa kaalam sa tawo, kondili sa pagpadayag sa Espiritu sa gahum.”

⁹⁴ Karon tan-awa ninyo! “Aron nga unsa, Pablo? Nganong ginahimo mo man kini?”

Gahum! Aron ang inyong pagtoo dili ika-patukod diha sa kaalam sa mga tawo, kondili diha sa gahum sa Dios.

⁹⁵ Oh, grabe nga magwawali! Kining bantugang lalaki nga . . . Iyang gipangita ang Dios, ug miingon siya, “Dios, mahuyang ako ug wala ako—ako kahibalo kung unsa’y buhaton. Nagaampo gayud ako Kanimo, Dios, nga lig-onon ako ug tangtangan ang akong mga kahuyang gikan kanako, ug kining mga butanga, aron nga mas malig-on ako.”

⁹⁶ Nagpakigsulti’g balik kaniya ang Dios, miingon, “Pablo, ang Akong gahum ginahingpit diha sa imong kaluya.”

⁹⁷ Dayon miingon si Pablo, “Sa diha nga magmaluya ako magamalig-on man hinoon ako. Oo!” Ingon siya, “Busa . . . magahimaya ako sa akong mga kasakitan sa akong mga kaluyahon ug uban pa. Nagapasalamat ako sa Dios nga natangtang ko na ang tanan niini kanako. Ug sa diha nga natangtang ko na ang maong mga butang kanako, nan makasulod na ang Dios. Apan samtang aduna pa ako’y pipila sa akong kaugalingon dinha, nan dili gayud makasulod ang Dios.”

⁹⁸ Kana, mao kana, atong—atong ginapugngan Siya. Ginaabog nato Siya palayo tungod sa atong . . . Gikan sa pinakakabus kanato hangtud sa pinakadatu kanato, gikan sa pinakagamay hangtud sa pinakadaku, ginapagawas nato ang Dios sa atong mga kinabuhi tungod sa atong mga kaugalingon.

⁹⁹ Kanunay kong ginaingon, “Ang pinakadakung kaaway nga aduna ako mao si William Branham.” Siya kanang nagababag diha sa dalan sa Dios. Siya kanang maong tapolan. Siya kanang nagaabot sa punto usahay nga diin ginahunahuna niya nga aduna siya’y mabuhat niana, ug, sa dihang buhaton niya, ginatukmod niya ang Dios palayo sa maong esena. Apan pag-mapapahawa ko kanang lalakiha, pagmoabot ako sa punto nga mahipadaplin siya, nan makaduol na ang Dios ug buhaton ang maong mga butang nga wala gayu’y hibangkaagan si William Branham.

¹⁰⁰ Dinha ka mahimong gamiton sa Dios. Dinha Niya mahimong gamiton ang si bisan kinsa man kaninyo. Mahimo Niyang gamiton ang si bisan kinsa sa diha nga mahimo natong ipadaplin ang atong kaugalingon. Apan samtang ginababag pa nato ang atong mga kaugalingon diha sa dalan, nan dili gayud kita magamit. Sige.

¹⁰¹ Karon nahibaloan nato, nga kining bantugang lalaki, nga si Pablo, usa siya—usa siya ka prinsiphe sa tanang mga magwawali. Ginatahod siya sa tanang denominasyon. Mahimo sa maong tawo nga basta na lang moadto sa usa ka siyudad ug magpahigayon og usa ka panagtigum sa bisan asa. Tungod kay ngano man? Aduna siya’y mga kredensiyal. Aba, bantugan siya kaayo kaniadto, ug determinado kaayo siyang papason ang tanan niadtong mahuyang nga mga tawo, hangtud nga nakakuha siya og kagahum gikan sa labaw’ng sacerdote, nga mao’y adunay labing hataas nga pagbulot-an kaniadto, aron gapuson ang tanang mga Cristohanon. Usa ka pulitikanhong gahum gikan sa iyang iglesia, aron gapuson silang tanan! Oh, siya’y gamhanan gayud! Mahimo niyang gapuson ang mga Cristohanon ug ibalibag sila sa bilangoan tungod kay dili man sila mouyon kaniya sa iyang pang-teolohiyang mga doktrina, nga mga doktrina sa mga Fariseo ug mga Saduceo. Gipanggapus niya ang mga Cristohanon kaniadto.

¹⁰² Apan, himatikdi ninyo, gikinahanglan niyang magapus usab, siya mismo, aron mabadbaran siya, mabadbaran siya sa iyang gahum ug pagbulot-an. Nagapus usab siya, siya mismo, aron mabadbad kaniya ang iyang gahum sa pagpanggapus. Gikinahanglan niyang mabadbaran sa kung unsa siya kaniadto, aron magapus siya.

¹⁰³ Ginalabyan ra sa Dios ang mga bantugan! Gilabyan Niya ang mga sacerdote. Gilabyan Niya kadtong mga mapahitas-on. Ug gipili Niya si Pablo, kining halangdon nga lalaki, ug gipahapa kini sa abog sa yuta ug gipahimo og mga butang nga iyang . . . sama niadtong ginahimo sa uban. Gipalihok Niya sila sa . . . gipalihok Niya siya sa mao rang paagi sama sa mga lihok niadtong iyang mga gipangdakup. Gigapus Niya si Pablo pinaagi sa Espiritu sa Dios, aron makabuhi siya gikan sa naangkon niyang kagahum aron gapuson ang mga Cristohanon. Masulti ba

ninyo kanako nga wala nakahibalo ang Dios sa Iyang ginabuhat? Gikuha Niya ang kusog ni Pablo aron nga makabuhi kini sa iyang—iyang pagpanggunit.

¹⁰⁴ Pagkadaghan unta sa mga ministro ang mahimong magamit sa Dios kung tugotan lang unta nila nga gapuson sila sa Dios sa Iyang Pulong ug sa Iyang gahum, ug buhian sila gikan sa gahum nianang mga denominasyon ug mga organisasyon! Pagkadaghan unta sa mga matinuurong tawo sa niini nga siyudad, karong buntaga, nga nagapanambong niining dagkung organisasyong kasimbahanan, pagkadaghan gyud unta kanila nga mahimong pun-on Niya sa Espiritu Santo, ug padilaabon kini nga nasud sa Maayong Balita ug sa gahum, kung dawaton lang unta nila ug buhian ang ilang mga kaugalingon gikan sa gahum nga anaa kanila ug magpagapus sa Iyang Espiritu, aron mamahimong sama ni Pablo kaniadto, nga usa ka ulipon sa gugma sa Dios!

¹⁰⁵ Gikuha sa Dios si Pablo ug gihimo siya nga usa ka ulipon, gigapus siya ngadto sa Iyang Kaugalingon ug gipadala siya ngadto sa mga Gentil nga iyang gidumtan kaniadto. Apan, nakita n'yo, kinahanglan niya nga mabadbaran gikan sa pang-simbahan niya nga gahum, aron magapus nganha sa gahum sa Dios. Kinahanglan niyang mawad-an sa iyang gahum ug maluya ug mahimong walay-kapuslanan, aron nga madawat niya ang gahum sa Dios, aron magapus nganha sa Dios, ug aron buhaton kung unsa'y isulti sa Dios kaniya nga pagabuhaton.

¹⁰⁶ Ingon niana ang kinahanglan natong buhaton karon. Ingon niana ang kinahanglan ko. Ingon niana ang kinahanglan sa matag tawo, ang walaon ang iyang kaugalingon, walaon ang iyang abilidad, walaon ang kung unsa siya, aron nga magkaaduna siya og bug-os nga pagsurender sa Balaang Espiritu. Kinahanglan kana sa usa ka asawa. Kinahanglan kana sa usa ka bata nga nagaeskwela. Kinahanglan nato . . . bisan sa atong gagmay'ng mga anak.

¹⁰⁷ May usa ka batang lalaki nga nahunahuna ko, kagahapon sa hapon o niadtong usa ka adlaw, o sa miaging adlaw, misulod ang maong bata ug dali-dali niyang gipahimo sa iyang magulang nga babaye ang iyang tulun-anan sa balay, ug migawas siya ug giingnan ang uban pang mga batang lalaki, miingon, "Whew! Kasayon ra sa maong mga pangutana." Kita n'yo, gitudloan na sila, halos, nga manikas.

¹⁰⁸ Unsa kaha kung mas maayong . . . Ug kana nga mga tawo mao'y mga haligi sa iglesia. Unsa kaha kung maayo kang Papa, pagkabuntag diha sa oras sa pagpamahaw, moingon siya, "Magkaaduna og eksaminasyon si John karong adlawa. Oh Dios, ubani si John! Tabangi si John! Gihangyo niya ako didto sa kuwarto niining buntaga, ingon siya, 'Papa, iampo mo ako karong adlawa, kinahanglan kong mobarug para sa akong eksaminasyon. Iampo ako.'"

109 Mas gustohon ko pang makakuha ang akong anak nga lalaki og usa—usa ka angay'ng lang, desente nga “F” sa iyang kard, nga dili-pasado, kay sa mahibaloan ko nga nakakuha siya og direktso nga “A” apan nanikas man diay. Oo, sir! Ang kinahanglan nato mao ang walaon nato ang atong kaugalingon, hingpit nga nagasalig sa gahum sa Dios.

110 Karon, “gigapus.” Ginalabyan ra sa Dios ang bantugang mga tawo ug ginakuha ang mga mahuyang. Ginalabyan sa Dios kadtong mga hataas ang tan-aw sa ilang kaugalingon, aron kuhaon kadtong walay hibangkaagan aron tumanon ang Iyang katuyoan diha sa ilang kinabuhi. Mao kana ang nangakuha nato.

111 Ang ingon sa Dios kang Pablo, “Hingpit ang Akong gahum sa imong kaluya. Ang Akong—Akong gahum nagakahimong mas hingpit sa diha nga mas nagakaluya ka. Sa diha nga mahimo mong mas nagasurender pa Kanako mas magamit Ko ikaw. Kung mahimo mong mas hikalimtan ang imong edukasyon, kung mahimo mong mas hikalimtan ang imong denominasyon, kung mahimo mong mas hikalimtan ang mga butang nimo ug isurender ang kaugalingon mo Kanako, mas magamit Ko ikaw. Tungod kay samtang nagakaluya ka, Akong—Akong pagalig-onon ang Kaugalingon Kong katuyoan.”

112 Makahimo ang Dios og kalig-on gikan sa kahuyang! Mao kana'y hinungdan kon nganong ginahimo Niya kini kanunay. Sa dihang gipili Niya ang Iyang mga tinun-an kaniadto, kinsa ba ang maghunahuna . . .

113 Ang pagkamapaubsanon sa Kaugalingon Niyang Anak niadtong gipanganak Siya diha sa usa ka pasungan, sa usa ka kamalig nga puno og tai, sa toril sa baka, ug naputos sa mga bakbak! Kita n'yo, mahimo man unta Siya nga maipanganak sa usa ka palasyo. Mahimo man unta Siya nga mokanaug diha sa mga pasilyo sa Langit, ug tanan na . . . nga nakasaludo ang tanang mga Anghel. Apan gipili Niya nga himoong Ehemplo si Cristo nganhi kanato, alang kanato, ug Iyang gipakatawo Siya diha sa pagkamapaubsanon.

114 Wala gayud Niya Siya gibansay sa mga tulunghaan niining kalibutana, kondili gibansay Niya Siya pinaagi sa Kaugalingon Niyang gahum, aron . . . aron nga bug-os Niyang isurender ang Iyang Kaugalingon, dili sa mga panghunahuna sa tawo o sa gahum sa kalibutan, kondili isurender ang Iyang Kaugalingon ngadto sa gahum sa Dios.

115 Ug ingon niana kita karon, ginapasakup nato ang atong kaugalingon karon sa atong dagkung mga denominasyon ug mga gingharian. Ginapasakup nato ang atong kaugalingon sa denominasyon, sa kung unsa'y ginasulti niini, sa kung unsa ma'y ginasulti *nila* mahitungod niini. Apan sukwahi kana sa kabubut-on sa Dios. Kinahanglan natong isurender ang atong

kaugalingon sa Espiritu sa Dios ug moadto kon diin ginasulti sa Espiritu nga moadto. Husto kana.

¹¹⁶ Ang mga Hebreohanon sa Dios nga atong. . . mga sundalo sa Dios, diay, “mga bayani.” Bag-ohay pa natong gibasa sa Basahon sa Mga Hebreohanon, sa ika-11 nga kapitulo ug sa ika-34 nga bersekulo.

. . . *gikan sa mga kaluyahon nangahimong maligon, . . .*

¹¹⁷ Kinahanglan nila nga mamaluya sa dili pa sila mamaligon. Gikan sa ilang mga kaluyahon nangahimo silang maligon. Kamo nga ginasulat ang mga Kasulatan, dinha, Mga Hebreohanon 11:34. Sige.

¹¹⁸ Ania ang usa ka butang nga magapahupay kanato. Ania ang usa ka butang nga makapadasig kanato. Gikan sa kaluya ug pagpaubos ginapili sa Dios ang mga tawo nga molangkob para sa Iyang Gingharian. Kung makaadto na kita sa Langit, pagmotindog na kita didto sa Presensiya sa Dios kauban ang Iyang Iglesia, magatindog kita kauban ang pundok sa mga tawo nga mga mahuyang ug mga gisalikway ug gihinginlan sa kalibutan, ug mga-walay-hibangkaagan.

¹¹⁹ Dili ba kini talagsaon nga gipahisama kita sa Dios ngadto sa karnero? Ang karnero mao ang pinakawalay-mahimo nga mananap nga aduna kita. Wala na’y mananap nga dili gayud makadepensa sa kaugalingon niya kay sa karnero. Ang rabbit makahimo man sa pagdagan; ang squirrel makakatkat man sa kahoy; ang iro makapamaak; ang leon makapangwatas; ang kabayo makapanipa; ang langgam makalupad; apan ang karnero wala gayu’y mahimo.

¹²⁰ Ug ingon niana ang gusto sa Dios para kanato. Ang maamgo nga wala gyud kita’y kaarang, dayon kuhaon sa Dios kana nga tawo ug sugdan Niyang ihulma ang Iyang Kaugalingon sa niana nga tawo; pabuhaton ang mga kamot sa maong tawo sa kung unsa ma’y pagabuhaton sa mga kamot sa Dios, pagapasultihon ang mga ngabil niya sa kung unsa ma’y igasulti sa mga ngabil sa Dios; tungod kay dili na man iya ang mga niini, iya na kini sa Dios. Nagasugod Siya sa pagporma og usa ka kinaiya, gamiton kana nga kahuyang ug aron himoon kanang Iyang Kaugalingon.

¹²¹ Gidala Niya kita dinhi ibabaw sa yuta, apan. . . Nangahimo kitang edukado, nangahimo kitang utokan. Nahimatikdan ba ninyo ang mga kaliwat, ang mga kaliwatan kaniadto? Nan atong, ipananglitan, si Abel, gikan kang Abel mitungha si Seth; ug sa pagpadayon sa kaliwatan ni Seth, hangtud na sa panahon ni Noe, ang tanan kanila ubos lamang nga mga mag-uuma. Apan ang mga kaanakan ni Cain nangahimong maantigo, maalisto, edukado, mga bantugang tawo, mga magtutukod, mga propesyonal nga tawo.

¹²² Apan ang kaliwat sa Dios mao ang mga mahuyang ug mapaubsanon. Ingon niana kon giunsa sila paggamit sa Dios. Dinha ang kahigayonan sa Dios. Mao kana ang paagi sa Dios sa pagduol kanato, sa diha nga nagakaluya kita. Magkaaduna dayon kita sa kung unsang butang. Nagapadasig kini, siyempre, tungod kay ang tibuok Gingharian sa Dios naglangkob man og ingon niini nga matang sa mga tawo. Kung ingon-ana pagmoabot kita sa niana nga punto nan kita—kita . . . anaa kita sa Iyang Gingharian.

¹²³ Ang problema, kanato, mao’y . . . dili tungod nga mahuyang kita kaayo, ang problema mao’y kusgan kita kaayo. Kita—kita—kita’y mga kusgan kaayo. Kana lang. Ang problema mao nga sa hunahuna nato kusgan kita kaayo. Husto kana, nagahunahuna ta nga kusgan kita kaayo. Daghan kita kaayo og nahibaloan. Gusto sa Dios nga walaon kana kanato. Husto kana. Kusgan kita kaayo, kusgan kita kaayo aron mosurender Kaniya. Atong . . . Kita—nagasurender kita sa atong mga kaugalingon. Ginahunahuna nato, “Bueno, karon, dinhi, ako—aduna man ako’y igong salabutan sa paghibalo!”

¹²⁴ Nakurat ako niadtong pipila na ka gabii ang milabay sa dihang may sakit ang usa ka inahan, didto sa ospital. Miadto ako . . . Adunay usa ka gamay’ng gining didto sa pikas nga kuwarto . . . Kung ania kanang gamay’ng gining dinhi, pasayloa ko, igsoon. Usa siya ka babayeng taga-Kentucky nga gikan pa gyud didto, ug iyang . . . ug iyaha kadtong ugangan nga babaye. Ug naestorya ko siya niadtong gabhiona, ako ug akong asawa, mga ala una na kadto sa buntag. Ug mihigda na ang iyang bana didto sa salog ug natulog; ingon siya, “Gawas dinhi! Wala man ka’y matabang sa imong mama, bisa’g unsaon.” Ug gipagawas siya, ang iyang bana, pagawas sa kuwarto, tungod kay nagahigda man kini didto mismo sa pultahan kon diin nagaagi ang mga nars, wala na hinoon makasulod; nagahagok pa gyud, diha sa salog. Busa iya kadtong gipabangon ug gipagawas kadtong maong lalaki.

¹²⁵ Ug nakig-estorya ang maong babaye didto. Naestorya ko siya mahitungod sa Ginoo ug uban pa. Ug miingon siya, “Bueno,” ingon niya, “ang nahibaloan ko lang mao ang mangguna sa usa ka umahan sa tabako, sa sayo pa sa buntag, manghagbas sa mga sagbot ug magsupsup og tabako, ug uban pa nga sama niana.” Miingon, “Apan, sultihan ko ikaw,” miingon, “gipaeskwela man kami ni papa, matag usa kanamo, sa tulunghaan.” Ug ingon pa, “Wala man gihapon kami’y nakat-onan.”

Sa hunahuna ko, “Bueno, tingali’g mao kana ang hinungdan.”

¹²⁶ Kita n’yo, kinahanglan—kinahanglan ninyong ipahilayo ang mga butang sa kalibutan gikan kaninyo. Karon, wala ko ginasuportahan ang kawalay-hibangkaagan, dili—dili ingon

niana, apan ginahunahuna ko nga pagmoabot ka na sa usa ka punto diin ginahunahuna mo nga daghan—daghan na kaayo kang nahibaloan hangtud nga wala na’y si bisan kinsa ang nakahibalo niini. Okey ra man ang imong kahibalo basta dili lang kini—dili lang kini makababag sa mga saad sa Dios.

¹²⁷ Ginakontrolar kita sa lima ka mga sensya, ug kanang lima ka mga sensya (igtatan-aw, igtitilaw, igbabati, igsisimhot, ug igdudungog) maayo kaayo ang mga niini hangtud nga babagan na niini ang sensya sa Pagtoo. Dayon sa dihang ginabatokan na sa mga niini ang Pagtoo. . . Ug unsaon mo man pagkahibalo kung asa kanila ang husto? Tungod ang Pagtoo kanunay gayud nga mouyon sa Pulong. Ug dayon kung—kung supak man ang imong pagtoo sa Pulong, o ginahunahuna mo nga ingon-ana, nan wala ka gyu’y Pagtoo. Aduna ka lang og paaron-aron nga pagtoo. Ang anaa kanimo pagpanghambog lang diha sa imong mga sensya, tungod sa kung unsang kahibalo nga nakat-onan mo, o ingon niana. Apan kung mopahilayo ka niana ug bug-os kang mosalig sa Pagtoo, ug mahimo lamang tukoron ang Pagtoo diha sa Pulong sa Dios (husto nga Pagtoo).

¹²⁸ Miingon kanako ang usa ka doktor kaniadto, miingon, “Nagatoo ko, Billy, kung kana nga mga tawo. . .kung sultihan mo sila nga moadto didto ug hikapon kanang maong poste, kanang punoan dinha, ug motoo sila nga mamaayo gayud sila, mamaayo ra sila sa gihapon.”

¹²⁹ Ingon ko, “Dili, sir. Dili kana ingon-ana, doktor, nga tungod sa nianang usa ka butang, kita n’yo, nakahibalo kana nga mga tawo nga usa lang kana ka poste. Nasayod sila nga wala gyu’y kaayohan ni gahum sa niana nga poste.”

¹³⁰ Apan ang si bisan kinsa man nga tawo nga anaa sa hustong panghunahuna nakahibalo gayud nga tungod kana sa Pulong sa buhi nga Dios, nga mahimo kong ibasi ang akong pagtoo diha niana ug nasayod nga Kini’y MAO KINI ANG GINAINGON SA GINOO! Ug kung sukwahi man Dinha ang bisan unsang butang, nan dili ko toohan ang akong mga sensya. Dili, sir, pasagdi lang kana. Sumalig ka sa usa pa nimo ka sensya, sa sensya sa Pagtoo.

¹³¹ Bueno, ginagamit sa Dios ang ingon nianang mga tawo aron buhaton. . . Sa diha nga sila’y mga tawong dili mahinungdanon, magpasakop gayud sila Kaniya.

¹³² Si D. L. Moody sa Chicago, siya’y taga-Boston, usa siya ka sapatero; mubo, gamayon nga tawo, walay-kaarang, wala nagasalig sa iyang kaugalingon. Karon, tan-awa n’yo kining dagkung mga eskwelahan nga aduna sila karon, kanang Moody School dinha, kung makabangon lang si Dwight Moody ug makita kana nga eskwelahan, ang unang butang nga buhaton ni Dwight Moody mao’y ipaguba gyud niya kana nga eskwelahan.

¹³³ Kung makabangon lang si Martin Luther, ang unang butang nga buhaton niya mao’y walaon gyud niya ang Lutheran nga

organisasyon. Mao usab ang pagabuhaton ni John Wesley. Kini nga mga lalaki wala gayud nagtukod niana nga mga organisasyon, ang mga tawo kini nga misunod kanila, mao ang nanagtukod niana.

¹³⁴ Si Pablo usab wala gayud nag-organisa og iglesia, tungod kay miingon siya, mismo, “Tapus sa akong paggikan, daghan sa kaugalingon ninyong pundok ang manindog sa inyong taliwala, magasulti og mga butang nga balit-ad.” Human kadto sa pagkamatay ni Pablo, ug usa ka gatus (o duha ka gatus) ka tuig human niadto, gitukod nila ang iglesia nga Katoliko, nga mao ang pinakaunang organisasyon.

¹³⁵ Nanagbarug ang mga tawo! Human kadto sa pagkamatay ni Moody nga nagtukod sila og Moody School; human sa pagkamatay ni Wesley nag-organisa sila og iglesiang Wesley; human sa pagkamatay ni Luther nag-organisa sila og iglesiang Luther. Nagapadala ang Dios og mga bayani; apan sila’y nanagtukod . . .

¹³⁶ Dili ikatingala nga miingon si Jesus kaniadto, “Kamo—kamo nga mga pinaputi ang mga bungbong!” Ingon Siya, “Inyong—inyong ginadayandayanan ang mga pantiyon sa mga propeta, ug kamo ma’y nagbutang kanila dinha!” Husto kana.

¹³⁷ Nangabot kining halangdon nga mga tawo; unya dayon ang nanagsunod kanila nanagtukod og mga handumanan para kanila. Sa hunahuna ko, sama na lang unta sila ni David, “Nag-alagad og maayo sa Dios diha sa mismo niyang henerasyon.” Ingon niana unta ang gibuhat. Gipadaplin unta ang mga organisasyon ug ingon-anang mga butang dinha, nga mapahilayo kaninyo.

¹³⁸ Si Moody, nga usa ka yanong sapatero, mahuyang siya. Usa siya ka ehemplo sa kahuyang. Ang unang butang kono nga gibuhat ni Moody . . . Wala gayud siya’y edukasyon, ug salikwaut kaayo ang iyang gramatika ug pagka-bakikaw kadto. Usa ka lalaki ang miduol kaniya kaniadto ug miingon, “Mr. Moody,” miingon, “ang imong gramatika mao ang pinakasalikwaut nga nadungog ko sukad sa tibuok kong kinabuhi.”

¹³⁹ Ingon niya, “Nakapangabig man ako og mga kalag pinaagi sa akong kawalay-edukasyon, ikaw unsa ma’y ginahimo mo sa imong edukasyon?” Sa tan-aw ko usa kadto ka maayo nga tubag. Oo!

¹⁴⁰ Ug karon, pag-usa ikaw ka miyembro sa niana nga Eskwelahan, sigurado gayud nga mamahimo kang usa ka maayo kaayo nga eskolar. Husto kana. [Nagaingon ang usa ka igsoong lalaki, “Paatras lang!”—Ed.] Karon, oo, sila’y “paatras” lang, pabalik ang direksyon.

¹⁴¹ Ingon niana gayud ang ginahimo sa mga tawo. Sa gikaingon ko na sa pagsugod sa akong mensahe . . . Imbis nga mga Cristohanon nga ginapaubos ang ilang mga kaugalingon ug

nga ginahukasan unta ang ilang mga kaugalingon aron nga makagahin og mas daku nga espasyo para sa Dios, ginapalambo pa hinoon nila ang ilang mga kaugalingon tungod sa usa ka hinimo'g-tawo nga mga kahibalo, o kahibalo sa kung unsang pang-teknikal nga eskwelahan, o mga ingon niana, nga samot pa silang ginapahilayo gikan sa Dios kay sa kaniadtong nagsugod pa sila.

¹⁴² Ingon niana ang ginahunahuna ko mahitungod sa nianang mga artipisyal nga mga pagtawag ngadto sa altar. Paduolon mo ang usa ka tawo, ug pagkasunod niana napulo ka beses na siyang mas malisud nga pabalikon pag-usab. Pasagdi nga molingkod siya ug maminaw hangtud nga magabuhat ang Dios og usa ka butang alang kaniya! Ug pagkahuman pasagdi nga siya ang moduol ug ipahayag kana, ug motindog, nga nagatawag sa Ngalan sa Ginoo. Husto kana.

¹⁴³ Himatikdi ninyo si Moody, kulang sa edukasyon, dili-hanas manulti, nagagawas ang iyang tingog sa iyang ilong. Bag-ohay ko lang gibasa ang iyang kasaysayan niadtong miaging adlaw, “Nagagawas ang iyang tingog sa ilong, aduna siya’y problema sa ilong.” Mubong tawo kung sa pisikal, upawon nga lalaki, tag-as ang mga bungot sa iyang . . . ? . . . ; usa ka medyo, gamayon, mubong lalaki. Kung sa pisikal, dili maayo ang itsura. Busa siya’y walay lain kondili walay puas nga kaluya. Apan gigamit siya sa Dios aron tay-ogon ang kalibutan sa iyang adlaw!

¹⁴⁴ Usa ka higayon kaniadto adunay usa ka tigbalita nga mitambong sa iyang panagtigum (sa akong nabasa) ug atua ang maong mga tigbalita, aron magmantala bahin sa kung unsa siya nga matang sa tawo (usa ka bantugang tawo, usa ka halangdong lalaki).

¹⁴⁵ Hain gani kadtong gamay’ng pindotanan pag-ginapalong ninyo ang mga teyp? Mao ba kini? Gikinahanglan ko lang nga ihunong una kana dinha.

¹⁴⁶ Usa—usa ka bantugang tawo, si Moody kaniadto. Usa siya ka buutan nga tawo. Ug busa mahimo niyang danihon ang pagtagad sa mga tawo, pagadanihon gayud sila. Busa adunay usa ka tigbalita nga miadto kang Mr. Moody ug miingon . . . mitambong sa iyang panagtigum aron magmantala bahin sa kung unsa gayud siya ka maayong . . .

¹⁴⁷ Ug ang maong tigbalita miadto usab didto ug nagmantala mahitungod sa usa pa ka bantugang ebanghelista, bag-ohay pa lang, miingon, “Maayong manulti kini nga tawo. Usa siya ka Doktor sa Divinidad. Mogamit siya og pinakamaayong gramatika nga karon ko lang sukad nadungog. Madani niya ang mga tawo sa iyang sikolohiya. Madani gyud niya ang mga tawo.”

¹⁴⁸ “Si Dwight Moody,” sa dihang miadto ang maong tigbalita, miingon, “Wala ko’y makita og unsa man kaniya nga makapadani sa kang kinsa man.” Miingon, “Una pa lang, maut

kaayo siya. Ang sunod, daut siya sa pisikal. Tapos ang sunod pa” ingon siya, “siya’y, wala siya’y edukasyon. Ang iyang gramatika mao na ang pinakasalikwaut nga nadungog ko sukad-sukad!” Ug miingon, “Nagagawas sa ilong ang iyang tingog ug mohangos pa gani sa dihang nagawali siya.” Ug miingon, “Wala gyud ko’y nakita og unsa man kang Dwight Moody nga makapadani sa pagtagad ni kinsa man.”

¹⁴⁹ Gidalhan si Mr. Moody og niadtong artikulo. Gibasa niya kadto, medyo mikatawa na lang siya sa iyang kaugalingon, miingon, “Siguradong dili ako; ang Dios kini. Oo! Wala nagapanambong kadto nga mga tawo aron nga ilang makita si Dwight Moody, nagapanambong sila aron nga makita ang Dios.”

¹⁵⁰ Dili igsapayan sa mga tawo kung unsa ka pa ka maayo magpamatuod, gusto nila og usa ka realidad diha sa imong kinabuhi nga nagapamatuod nga gigunitan ka sa Dios. Bisan Methodist ka pa, Baptist, Pentecostal, bisan unsa ka man, ang Dios ang gusto nilang makita. Husto kana, mga kalalaken-an nga...mga bantugang kalalaken-an, mahuyang nga mga kalalaken-an nga naamgo nila ang ilang kahuyang.

¹⁵¹ Tan-awa ninyo si Moises, ang usa ka intelektuwal nga batan-ong lalaki. Oh, usa siya ka eskolar. Binansay siya kaayo sa tanang kaalam sa mga Egiptohanon hangtud nga mahimo niyang tudloan ang mga Hebreohanon. Mahimo niyang tudloan ang mga Egiptohanon. Mahimo niyang tudloan ang si bisan kinsa, tungod kay si Moises usa ka hawod nga tawo, maalamon nga tawo. Oh, usa siya ka gamhanan nga tawo.

¹⁵² Sa panghunahuna ni Cecil DeMille mahitungod niini, sa diha—sa dihang gihimoan niya og pelikula ang *The Ten Commandments*, ug kadtong lalaki nga gipili niya nga... Nalimtan ko na ang ngalan sa lalaki nga mibuhay sa papel ni Moises sa maong salida, usa ka artista, usa ka daku kaayong lalaki nga may dagkung mga bukton ug kusgan. Ug tingali’g ingon niadto gayud nga matang sa lalaki si Moises.

¹⁵³ Nasayod kita nga kusgan siya ug binansay og ayo, busa giangkong niya sa iyang kaugalingon kadto nga katungdanan, tungod iyang nakita ang panginahanglanon sa maong adlaw. (Oh, hinaut nga mapatuhop gyud kini sa Dios!) Tungod nga nakita niya ang panginahanglanon sa maong adlaw kaniadto, si Moises tungod sa iyang intelektuwal nga gahum ug sa iyang abilidad nga mahimo niyang gamiton... Usa siya ka maalamon nga tawo. Siya mao ang mosunod nga Faraon. Aduna siya og sikolohiya. Aduna siya’y—aduna siya’y kagahum. Aduna siya’y pisikal nga kusog. Anaa kaniya—anaa na kaniya ang tanan. Busa miingon siya, “Ako ang adunay igong kasangkapan. Kahibalo ako niining tanan. Ug kung aduna ma’y tawo sa yuta nga makahimo niini, ako kana. Busa, ako mao ang tawo para sa niining takna busa ako ang magabuhay niini.” Ug milakaw

siya aron buhaton ang usa ka buluhaton nga husto ug anaa sa kabubut-on sa Dios, ug gitanyag niya ang iyang natural nga mga abilidad. Ug gisalikway kadto sa Dios! Dili gayud Niya magamit ang bisan usa ka butang nga aduna si Moises kaniadto.

¹⁵⁴ Dili Niya kini magamit kaniadto, ni Iyang . . .dili usab Niya kini magamit sa karon. Dili magamit sa Dios ang atong natural nga mga abilidad. Kinahanglan gyud natong ipadaplin ang mga kaugalingon nato ug ang atong mga abilidad, ug magsurender sa kabubut-on ug gahum sa Dios.

¹⁵⁵ Moingon kamo, “Bueno, igsoon, mahimo ko man ang pagwali.”Dili Niya kana magamit samtang mahimo *mong* mowali. “Okey lang kana, mahimo kong buhaton *kini*, mahimo kong buhaton *kana*.” Wala ka gayu’y mahimo. Bueno, kung ingon-ana dili ka gayud magamit sa Dios. Apan kung itugyan mo ang imong kaugalingon ngadto sa Dios ug pasagdan Siya nga mohimo niini!

¹⁵⁶ Moingon ka, “Bueno, Igsoong Branham, kahibalo ko. Usa ako ka magtutudlo.” Bueno, samtang *ikaw* mao ang magtutudlo, aba, dili gyud Siya molampus. Apan ang Balaang Espiritu mao ang atong Magtutudlo. Sigurado, Mao gyud! Gipadala sa Dios ang Balaang Espiritu aron mamahimong Magtutudlo sa Iglesia.

¹⁵⁷ Daghang mga tawo ang nagaadto sa eskwelahan sulod sa mga katuigan ug mga katuigan ug mga katuigan. Unsa ma’y ginahimo nila? Nagabasa og mga artikulo gikan sa Upper Room, ug (oh, maayo man kana) pagatun-an ang maong leksyon sa National Sunday school. Wala ko’y unsa man nga batok niana. Pulong kana sa Dios, ug mga ingon-niana, apan gisagolan kana og mga intelektuwal! Kinahanglan unta nga nagagikan kana sa gahum ug sa pagkabanhaw ni Cristo, ug dili kamo makasalig sa inyong natural nga mga abilidad.

¹⁵⁸ Busa, si Moises, kining batan-on, kusgan og dakung, intelektuwal nga tawo, misugod siya pagbuhat og usa ka maayong buluhaton; apan ang Dios, bug-os gayud kadto nga dili magamit. Dili gyud magamit sa Dios ang iyang natural nga mga abilidad.

¹⁵⁹ Ug dili pud nato mahimong . . .Bisan sa karon, dili nato mahimong . . .Dili gayud magamit sa Dios ang atong natural nga mga abilidad.

¹⁶⁰ Apan adunay usa ka butang nga aduna si Moises kaniadto nga akong gidayeg, aduna siya’y igong kahibalo aron hibaloon nga napakyas siya. Wala kita’y ingon niana. Kana lang. “Maghimo kita og usa ka *bag-ong* denominasyon. Mokuha kita og uban pa nga adunay gasa sa pagpang-ayo, o ingon-ana,” ang mga Pentecostal, nakita n’yo. Kita n’yo? Kita—wala kita’y igong kahibalo aron maamgo nato nga napakyas kita. Ang iglesiang Pentecostal, ang Assemblies of God, ang United, ang uban pa kanila, daw sa mora og wala sila’y kahanas aron

hibaloon nga napakyas sila. Alleluyah! Oh, unta ako gyud kining maipatuhop. Napakyas sila. Napakyas gayud ang organisasyong iglesia! Sama lang sa niining Estados Unidos nga napakyas, nagapangurog ug nagakahadlok, ug nakapuntirya na ang mga bomba dinha para kanila, kahibalo sila nga napahilayo na sila ug gibalhog na ang ilang kinabuhi ngadto sa impiyerno. Ug napakyas sila, mihawa na kanila ang Espiritu. Kinahanglan mo pang liboton ang mga kakahoyan aron makakuha ka og mga batan-ong lalaki para sa kasundalohan; nakita nila kung unsa’y nahitabo niadtong mga nauna. Napakyas kita! Napakyas ang iglesia. Nakahibalo sila niana.

¹⁶¹ Naamgo kadto ni Moises, dayon nagkaaduna siya og igong kahibalo pagkahuman nga...Gidala siya sa Dios sa luyo, sa kamingawan, aron pakat-onon siya og pipila ka mga kaluyahon sa tawo. Gidala Niya siya didto aron pakat-onon siya mahitungod sa kung unsa kadto. Nakakat-on gayud siya og ayo! Oh, grabe, nakakat-on gayud siya og leksyon! Tingali’g nagkaaduna gyud og panahon ang Dios para kaniya didto! Kahibalo mo, adunay kainit og ulo si Moises; ug gihatagan siya sa Dios og asawa nga ginganlan og Sephora, aduna siya’y kainit og ulo, usab. Busa mahunahuna ko nga dili ingon niadtong ka maanindot ang tanan didto sa luyong bahin sa kamingawan sulod sa hamubong panahon, sa diha nga dungan silang duha nga dili makapugong sa kainit sa ilang ulo.

¹⁶² Sa hunahuna ko nga walay nahatag nga kaayohan ang iyang intelektuwal nga panghunahuna kung unsaon angay’ng pagakontrolon sa sikolohiya ang usa ka tawo, tungod kay, niadtong atua siya sa iyang dalan paingon sa Egipto, nakita ko nga aduna pa’y kainit og ulo si Sephora. Giputol niya ang sobra nga panit sa kinatawo sa iyang anak nga lalaki ug giitsa kadto sa atubangan ni Moises, miingon, “Ikaw mao ang usa ko ka bana sa dugo.”

¹⁶³ Ug nasuko kaayo ang Dios kang Moises nga Iyang... gipangita siya hangtud sa katapusan, nga kung Iya pa untang nakaplagan siya gipatay na Niya unta siya. Siguro aduna pa’y gagmay’ng mga butang nga gikinahanglan itudlo kaniya sa Dios didto, kita n’yo, nga usa siya ka tawo. Ang tanan niyang kaalam sa Egipto ug ang tanan niyang intelektuwal nga gahum, dili gayud magamit sa Dios ang usa man niini.

¹⁶⁴ Tingali og moduol ka, moingon, “Karon, Ginoo, nag-eskwela man ako sulod sa kuwarenta ka tuig, usa ako—usa ako ka maalam nga estudyante. Mahimo kong mokutlo niana nga Biblia nga nakapiyong ang akong mga mata.” Ni gamay niana dili gyud magamit sa Dios. Kita n’yo? Dili.

¹⁶⁵ “Oh, miyembro ako sa pinakadakung iglesia nga aduna niining nasud. Ako—ako ang...Ako’y *ingon-niini*, Ginoo. Oh, usa ako ka Pentecostal. Ako...Himaya sa Dios! Bag-ohay

ko lang nadawat ang Espiritu Santo niadtong miaging gabii. Alleluyah! Mahimo mo nang ipabuhat kanako ang *ingon-niini-ug-ingon-niana*.” Dili gayud magamit sa Dios ang bisan usa ka tipik niana. Dili!

¹⁶⁶ Sa dihang nagakapakyas ka ug naamgo mo nga napakyas ka, ug kung ingon-ana bumalik ka ug ipaubos ang imong kaugalingon. Magmahuyang ka, hibaloa nga usa ka lang ka tawo. Ug walay mahimo ang bisan unsa nimo nga mga intelektuwal aron... Dili gayud magamit sa Dios ang mga kaluyahon sa tawo; tungod sa mga tawhanong kaluyahon ginabubo sa Dios ang Iyang Kaugalingon nganha kanimo, dayon gamiton Niya ang Iyang Kaugalingon Mismo. Himoon ka nga usa ka instrumento. Sigurado! Kinahanglan nga maipadaplin mo ang imong kaugalingon.

¹⁶⁷ Si Moises, oh, nakakat-on siya, nakakat-on gyud siya og ayo bahin sa tawhanong mga kaluyahon. Nakat-onan gyud niya kadto og ayo, hangtud nga, sa dihang gitawag na siya sa Dios, aduna siya’y pito ka mga kaluyahon nga gihimo niyang mga pasumangil batok sa pagtawag sa Dios. Inyo na bang natunan diha sa una nga bahin sa Exodo, ang maong pito ka mga kaluyahon? Ako—akong nahisulat ang mga niini dinhi. Gusto kong paminawon ninyo kini. Ang unang kaluyahon niya mao ang kakulang og mensahe. Ang ikaduhang kaluyahon niya mao ang kakulang og kagahum. Ang ikatulong kaluyahon niya mao ang kakulang og kalarino sa pagpanulti. Ang ikaupat maoy makaangay ba siya. Ang ikalima maoy molampus ba siya. Ug ang ikaunom maoy dawaton ba siya.

¹⁶⁸ Karon, ikumpara ninyo ang inyong kaugalingon kaniya ug tan-awa kung ingon-ana ba usab kamo, tan-awa kung mamahimo ba kamong mas mahuyang pa kay niana. “Ginoo, ako—wala gyud ko. Dili ako maayong manulti. Ako—ako—nakapatay ako og usa ka Egiptohanon. Dili na ko makabalik didto. Oh, tanan na! Dili gyud ko nila dawaton. Wala ako’y mensahe. Aduna ko’y... Dili ako maayong manulti. Ug ako—mahinay ako magsulti.” Ug kita n’yo na kung unsa siya? Wala siya’y kapuslanan! Igsoon, giayo siya. Oo, gigamit siya sa Dios pagkahuman nga giayo siya. Kita n’yo? Oo.

¹⁶⁹ Oo, mahimo na Niya kitang gamiton human nga kita giayo na, ang masayran nga “Ang akong Ph.D. ug LL.D. ug dobling L.D.,” o unsa pa man kana, “ang tanan kong mga digri wala gayu’y kapuslanan.” Dili gyud magamit sa Dios ang mga niini!

¹⁷⁰ “Bueno, usa ako ka Assembly of God. Usa ako ka Oneness. Usa ako ka Baptist. Usa ako ka Presbyterian.” Dili gayud magamit sa Dios ni ang usa ka tipik niana! Sa gilayon magpalayo mo gikan niana, bueno, mas dali mong—mong—mong maitugyan ang imong kaugalingon nganha sa Dios.

171 Sama sa propeta kaniadto, nga miingon, “Usa ako ka tawo nga mahugaw og mga ngabil, ug anaa sa taliwala sa mahugaw nga mga tawo.” Ug miadto ang Anghel ug mikuha og—og mga kumpit, ug miadto sa altar ug nagkuha og baga sa kalayo ug gihikap ang iyang mga ngabil. Dayon misinggit ang maong propeta, “Ginoo, ania ako; paadtoa ako.” Oo, pagkahuman nga naamgo niya nga siya. . . . Bisan ingon nga usa ka propeta, aduna siya’y mahugaw nga mga ngabil.

172 Sa diha nga maamgo nato nga kita—wala kita’y kapuslanan, nga wala ka’y kapuslanan, nga abog ka lang sa yuta. . . . Nga dili ka mahimong magamit sa Dios. . . . Oo, ang imong kasinati. . . . Ang tanan mong mga kaluyahon dili gyu’y maikumpara kang Moises. Aduna siya og unom ka nagkalainlaing mga kaluyahon, ug nakat-onan gyud niya ang bahin sa tawhanong mga kaluyahon.

173 Karon tan-awa ninyo ang kalahian tali sa *nianang* Moises nga nahinagbo ang Dios, ug *nianang Moises* nga nagalantaw sa. . . ?. . . sama sa karon. Miingon, “Pananglitan, kinahanglan nato og *ingon-niini-ug-ingon-niana!* Kinahanglan nato og usa ka rebaybal niining lugara. Sultihan ko kamo kung unsa’y akong pagabuhaton, mobalik ako ug moeskwela hangtud nga makuha ko ang akong Bachelor of Art. Uh-huh! Mobalik ako ug moeskwela hangtud maordenahan ako ingon nga usa ka LL.D. Magatuon ako og literatura. Pagabuhaton ko ang tanan niini, dayon mogawas ko ug mamahimo na ako nga ‘ang pinakamahinungdanong tawo sa maong takna.’ Pagalabwan ko ang tanan niining mga lalaki nga nanag-una na kanako.” (Oh, igsoon!) “Magapatukod ako og tulo-ka-milyong-dolyares nga bilding para kanako. Palitan ko ang akong kaugalingon og usa ka dosena ka mga cadillac. Ug. . . .” Oh, igsoon! Mas maayo—mas maayo pa tingali nga ayaw na lang sugdi, tungod kay napakyas ka na sa sugod pa lang, nakita n’yo. Apan ang problema niini mao’y wala gayud sila mahibalo niini!

174 Nagdahum sila nga kinahanglan aduna ka’y kulot nga buhok ug nagsul-ob og terno nga amerikana ug moingon “ah-man” og pagkamaanindot kaayo, ug ang tanan na nga sama niana, ug mamahimong usa ka prinsipe. Usa kang pahoy sa babaye!

Ang gusto sa Dios mao’y mga kalalaken-an, diosnon nga mga kalalaken-an, mga kalalaken-an nga makapangtay-og!

175 Apan karon ang gusto nato mao ang Hollywood. Gusto nato og butang nga—nga madanihon sa mata. Gusto nato og intelektuwal kaayong manulti nga mahimo niya kitang mapatulog og lima ka minutos samtang siya. . . . sa Domingo sa buntag.

176 Ang gusto sa Dios kadtong mga tigpabulag nga ginahatud kini og sama sa siga sa kilat, nga ginakondena ang sala hangtud sa pinakaugat niini, (husto kana) nga ginaibot kini.

177 Apan kita . . . Ang gusto mao ang atong intelektuwal nga mga pastor. Ang gusto sa kadaghanan sa mga tawo mao'y usa ka nagahunhong nga pastor, usa ka tawong moingon, "Oo, pinangga."

Ang gusto sa Dios mao'y kadtong mga nagapangliti! Oo, sir.

178 Pikipik-pikipikon lang sila sa likod, silang mugbo ang mga buhok ug nakameyk-ap pa, ug tanan nang uban pa, ug nagasul-ob og mga bisti nga gikahiligan na gyud nila, ug tanan na nga sama niana, ug wala man lang may ginasulti mahitungod niana.

179 Adunay usa ka iladong lalaki ang nagpatawag kanako sa iyang opisina dinhi, (dili sa iyang opisina) kondili sa iyang pang-misyon nga opisina, dinhi medyo dili pa lang dugay, miingon, "Gusto kong pandungan ka og mga kamot aron imo na kanang ihunong!"

Ingon ko, "Ayaw kana buhata. Ayaw gyud kana buhata. Ayaw, sir."

180 Kung ipahunong mo kana, ginapahunong mo usab ang Mensahe. Ginapahunong mo ang Dios kung imo kanang buhaton. Oo, sir. Dili kita gusto og ingon-ana.

181 Naluoy ba ang Dios kang Moises tungod sa tanan niyang mga kaluyahon, og miingon, "Makaluluoy'ng Moises, grabe—grabe gyud ang nahitabo kanimo, wala mo napuslan ang imong digri. Oh, grabe! Ngani, oo, usa lage ikaw ka bantugan nga tawo kaniadto, usa ka intelektuwal, ug wala gyu'y unsa man ang makapahunong kanimo. Igsoon, anaa na sa imo ang Ph.D. ug LL.D., ug tanan-tanan na, ug karon ania ka nga nagapahayag nga wala ka'y kapuslanan, nga wala ka ni usa ka butang nga mahimong buhaton. Ikaw—Huyang man kaayo ka"? Wala! Wala naluoy ang Dios kaniya. Wala gayud naluoy ang Dios kaniya. Giayo lang siya sa Dios sa tanan niadtong mga butang. Wala Siya naluoy kaniya.

182 Apan nahibaloan nato, kung ginasulat ninyo kini, Exodo 4:14, "Nasuko ang Dios kaniya." Wala naluoy ang Dios kaniya tungod nga mahuyang siya.

183 Moingon kamo, "Oh Ginoo, dili gayud maayo ang akong gibati, sa hunahuna ko nga dili ako makabuhat niana." Dili maluoy ang Dios kanimo; medyo mas sipaon ka pa Niya hinoon. Kita n'yo? Kita n'yo? Oo. Dili maluoy ang Dios kanimo; Siya—masuko pa Siya hinoon kanimo. Ginaandam ka lang Niya aron magamit ka Niya. Oo.

184 Sa giayo na si Moises, mahimo na siyang gamiton sa Dios. Naangkon na niya ang kaayohan, napahilayo na siya sa iyang mga tawhanong abilidad. Wala na siya'y unsa man nga mahimo pa niyang saligan, tungod kay siya—andam na siya niadtong tungora sa pagpangalagad.

185 Miingon ang Dios, “Kuwarenta na ka tuig Ko kamong ginatan-aw ni Sephora nga nagalalisay ug kung unsa na lang ang ginabuhay n’yo dinhi sa kamingawan, kung maamgo mo kaha nga aduna ka’y tawhanong kaluyahon o wala, nga diin kaniadto nagatindog ka didto ingon nga usa ka prinsipe, ‘Kumusta, Doktor Moises. Maayong buntag, Reverend, Sir. Oo, sir. Moises, ikaw na ang maoy mosunod nga prinsipe. Ang tanan. . . Nagahunahuna kaming tanan para nimo.’ Karon ania ka dinhi sa kamingawan kauban niining pundok sa mga karnero ug ang usa ka asawa nga mainiton kaayo ang ulo.” Kita n’yo? Gipahimutang siya sa niadtong kahimtang. Oo, sir. Si Moises nga atua sa ingon niadto kalisud nga kahimtang, apan miingon Siya, “Karon magamit Ko na ikaw, sa dihang naamgo mo na nga wala ka’y kapuslanan. Karon duol ngari tupad niining nagadilaab nga kahoy’ng talongon, gusto kong sugoon ikaw didtong dapita.” Oh, grabe!

186 Dios, hatagi kami og dugang pa nga sama niana, hatagi kami og dugang pa nga mga tawong mahuyang. Ingon niana ang mga gikinahanglan nato, mga tawong mahuyang. Sigurado!

187 Si Jacob kaniadto, kahibalo na mo. Nagdahum si Jacob kaniadto nga usa siya ka maayo kaayo nga lalaki, kabalo mo, mahimo niyang manglimbong ug malusotan ang bisang unsa mang butang. Miadto siya ug nagbutang og mga sanga sa alamo kung diin atua kadtong mga buros nga karnero ug mga baka sa iyang ugatang lalaki, ug aron nga himoon niyang kabang ang mga ipanganak nga karnero, ug pisik-pisikan kini nga sama niana pagmangduol kini sa tubig aron moinum. Ug, mahibaloan mo na lang, nahimong bahandianong tawo si Jacob. Oo. Usa siya ka. . . “Ginganlan siya og *Jacob*, mao gyud diay,” miingon si Esau, “mao gyud kay siya ma’y ‘mangingilog.’” Busa usa siya ka manglilimbong. Nagpadayon siya kaniadto nga maayo nga ingon niana, nagmalamboon, nakaangkon og dakung panon sa mga baka ug mga asawa ug mga karnero ug mga baka ug mga kabakahan, ug—ug tanan na, anaa na kaniya ang tanan.

188 Apan usa niana ka gabii (oh, grabe!) sa diha nga miadto siya sa usa ka gamay’ng sapa, motabok na unta siya, miabot siya sa usa ka dapit nga adunay usa ka Anghel ang migunit kaniya. Igsoon, tibuok gabii nga nakiggunit ang luoy’ng si Jacob. Hataas nga oras siyang migunit. Apan sa dihang gisurender na niya ang iyang kaugalingon, sa dihang naluya siya ug dili na ka makagunit pa. . .

189 Oh Dios, itugot nga moabot usab sa ingon niana ang iglesia, moabot sa. . . moabot ang iglesia sa usa ka punto kung diin dili na mahimo niini nga manggunit pa og dugay sa natural nga mga abilidad niini, kondili mosurender gyud sa Dios. Itugot nga maulaw ang Methodist sa mga kaugalingon nila nga sila’y mga Methodist. Itugot ang mga Baptist ug itugot ang mga Pentecostal

nga maulaw sa mga kaugalingon nila, ug mohunong na sa pagpanggunit, ug magpasakop na sa Espiritu.

¹⁹⁰ Mao na kadto dayon nga si Jacob nahimong “usa ka prinsiphe sa Dios.” Ang Biblia miingon nga nahimo siya nga “usa ka prinsiphe,” ug giusab na ang iyang ngalan. Kita n’yo? Ug—ug, hinumdumi, usa siya ka bantugan og kusgan nga lalaki sa niini *nga* bahin, gamhanan sa intelektuwal; apan sa *pikas* nga bahin usa siya ka piang nga prinsiphe, mahuyang ug wala na’y kusog, apan nagkaaduna og gahum sa atubangan sa Dios.

¹⁹¹ Oo, tingali’g inyong. . . Mahimong mabungkag ang inyong organisasyon. Ang maayong tan-aw sa imong mga kasilinganan, mahimo kang “usa na lang ka kinaraan nga uwak” sugod niana, diha sa imong mga kasilinganan. Mahimong husto kana. Apan sultihan ko ikaw, magkaaduna ka og gahum sa Dios. Mas gustohon ko pa nga mahimong ingon-ana. Pirmi kong pilion kanang dalana.

¹⁹² Mibalik ang mga tinun-an kaniadto ug malipayon tungod kay nangalipay sila nga giisip sila nga ingon nga takus sa pagpas-an sa kaulawan tungod sa Katuyoan ug tungod ni Jesus. Oo! Pagatawgon nila kamo og “holy-roller.”

¹⁹³ Gumula kamo nianang dapita usa ka higayon, pasagdi kini nga mabungkag. Pangbuhii na kanang inyong, “Bueno, moingon, usa ako ka Methodist,” o “Presbyterian” o “ako’y Assemblies,” “ako’y Oneness, sama ra ako ka buutan nimo.” Sige. Gumula lang kamo gikan niana usa ka higayon, pangbuhii kana. Kuhaa ang tanang. . .

¹⁹⁴ Tugoting magunitan kamo sa anghel usa ka higayon, sa anghel sa Ginoo nga mao’y magadala kaninyo sa Kamatuoran sa Mensahe. Tugoting magunitan niya kamo sa usa ka higayon, og mopaubos gyud kamo sa bautismo sa Ngalan ni Jesus, mopaubos gyud kamo ngadto sa tanang uban pa Niini. Oo, mopaubos gyud mo, sigurado gyud. Oo, inyong—hikalimtan na ninyo ang tanan niining mga pagka-intelektuwal.

¹⁹⁵ Niadtong miaging pipila ka adlaw, ang usa sa mga pinakabuutan kong higala, usa ka maayo kaayong tawo, miingon kanako, sa paghawa na nako sa maong lawak pagkahuman ko nga nagkaaduna og usa ka pagpakighinabi, sa paghawa ko sa maong lawak, miingon, “Igsoong Branham. . .” Ug kini nga tawo usa sa akong pinansyal nga nagasuporta sa mga panagtigum didto. Pagmoabot ako sa punto kung diin wala na ko kahibalo kung unsaon ko sa pagpahigayon sa maong buluhaton, ginasalig ko lamang sa Dios; kini nga tawo maoy moabaga niadtong tanan. Oo, usa gayud ka buutan nga tawo! Ug mibiyahe kini nga tawo ug gikan pa sa usa ka dakung siyudad, ania siya niadtong pipila na ka gabii ang milabay, ug mitindog siya sa maong lawak ug miingon kanako usa niana ka gabii, miingon, “Igsoong Branham,” miingon, “Gusto ko lang isulti ang usa ka butang.”

Miingon, “Wala pa ko’y nailhan nga tawo nga wala nagahigugma kanimo.”

Ingon ko, “Nalipay kaayo ko niana.”

¹⁹⁶ Miingon, “Igsoong Branham, aduna gyu’y usa lang ka butang, usa ka problema.”

Ingon ko, “Unsa man kana, igsoong babaye?”

¹⁹⁷ Miingon, “Bueno, ingon niini man gud, Igsoong Branham, nga kung mahimo mo lang unta nga mopakig-kompromiso og diyutay sa nianang Doktrina nga aduna ka,” ingon pa, “dawaton ka sa tanang organisasyon.”

¹⁹⁸ Nasabtan ko dayon, naghunahuna ko. . . Ingon ko, “Unsa nga Doktrina, igsoon?”

Ug miingon, “Oh, kanang bautismo sa Ngalan ni Jesus.”

¹⁹⁹ “Oh!” Ingon ko, “Apan, igsoon, dili ka makasalig kanako nga mopakig-kompromiso sa Pulong sa Dios ug sa gihapon mamahimong alagad sa Dios.”

²⁰⁰ Ug miingon, “Bueno, ingon-ani, adunay grupo sa mga ministro nga gikan niining dakung siyudad nga akong ginarepresentar.” Ingon pa, “Kung sultihan mo sila nga ang Manulonda sa Ginoo nga nagahatag kanimo niini nga mga panan-awon ang mao’y nagsulti kanimo nga magbautismo sa Ngalan ni Jesus, kung ingon-ana andam sila nga modawat Niini.”

²⁰¹ “Bueno,” ingon ko, “mas lubog pa diay sa hinugasan og plato ang kasinatian nila!” Ingon ko, “Dili ko igsapayan kung unsa ma’y isulti sa bisan unsa nga manulonda, kung dili kini sumala sa Pulong nan dili ko motoo niana!” Ingon ko, “Kung kana nga manulonda mosulti kanako og butang nga lahi Niana, dili ako motoo niana nga manulonda.” Husto! Kinahanglan una gyud ang Pulong sa Dios, mas labaw pa sa tanang mga manulonda ug tanang uban pa! Ang tinuod nga Manulonda. . . Ingon ko, “Kung dili Kana mao’y gisulti kanako sa manulonda, nan dili ko maminaw kaniya.” Oo.

²⁰² Wala kahibalo ang maong babaye kung unsa’y buhaton niya. Miingon siya, “Wala pa gayud ako nakadungog og ingon-ana. Wala gyud ako mahibalo Niini.” Kita n’yo, tan-awa. Busa gihatagan ko og pipila ka Kasulatan ang maong babaye. Ug ingon siya, “Mouli na ko diretso sa balay ug pagatun-an ang Bag-ong Kasulatan. Wala ko pa gyud Kini matun-i.” Kita n’yo, tan-awa. Oh, grabe! Oh, grabe! Mao kana ang inyong sangpotan. Oh, grabe!

²⁰³ Hunong na mo sa pagpaningkamot nga manghawid. Pangbuhi na mo! Ingon niana ang angay ninyong tinguhaon nga buhaton: ang mobuhi. Si Jacob, niadtong mibuhi siya maayo na siya, nahimo siyang usa ka prinsipe ug nagkaaduna og gahum sa Dios.

204 Si David kaniadto nga nahimong *gamay'ng* David sa dihang gisul-ob niya ang pang-simbahang hinagiban ni Saulo, sa dihang miadto siya aron sa—sa—sa pagpakig-away kang Goliath. Ug sa nagpadulong na si David didto aron sa pagpakig-away kang Goliath nga ginasul-ob sul-ob kadtong dagkung mga hinagiban, mitan-aw siya sa palibot ug milingi siya, pareho na siya sa uban pa kanila didto, busa miingon siya, “Aduna gyu’y butang nga sayup dinhi.”

205 Samtang nga awat-awat ka sa kalibutan ug nagapakig-kompromiso sa kalibutan, ug ginabuhat usab ang mao rang butang nga ginabuhat sa kalibutan, aduna gyu’y butang nga sayup.

206 Miingon si David, “Medyo sobra ra ko ka lig-on niini. Aduna pa ko’y Digri sa pagka-Doktor, aduna pa’y Ph.D. Kita n’yo, miyembro pa gyud ko sa dakung organisasyon, unsaon ko man pag-adto didto aron sa pagpakig-away gamit ang tanan niining mga butang? Wala man ko’y bisan unsa man nga nahibaloan niini. Wala gyud ko’y kasayuran sa paggamit niini!” Miingon si David, “Tangtanga kini nga mga butang kanako.” Husto kana. “Kung mopagkig-away man ako alang sa Dios dili ko gusto nga mahisamang tan-awon niining pundok sa mga talawan nga nagatindog lang dinha, nga puno sa hinagiban ug daghang ginabitbit. Dili ako makapahigayon og panagtigum nga . . .”

207 Daghang panagtigum, daghang tawo, daghang mga ministro ang nagaduol kanako ug nagapahayag nga nagatoo sila nga sa Ngalan ni Jesus Cristo mao’y husto nga bautismo, apan moingon “Palagpoton man kami sa among organisasyon.” Makauulaw kamo! Tangtanga ninyo ang hinagiban ni Saul!

208 Ihatag kanako ang gahum ug kusog sa Balaang Espiritu! Dios, paadtoa ako nga dala ang lamboyog, bisan unsa pa kini (unsa man kini ka gamay), mapildi gyud ang kaaway. Tinuod kana. Paadtoa ako, apan ayaw ako tugoti nga magsul-ob usab sama sa uban pa kanila nga sul-ob niining L.L., Ph.D., pagka-Doktor, nianang tanang matang sa mga butang.

209 Miingon si David, “Mora og dili husto ang maong butang.” Ingon siya, “Wala ako’y kasayuran bahin niana.” Ingon siya, “Ang butang lang nga nahibaloan ko, nga nagkaaduna ako niadto og akong. . . Didto sa luyong bahin sa kamingawan sa diha nga akong ginabantayan ang mga karnero sa akong amahan.” Ug miingon, “Dihay miabot nga usa ka leon ug gisakmit ang gamay’ng karnero ug mikalagiw kadto, ug kabalo ko nga karnero kadto sa akong amahan, ug, oh, ako—ako—ako’y. . . Wala ako’y hinagiban, apan gikuha ko lang ang akong lamboyog ug gigukod siya.” Ingon pa, “Gipatay ko siya ug gidala og balik ang maong karnero.” Oh, grabe! Kung sila ang atua didto, bisan pa’y bangkaw ang dala nila, dili gayud nila mahimo kadto.

²¹⁰ Mao kana ang problema sa karon. Adunay daghan kaayong nangahisalaag nga karnero sa Dios, gipangtaban sila sa mga organisasyon ug mga sama niana, gipangdala sila ngadto sa sikolohiya. Hinaut nga hatagan kita sa Dios og mga David nga dala ang Pulong sa Dios ug gahum sa Dios, nga mogiya kanato pagmoadto na kita aron tagboon kining intelektuwal nga mga higante (hunahunaa lang ninyo, sila nga aduna niining tanan nga mga Ph., LL.D., Q.U.S.T., o unsa pa man kini). Ihatag kanako ang Pulong sa Dios ug ang gahum sa Balaang Espiritu ug, sultihan ko kamo, mahimo natong patyon ang matag higante diha sa natad sa panggubatan. Husto! Nagkinahanglan kita og mga kalalaken-an nga makahimo . . .

²¹¹ Aba, si David unta kaniadto ang maoy pinakamakaluluoy didto sa maong natad sa panggubatan, nga miduol didto aron makig-away sa maong higante. Siya'y, aba, siya'y usa lamang ka batang lalaki. Ug miingon ang Biblia nga siya'y "mapulapula," usa ka gamay'ng niwang nga bata, tingali'g bakoon ang abaga, nagsul-ob og panit sa karnero. Wala siya'y ingon niining dagkung intelektuwal nga mga digri ug maayong pagbansay. Wala siya'y hibangkaagan bahin sa espada. Wala siya'y hibangkaagan bahin sa tanan niining pagbansay nga iya ni Saul. . .

²¹² Si Saul mao na ang pinakamaayo nga nagkaaduna sila kaniadto, si Obispong Saul. Sigurado gayud, siya mao ang pinakalabaw sa tanang uban pa nga mga kasundalohan. Aba, siya—siya unta ang angay'ng miadto didto ug nagpakig-away kang Goliath, apan nahadlok siya.

²¹³ Ug karon nahibalo kita nga nagkinahanglan kita og usa ka rebaybal. Nahibalo kita nga nagkinahanglan kita og usa ka pagpukaw sa taliwala sa mga tawo. Ug dili kini magkinahanglan og usa ka Doktor sa Divinidad. Nagkinahanglan kini og usa ka tawong mahuyang (Alleluyah) nga magadala sa Pulong sa Dios diha sa gahum sa pagkabanhaw ni Cristo ug patyon ang maong butang. Dalhon niini si Cristo sa tibuok nasud nga . . . ipakita kanila nga Siya sa gihapon makahimo pa sa pagpabuka sa mga mata sa mga buta, makapag-ayo sa mga masakiton, makapabangon sa mga patay, ug nga Siya'y Dios, Mananaug! Amen. Nagkinahanglan kita og usa ka David, nga dili-binansay sa pang-teolohiyang mga eskwelahan, nagkinahanglan kita og tawong walay hibangkaagan bahin niana, usa ka luoy'ng batang lalaki nga magdadaro o ingon-niana, usa ka hoyhoyon og abaga nga batang lalaki, dili maayo kaayo og hitsura, nga moabot og nagalakaw diha sa dalan nga aduna og gahum sa Dios.

²¹⁴ Sa naghimalatyon na kaniadto ang akong inahan, miingon siya, "Billy, misalig ako ug mitoo kanimo. Ikaw ang nahimo kong espirituhanong kusog, imo gyud akong gigiyahan paingon sa Dios."

²¹⁵ Ingon ko, “Mama, niadtong batan-on pa ako... Ang gigikanan nato, siyempre, ingon nga taga-Ireland, mao nga medyo Katoliko gayud.” Ug ingon ko, “Miingon ang iglesia nga—nga sila’y—sila’y usa kono ka kahugppongan sa mga tawo, nga anaa kanila ang tanan, nga ang tanan kono nilang gipangbuhat husto. Dili gyud ko makatoo niana, tungod kay miingon man ang mga Lutheran, ‘Usa kami ka dakung panon sa katawhan, ania kanamo ang tanan.’ Miingon pud ang mga Baptist, ‘Usa kami ka panon sa katawhan, ania kanamo ang tanan.’ Daghan kaayo kanila, adunay mga siyam ka gatus sa nagkalainlaing mga organisasyon.” Ingon ko, “Mama, dili ko mahimong ipahiluna ang akong pagsalig sa mga ingon-ana, kinsa man diay kanila ang husto?”

²¹⁶ Nahibaloan ko, og malolot ug mapainubsanon kong ginasulti kini, ug nagatoo ko nga wala gayu’y husto kanila. Husto kana. Gibalikan ko ang Pulong sa Dios, nakita ko kung unsa’y gibuhati Niini kaniadto didto. (Ug kung ingon-ana, Dios, tugoti kaming tanan nga mapanumbalik didto.) Ug tungod sa kahuyang, ug walay suporta sa organisasyon, walay suporta sa mga denominasyon, walay suporta sa pang-simbahan nga mga kapunongan, apan diha sa kayano lamang ug gahum sa Balaang Espiritu nga mikanaug sa Pentecostes, nga dala ang sama ra nga mensahe nga aduna si Pedro kaniadto sa Adlaw sa Pentecostes, “Paghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala.”

²¹⁷ Dili ka man mabansay nga sama sa pundok niining mga teologo, nga mga pinatindog ang kwelyo ug adunay mga digri sa Bachelor of Arts. Apan, igsoon, magkaaduna ka’y usa ka butang sa imong kamot, ug basta nga nagasulod lang ang Espiritu sa Dios niana nga Pulong pagadaugon Niini ug ipahibalik ang mga nangawala nga mga karnerong nahisalaag. Amen! Ipahayag lang gyud ang atong mga kaluyahon! Ipanglabay ang inyong Doktrina sa Divinidad! Ipanglabay ang inyong nahibaloko-sa-tanan-niini, ang inyong mga pagpamiyembro-miyembro! Panghukasa ang inyong kaugalingon diha sa atubangan sa Dios, sa espirituhanon nga pagkasulti, ug tawga ang inyong kaugalingong “dili-takus!” Kung ingon-ana mahimo na kamong gamiton sa Dios. Ayaw ninyo isulti kini nga gikan lang sa inyong baba, isulti kini nga gikan gyud sa inyong kasingkasing.

²¹⁸ Si Jacob, si David, gikinahanglan nila kaniadto nga panghukasan ang ilang kaugalingon. Ingon nga siya mao ang pinakamahuyang taliwala sa mga tawo.

²¹⁹ Hunahunaa ninyo kadtong, tingali, napulo ka libo o usa ka gatus ka libo nga mga sundalo didto sa bungtod. Binansay ang tanan kanila, ang matag usa kanila adunay Ph.D., ang matag usa kanila adunay mga bangkaw, sila gayu’y mga sundalo. Ang matag usa kanila’y Korporal *Ingon niini-ug-ingon niana*,

Private *Ingon niini-ug-ingon niana* (bisan ang mga Private), Heneral *Ingon niini-ug-ingon niana*, Tenyente *Ingon niini-ug-ingon niana*. “Bantugang may upat-ka-bitoon nga Heneral Saul, Obispo, oo, Halangdon, nga Lalaki!” Ang matag usa kanila nga atua didto, binansay gayud nga mga kalalaken-an.

²²⁰ Ug ang maong kaaway nga nagatindog didto ibabaw sa bungtod, nag-ingon, “Kamong grupo sa mga talawan.” Oh!

²²¹ Ug didto sa kampo miabot ang usa ka gamay’ng, bakoon ang mga abaga, (Oh Dios!), mapula-pula nga bata, nga may nakasab-it nga gamay’ng lamboyog sa iyang likod, bitbit ang usa ka raisin pie para sa iyang igsoon. Ug migawas kadtong higante ug nagsige’g singgit didto. Miingon ang maong bata, “Ang inyo bang ipasabot kanako nga kamong pundok sa binansay nga mga eskolar magatindog lang dinha ug tugotan kanang dili-tuli nga Filistihanon nga hagiton ang Pulong sa buhi nga Dios?” Amen! Ingon pa, “Nahadlok ba kamo kaniya?”

²²² Ang ingon ni Saul, “Kung gusto mong adtoan, anhi ka dinhi. Ako—ako—ipa-eskuwela ko ikaw sulod sa baynte ka tuig, ug pakuhaon ko ikaw og—og Ph.D. Sultihan ta ka sa kung unsay buhaton ko, ihatag ko kanimo kining akong digri.”

²²³ Ingon siya, “Hukasa kanang butang gikan kanako.” Oh, grabe! “Dili ko gustong magkaaduna og unsa man nga kahilambigitan niana.” Gusto niyang mosalig sa Dios. Ingon siya, “Nahibalo ako kung unsay gibuhay sa Dios para kanako pinaagi *niini*, ug andam akong mosalig sa Dios sa atubangan sa bisan unsa man pinaagi *niini*.” Amen! Ingon niana ang kasinatian sa usa ka Cristohanon.

²²⁴ Bisan si Saul, sa diha kinahanglan niyang hukason ang iyang hinagiban, gihubo niya ang maong eklesiastikal nga hinagiban, gihimo niya ang sama sa gihimo ni David. Apan sa diha nga nahibot na si Saul sa katapusan na sa iyang panaw, miingon siya, “Nakigbugno ako sa maayong pakigbugno.” Mao kadto ang ulahing kaaway nga kinahanglang buntugon. “Nakigbugno ako sa maayong pakigbugno, natapos ko ang akong paglumba, gibantayan ko ang Pagtoo. Sukad karon natagana na kanako ang purongpurong, nga igahatag kanako sa Ginoo, ang matarung nga Maghuhukom, nianang adlaw.” Miingon, “Dili lamang ako, kondili usab ang tanan nga nahigugma sa Iyang pagpadayag.”

²²⁵ Oh, miingon ang kamatayon, “Apan pagakuhaon ko na ikaw sulod sa pipila ka minutos.” Ug miingon ang lubnganan, “Pagadalhon ko na ikaw didto.”

²²⁶ Ang ingon niya, “Oh kamatayon, hain na ang imong ikot? Lubnganan, hain na ang imong pagdaug? Nahibalo ko nga nagbuy-od ako dinhi sa niining Romanhong bilanggoan, nga nagapus sa mga kadena, ang akong mga bukton ug mga kamot, ug ako—aduna ko’y trayntay-nuebe ka mga labod sa akong likod. Ania ako nga ginapaso sa luha ang akong mga mata hangtud

nga dili na ko makakita. Dili man ko makakita gamit ang natural kong mata, apan nakita ko ang usa ka purongpurong sa pagkamatarung nga natagana na didto. Nanghawoy na ang akong mga buolbuol. Ninghugo ako og ayo tungod sa dugay nang giamag nga mga tinapay nga ginalabay nila dinhi, ug nagapanagan ang mga ilaga sa ibabaw ko, ug mga damang ug tanan na, hangtud nga naluya na ko.” Apan nahimo niyang mobarug sa atubangan sa kamatayon ug moingon, “Hain na ang imong ikot? Lubnganan, hain na ang imong pagdaug?” nga nakalambod ang mga kadena sa iyang mga kamot. Alleluyah! (Ingon niana ang gikinahanglan nato.) “Lubnganan, hain na ang imong pagdaug?”

Miingon ang lubnganan, “Pagadunoton ko ikaw, Pablo.”

²²⁷ Ingon siya, “Apan salamat sa Dios, naangkon ko na ang kadaugan pinaagi sa atong Ginoong Jesus Cristo.”

²²⁸ Sa sa dihang luya na siya, ang iyang—iyang eklesiastikal, ang iyang. . . ang tanan niyang rituwal nangahanaw gikan kaniya. Ang tanan niyang mga papeles sa pagkaordena gikuha na gikan kaniya. Dili na siya sakop sa Assemblies, o sa. . . bisan kinsa pa man kanila. Kita n’yo, dili na siya sakop sa bisan kinsa pa man kanila. Gisaway niya sila og ayo hangtud nga kadtong mga obispo. . . miingon, “Ang imo bang ipasabot kanako nga ang usa ka lalaki nga nabalhog sulod sa baynte ka tuig sa Romanhong prisohan didto ug mahimo pa kaming sultihan nga dili mapahanugotan nga magwali ang among mga kababayenan? Huh! Ayaw kami sultih og ingon-niana,” ingon pa, “mas nakahibalo kami. Si kinsa ba kana nga lalaki, ha, nga mosulti kanamo nga buhaton *kini, kana o ang uban pa?*” Miingon, “Nahibalo kami sa kung unsay ginahimo namo.”

²²⁹ “Oo,” ang ingon ni Pablo, “adunay mga tawo nga manungha sa taliwala ninyo, nga magtukod og usa ka organisasyon sa dili madugay, managpanungha ug mopahilayo sa Pagtoo nga sama niana, nga mga walay Espiritu sa Dios.” Miingon, “Nanghawa sila gikan kanato tungod kay dili man sila ato.”

²³⁰ Ug, unsa, ma’y nahitabo? Miabot kini sa iglesiang Katoliko; gikan sa Katoliko paingon sa Lutheran; ug sunod-sunod na hangtud sa pinakaulahi niini, ang Assemblies of God, mao ra gihapon, ginahimo ang mao ra nga butang.

Ang tanan nga misunod, mao ra gyud gihapon!

²³¹ Apan, oh, sa usa ka lalaki o babaye nga mahuyang gayud, nga nasayod sa inyong kaluyahon, nga nagapagamit gayud sa Dios! Padayon ra ako makigsulti, siguro hataas na kaayo akong pagsulti.

²³² Karon, unsa man kadto? Karon, siya mao’y. . . Si David kaniadto mao ang pinakawalay-kahibalo sa grupo. Wala siya’y iniskwelahan bahin sa pagpakiggubat, wala siya’y kasayuran mahitungod niadto. Mao nga wala siya’y iniskwelahan niini

tungod kay wala ma'y ni usa sa niini nga pagpakiggubat ang gikatagana alang kaniya, apan naila niya kaniadto nga aduna gyu'y Dios. Ug gikuha niya ang pinakamahuyang nga butang; aduna sila'y mga bangkaw, mga hinagiban, mga pana, ug tanang uban pa, ug si David aduna lamang og usa ka gamay'ng lamboyog nga may usa ka bato niini. Apan, kita n'yo, nahibalo siya kung unsay angay niyang saligan. Gisugid niya ang iyang kaluyahon, apan ang iyang pagtoo diha gyud sa Dios.

²³³ Ingon niya, “Dili ko gusto nga adunay kalasag sa tibuok kong lawas aron tumbahon si kinsa man. Dili ko gusto nga mosulong didto, og moingon, ‘Karon, mahimo ba ninyo mga igsoon nga makigtimbayayong kanako? Miyembro ako sa Assemblies, miyembro ako sa Presbyterian, usa ako ka Methodist, usa ako ka Baptist, mahimo ba ninyo mga igsoon nga makigtimbayayong kanako?’ Dili ko gusto nga mahibalo sa ingon nianang mga butang. ‘Ania, ipakita ko kaninyo ang sulod sa akong bulsa, aduna ko'y digri. Bag-ohay ko lang nahuman ang akong Bachelor of Art. Migraduwar ako sa Unibersidad sa *Ingon niini-ug-ingon niana*, didto ako—ako nag-eskwela. Mikuha ko og ingon niini. Oh, maayo akong manulti! *Ingon niini* ako, *ingon niana*, o *uban pa*.” Dili niya gusto og ingon niana nga mga butang!

²³⁴ Ang gusto lang niya, ingon siya, “Aduna ako'y pagsalig sa Dios ug ania ako.” Mao na kadto. Ug natumba kadtong maong higante. Husto kana.

²³⁵ Ingon niana ang gikinahanglan nato karon, igsoon. Ang gikinahanglan nato, karon, mao'y mga kalalaken-an nga susama ni David, dili nga mga kasinatian sa unibersidad.

²³⁶ Si gamay'ng Micheas kadto, ang gamay'ng si Micheas, nga anak ni Imlah, kabus, sinalikway, gipalagpot sa tanang mga denominasyon tungod sa tinuod niya nga baruganan alang sa Dios. Apan adunay miabot nga usa ka tawo sa Dios usa niana ka higayon, didto, nga ginganlan og Josaphat, ug nag-ingon didto, “Gusto kong mahibaloan ang tinuod nga Pulong sa Dios.”

²³⁷ Miingon si Saul, “Aduna ko'y upat ka gatus nga pinakamaayo nga imong mailhan sukad.” Ingon pa, “Silang tanan adunay ilang mga digri, gibansay sila og ayo dinhi sa eskwelahan.” Miingon, “Aba, sila mao ang pinakamaayo nga mga magwawali nga imong madunggan sukad.” Miingon, “Dalhon ko sila dihadiha mismo ug among konsultahon ang Ginoo para kanimo.”

²³⁸ Apan miduol siya didto ug mitan-aw siya sa palibot, miingon si Josaphat, “Oo, nadungog ko na kining usa nga ginasulti ang *ingon niana*, ug nadungog ko na usab kanang usa nga ginasulti ang ingon niini, apan” miingon, “aduna ka pa ba'y usa? Wala ka na ba'y lain pa?”

239 Igahatud sa Dios ang usa ka mensahe sa nianang tinuod nga kasingkasing. May usa lamang kanila nga nagatindog dinha, apan aduna gyu'y usa ka tawo ang Dios alang nianang usa. Amen. Bisan aduna lamang og usa ka tinuod nga kasingkasing, aduna gyu'y tawo ang Dios sa kung asa man alang kaniya. Usa ka tinuod nga lalaki si Josaphat kaniadto, haring may kahadlok sa Dios, ug aduna siya'y igong pag-ila aron mahibaloan nga ang ilang mga mensahe sayup. Nasayod siyang supak kadto sa Pulong, amen (Oh, Igsoong Neville!), nasayod si Josaphat niadto.

240 Miingon siya, “Bueno, ako—ako nang gibuksan ang tibuok listahan, kining maong chart dinhi sa seminaryo, gipatawag ko na ang matag usa kanila dinhi.” Miingon, “Bueno, tan-awa ni, kining usa adunay. . .bueno, tan-awa ang nahuman niya nga mga digri. Tan-awa kining usa dinhi,” miingon, “tan-awa—tan-awa ang nahuman niya nga mga digri. Tan-awa kining si Zedechias, siya mao ang pangulo sa tanan niini. Aba, usa siya ka obispo, siya mao ang pinakalabaw sa tanan kanamo. Sigurado gayud nga imong toohan ang iyang pulong!”

Miingon si Josaphat, “Oo,” miingon, “Ako—ako—ako. . .”

241 “Bueno, tan-awa, tan-awa, miuyon kaniya ang tanang uban pa kanila. Usa gyud sila ka dakung grupo! Ug dili ka makaingon nga sila'y dili mga Hebreohanon. Dili ka makaingon nga sila'y dili mga propeta, ania kining digri nga magapamatuod kanila.”

242 Miingon si Josaphat, “Oo, ako—ako—nahibalo ako, Ahab.” Miingon, “Okey—okey ra kana, apan. . .”

243 Miingon, “Unsa pa ma'y imong. . . Unsa pa ma'y uban mong gikinahanglan? Anaa na kanang tibuok kong eskwelahan! Anaa na kanang gihiusa nga mga organisasyon.”

244 “Apan wala ka na ba'y usa dinha nga dili sakop sa niana nga grupo? Wala na ba'y usa, sa kung asa man?”

245 “Bueno, unsa ma'y anaa kaniya? Usa siya ka walay kahibalo nga dili edukado! Bueno, unsa ba'y gusto nimo sa usa ka tawo nga ingon niana?”

246 “Apan—apan ginapangutana ko lang ikaw, wala ka na ba'y usa pa, sa kung asa man?”

247 “Oh,” ingon niya, “oo, aduna ma'y usa nga ingon niana.” (Kana, oh, salamat sa Dios alang niana!) “Aduna ma'y usa nga ingon niana, apan” miingon “gikapungtan ko siya. Ug gikapungtan siya sa tanang uban pa kanila, usab.” Miingon, “Gipalagpot na namo, ug gipalagpot na nila siya pagawas sa niana nga organisasyon, ang matag usa kanila.” Miingon, “Mianhi siya dinhi aron magpahigayon og usa ka panagtigum, gipahawa namo siya pagawas sa lungsod. Oo, sir. Ayaw namong magkaaduna og unsa man nga kahilambigitan kaniya. Bueno,” ingon pa, “usa siya ka mahuyang, ug gikan siya sa usa ka kabus kaayo nga pamilya. Salikwaut kaayo ang iyang gramatika.” (Uh-

huh, sama ni Moody, kabalo na mo.) “Oo, salikwaut kaayo ang iyang gramatika.” Ug miingon, “Sa tinuod lang, para sa usa ka teologo, siya mao ang pinakaubos nga nadungog ko sukad-sukad. Wala pa gyud ko nakadungog og bisan unsa man nga sama niya. Oh, ginaguba gayud niya ang ilang rituwal. Aba, giwatas-watas niya ang ilang Kredo sa Mga Apostoles. Wala pa gyud ako nakadungog og ingon-anang butang! Oh, iya gayud kining giwatas-watas, ug gikapungtan nila siya ug gikapungtan ko siya, gikapungtan siya sa tanan.”

248 “Oh,” ang ingon ni Josaphat, “dili unta magsulti ang hari sa ingon, apan gusto ko siya nga madunggan.” Nahibalo siya sa kung unsay isulti ni Eliseo! Nahibalo siya kung unsa.

249 Gilabyan sa Dios ang tanan nga mga bantugan, gamhanan, intelektuwal nga mga magwawali, ug gipahimutang ang Iyang Mensahe diha sa usa ka ubos nga lalaki nga nagaangkon nga wala siya’y unsa man nga hingsayran. Apan unsa ma’y gihimo niya?

250 Gisulayan nila siya, ug miingon, “Karon, imong isulti ang mao rang butang nga ginasulti nila.”

Ingon niya, “Igasulti ko kung unsa ang ginabutang sa Dios sa akong baba, kana lang.”

251 Ingon siya, “Kung gusto nimo nga mamahimong gamhanan, hinumdumi nga ikaw . . . ikaw—wala ka sa kahan-ayan dinhi, dong. Hinumdumi, gipalagpot ka na pagawas niana nga organisasyon. Tingali’g tan-awon nila og usab ang imong pagpakigkauban kung mouyon ka lang kanila sa ingon niining makuyaw’ng higayon. Nagapangandam na kami nga magpahigayon og usa ka dakung bulohaton,” miingon, “kung makig-uyon ka lang kanako.”

252 Miingon, “Dili ako mosulti og unsa man gawas sa kung unsay gisulti sa Dios!” Ang mopakig-kompromiso, mahunahuna mo ba ang usa ka tawo sa Dios nga mopakig-kompromiso sa Pulong sa Dios? Dili, sir, ayaw gayud niyang magpaaghat kanila.

253 Miingon, “Apan usa ikaw ka mahuyang. Gikan ka sa usa ka kabus nga pamilya. Aba, kabalo ba ka, tingali’g ilang . . .”

“Dili ko igsapayan kung unsa ma’y pagabuhaton nila.”

254 “Bueno, pabiyahion ka nila sa nagkalainlaing nasud sakay sa usa ka eroplano. Buhaton nila ang bisan unsa, kita mo, kung—kung imo lang . . .”

255 “Dili, dili. Igasulti ko lamang kung unsa ang ibutang sa Dios sa akong baba.” Gilabyan sa Dios ang tibuok niadto nga pundok, (oo, sir, nahimo kadto sa iyang tinuod nga baruganan) gilabyan ang upat ka gatus ug gihatag kaniya ang MAO KINI ANG GINAINGON SA GINOO!

256 Dayon gitooan ba nila Kadto? Wala, sir! Ingon nila, “Dili kana mao ang MAO KINI ANG GINAINGON SA GINOO,

ang among seminaryo wala man nagatudlo og ingon-anang mga butang. Bueno, ania ang among obispo, gisulti na niya, gisulat niya ang maong rituwal. Nagkatigum na kaming tanan, nagtukod na kami og mga eskwelahan namo. Nagauban kanamo ang Dios! Hain man miagi ang Dios nga gikan kanamo sa dihang miadto na Kini kanimo?”

Ingon siya, “Makita ra ninyo, sa umaabot nga panahon.” Uh-huh, husto kana.

²⁵⁷ Unsa man siya? Siya’y huyang, apan siya mao’y pinakakusgan sa taliwala nila kaniadto. Ngano man? Tungod kay atua kaniya ang Pulong sa Ginoo. Oh, igsoon, unsa ma’y kalahian niini mahitungod sa . . . unsang uban pa nga butang kung nakabaton ka na sa MAO KINI ANG GINAINGON SA GINOO?

²⁵⁸ “Ay, Igsoong Branham, kung mopakig-kompromiso ka lang unta mahitungod sa pagbautismo sa Ngalan ni Jesus, bueno, makapagpahigayon gyud kita og dakung panagtigum sa Chicago o sa niining mga lugar nga sama niini.” Huh! Sa hunahuna n’yo mahimo kaha kana? Dili ko igsapayan kung hain man kamo magtipon-tipon, kung unsay buhaton ninyo, igsoon, pagpabilin kamo sa MAO KINI ANG GINAINGON SA GINOO.

²⁵⁹ Gusto ko nga moduol sila kanako ug sultihan ako kung diin Kana sayup. Ipakita kanako sa Pulong sa Dios kung diin Kana sayup. Oo. Dili nila himoon kana. Dili, sir. Apan Kini’y MAO KINI ANG GINAINGON SA GINOO! Pagpabilin kamo Niini, bisan pa kung palagpoton man kamo sa matag usa kanila. Dili ko igsapayan bisan pa kung mangahuyang kamo, “Kung ingon-ana mamahimo akong malig-on.” Kon ila man akong palagpoton pagawas, pasudlon man ako sa Dios. Uh-huh, oo. Ang Dios . . . Palagpoton man nila kamo pagawas, pasudlon man kamo sa Dios.

²⁶⁰ Hinumdumi, ang mga sinalikway ang kanunay nga ginapunit sa Dios, ang mga dili-mahinungdanon. Dayon ginahimo Niya sila nga mga *mahinungdanon* alang Kaniya. Dili man ninyo maamgo kini sa niining kinabuhia, apan mahitabo kini sa usa nga moabotay; kita n’yo, mao kana.

²⁶¹ Ug gihatag kaniya ang MAO KINI ANG GINAINGON SA GINOO, kay ngano man? Nagpabilin man siya sa Pulong. Aduna kaniya ang husto nga Mensahe. Gihatagan siya sa Dios og usa ka panan-awon. Ang uban kanila niadto walay panan-awon. Kita n’yo? Aduna siya’y panan-awon. Ngano man? Tungod kay nagpabilin siya sa Pulong. Dinha kon diin kita makakita og mga ilhanan ug mga katingalahan. Tungod nga . . . Ginapasabot sa uban nga ingon niini Kini, apan nagpabilin gyud siya sa Pulong. Karon dalion na nato.

²⁶² Si Elias, kaniadtong gipalagpot siya sa iyang iglesia ug gibiyaaan siya alang sa modernong kalibutan. Mahunahuna ko

si Elias nga gipangbadlong niya sila og ayo. Dili ba ninyo mahunahuna usab? Kahibalo na mo kung unsa si Elias kaniadto. Mahanduraw ko, sa pagsugod pa lang sa iyang ministerio, mitindog siya didto ug miingon, “Aba, kamong mga kababayan-an nga naninguhang mamahimong sama sa Unang Ginang,” nagasul-ob sila og mga bonete, kabalo na mo, “Gining Jezabel! Kamong moderno nga mga kababayan-an, ingon nga sama sa Unang Ginang sa nasud, nagapangbisti nga sama niya, nagapanglihok nga sama niya. Kamo gyud mga magwawali!” Oh, grabe, kung giunsa pagpangbadlong sila! Ug kanunay na lang mangatipas sila hangtud nga wala na’y mahibilin.

²⁶³ Miabot na siya sa kinatumyan sa iyang panaw. Wala na’y makigtimbayayong kaniya. Wala na’y ni usa ka iglesia ang makigtimbayayong kaniya. Gibiyaan na siya sa iyang tibuok iglesia, namalik sa kalibutan (sama ra kini sa karon), husto kana, namalik og usab sa kalibutan. Pipila na lang ang nagpabilin, adunay usa dinhi ug usa didto, nga atua pa latas sa nasud nga kinahanglan pa niyang biyaheon, ug uban pa. Atua siya sa malisud na kaayo nga kahintang, midangat na siya sa kinatumyan sa iyang kahibalo.

²⁶⁴ Miingon siya, “Ginoo, mibarug man ako sa Imong Pulong, gisulti ko gayud ang Kamatuoran. Ug tanan sila mikalagiw na, wala na gayu’y nahibilin pa dinhi. Wala na ako’y, bisan kinsa nga pagawalihan pa.” Amen. “Oo, mibarug ako sa Imong Pulong, Ginoo, ug karon tan-awa kung hain na ako karon, wala na’y ni usa kanila ang modawat kanako. Kung moadto ako sa lungsod, moingon sila, ‘Ania na pud kanang tigulang nga sapoton. Oo, oo, ania na pud kanang tigulang nga sapoton nga moabotay sa lungsod, karon mosugod na pud siyang mangsaway—mangsaway mahitungod niining moderno nga pagkinabuhi ug tanan na.’”

²⁶⁵ “Ayaw siya dawata! Pastor, ayaw pagpakigtimbayayong sa niana nga tawo! Ayaw, sir!”

²⁶⁶ Pastor, “Ania na usab kanang tigulang nga panatiko sa lungsod karon. Kita n’yo, kanang Elias nga atua didto, kanang maong tigulang opawon nga tawo. Ayaw gyud hatagi og bisan unsang pagtagad kanang tigulang nga lalaki. Tan-awa siya, wala man gani siya nagabisti og sama sa ginabisti sa usa ka ministro nga sama niining ginasul-ob ko (ang iyang kalo, kabalo na mo; ug motindog siya dinha sa atubangan, ug nakatindog ang kwelyo, kabalo na mo).” Miingon, “Dili siya. . .” Miingon, “Siya—siya—siya—siya’y lahi gayud nga matang sa. . . Siya—usa siya ka salikwaut nga tawo.”

²⁶⁷ Ug mahanduraw ko ang pipila sa mga halangdong kalalaken-an didto nga moingon, “Kabalo ba mo? Siya—siya’y usa ka kulang-kulang. Uh-huh, oo, siya—usa siya ka kulang-kulang, nagapuyo lang didto sa kamingawan, nagapabilin sa kakahoyan halos sa tanan niyang panahon, ug moabot

dinhi nga naputos sa panit sa karnero. Oh, grabe! Ug dayon pangkondenahon ang mga kababayan-an! Wala pa gyud ako nakakita og ingon niana nga tawo. Ayaw...ayaw—ayaw—ayaw gayud pagpakighilambigit kaniya, bisan unsaon! Ayaw pagpakigtimbayayong!”

²⁶⁸ Bueno, nagkatigum ang asosasyon sa mga ministro didto, kabalo mo, miingon, “Ayaw—ayaw gayud kamo pagpakaaduna og unsa man nga...Pasagdi ra siya, sa katapusan siya... moabot ra siya sa kinatumyan sa iyang nahibaloan. Pasagdi ninyo siya—pasagdi lang ninyo siya nga mangsaway. Kana lang, pasagdi ninyo siya.”

²⁶⁹ Apan ang tigulang nga si Elias, padayon gayud nga nagalakaw nga matinud-anon sa Dios, (Grabe, grabe.) nagpabilin mismo sa Pulong. Sa dihang magpahigayon sila og gamay’ng panagtigum didto, ug iyang tan-awon ang mga mananambong, moingon, “Kamong tanan nga mga Jezabel!”

²⁷⁰ “Oh, pagkahilabihan nga kaisog! Dili na gayud ko moadto ug maminaw pag-usab niana nga tawo! Dili, sir, dili na gyud ko!”

²⁷¹ Wala kadto nagpahunong kaniya, nagpabilin lang gihapon siya didto. Sa diha nga nawala na kaniya ang iyang iglesia, sa diha nga nawala na kaniya ang iyang...sa diha nga nakigbatok na kaniya ang tanang mga denominasyon, mao kadtong higayona usab (sa diha nga nahimo na siyang huyang) miingon siya, “Ako na lamang ang nahibilin, ug ginapangita nila ako aron pagapatyon.” Ingon pa, “Pusilon nila ako kung magmalampuson sila niini.” Uh-huh. Kita n’yo? “Apan ako... Ginapaninguhaan nilang patyon ako. Ug ako na lamang ang nahibilin, Ginoo, unsa man ang mahimo kong buhaton?”

²⁷² Mao kadtong higayona, kaniadtong naluya na siya (apan matinud-anon gihapon nga nagabarug, nagasugid sa iyang kaluyahon ug tanan na), nga miingon ang Dios, “Tumunga ka ngadto sa bukid, hatagan Ko ikaw og usa ka bag-ong mensahe. Padalhan Ko ikaw og usa ka bag-ong mensahe karon. Gisultihan Ko na ikaw ‘Lumakaw ka ug kondenaha kini nga mga butang,’ karon ipadala Ko ikaw og balik nga adunay usa ka butang nga magpamatuod nga husto gyud Kini.” Miingon, “Maayo gayud ang gibuhat mo, Elias. Gisultihan mo sila mahitungod sa Unang Ginang, ug tanan niadto, ug kung unsay gibuhat nila. Gikondena mo si Ahab ug ang tanan niyang moderno nga mga butang ug tanang moderno nga mga kaiglesiahan, ug gisulti mo kanila nga mga magwawali kung hain sila nagapasakop. Usa ikaw ka ehemplo. Mibarug ka didto bisan walay unsa man nga tabang, walay unsa man nga organisasyon, walay bisan unsa nga nagsuporta kanimo, apan nagpabilin ka sa Akong Pulong. Karon hatagan Ko ikaw og usa ka butang. Umadto ka didto ug sultihi kanang maong tigpakaaron-ingnon, ‘MAO KINI ANG GINAINGON SA GINOO! Walay bisan tun-og nga mahulog

gikan sa Langit hangtud nga igasulti ko kini.” Grabe! Grabe! Gidala siya ngadto sa itaas sa bukid aron ipakita kaniya ang usa ka butang!

²⁷³ Oh, makita ko siya niadto nga buntag, nga nagapadulong, nagalakaw niadtong dalan sa Samaria. Dili siya maayo kaayong tan-awon, sigurado gayud, kadtong opaw niya nga ulo nga nasidlakan sa adlaw, ang mga uban ug mga bangas nagdunghay na palibot sa iyang nawong, nagsul-ob og panit sa karnero. Miingon ang Biblia nga siya kono’y “balhiboon,” puno siya og mga balhibo sa tibuok niyang lawas, mahanduraw ko siya nga hugaw kaayong tan-awon; naggunit niadtong daan na nga sungkod, nagalangitan sa kalangitan ang gagmay niyang mga mata, nga nagalakaw sa dalan. Ug inyong . . . siya . . . siguro nagalihok siya nga mora’g dise-sais anyos pa ang panuigon sa dihang mga otsenta na siya. Ania siya nga nagapadulong, nagalakaw sa dalan, diretso ngadto sa Samaria. Igsoon, nagmalig-on siya kaniadto sa iyang kaluyahon, “Igo ang Akong gahum. Ayaw’g kabalak-i ang mga organisasyon, Elias. Ayaw sila kabalak-i, ang Akong gahum lang ang gikinahanglan mo.”

²⁷⁴ Mahinumdom ko niadtong nagatindog ako duol sa usa ka dakung templo usa ka higayon kaniadto, ug miingon ko, “Ginoo, dili ko gayud gusto nga moadto sila sa akong—akong opisina.”

Miingon Siya, “Ako mao ang imong Bahin.” Kita mo? “Ako mao ang imong Bahin.”

²⁷⁵ “Sa—sa kaluyahon nan ako—ako’y . . . Ang Akong gahum lig-on. Mamatuman ang Akong hingpit nga Kabubut-on (Pablo, o Elias, si kinsa ka man) pag-ipadaplin mo ang imong kaugalingon.” Kita n’yo? “Sa imong kaluyahon, nan mamahimo Akong gamhanan. Ako Mao! Ako Mao ang Gamhanan nga nagasulod ug nagapuno.”

²⁷⁶ Mahanduraw ko siya nga nagalakaw mismo niadtong dalan sa Samaria, nagatan-aw kadtong gagmay niyang mga mata nga *ingon-ana*, oh, medyo adunay diyutay’ng pahiyom sa iyang nawong. Igsoon, miduol siya mismo ngadto sa atubangan ni Ahab. Wala siya nagbunga-bunga, wala gayud siya nagkangkanga. Wala, wala! Nagapitik sulod sa niwang ug nagkunot na niya nga dughan ang usa ka kasingkasing nga ginapuy-an sa Espiritu Santo. Oo, sigurado gayud! Nagalakaw niadto nga dalan, miduol paingon mismo sa atubangan ni Ahab, ug miingon, “Walay bisan tun-og nga mahulog hangtud nga igasulti ko kini.”

²⁷⁷ Gibundak niya ang iyang mga tiil ug, miliso, mibalik dayon ngadto sa kamingawan. Giingnan, “Maayo ang gibuhay mo, Elias. Duol ngari, ako nang gisugo ang tanang mga uwak nga pakan-on ka karon, ug ang . . . ug lingkod dinhi sa itaas sa makadiyut.” Oh, grabe!

²⁷⁸ Sa diha nga naluya siya, nan nahimo siyang kusgan. Oo, sir. Gitay-og niya ang kalangitan aron nga dili moulan. Nahimo

siyang kusgan niadto, sa diha nga nawala kaniya ang iyang iglesia, nawala ang tanan-tanan nga aduna siya, ang tanang uban pa. Apan nagpabilin siya sa Pulong sa Dios, dayon nagkaaduna siya og gahum sa pagsira sa kalangitan.

²⁷⁹ Niadtong nawala kang Jacob ang tanan niyang kusog, gihatagan siya dayon sa Dios og gahum nga mamahimong usa ka prinsipe. Kita n'yo?

²⁸⁰ Niadtong giwala kang Pablo ang iyang edukasyon ug ang tanan niyang teolohiya, gihimo siya sa Dios nga usa ka misyonaryo ngadto sa mga Gentil.

²⁸¹ Niadtong nawala kang Moises ang tanan niyang abilidad ug naluya, gihimo siya nga gamhanan sa Dios ug gipadala siya sa Egipto pinaagi sa gahum sa Espiritu, nga otsenta anyos na ang panuigon; nakadunghay ang mga bangas, nagsakay ang iyang asawa sa usa ka mula ug ginasabak ang usa ka bata sa bat-ang niini, ug dala ang usa ka sungkod, miadto didto ug gibuntog niya ang Egipto. Oo. Kita n'yo? Dili pinaagi sa usa ka panon sa kasundalohan sa luyo niya, sama sa gusto unta niya sa pag-adto didto, kondili diha sa gahum sa Espiritu. Amen!

Sa diha nga magamahuyang ka nan magamalig-on hinoon ka.

²⁸² Nagalakaw lang niadto nga dalan, wala siya nagkangkanga, wala siya mapandol, walay unsa man nga nahitabo kaniya, miduol lang paingon mismo sa atubangan ni Ahab, ug miingon, “Anaa kanako ang Pulong sa Ginoo.”

Ingon siya, “Ikaw mao ang nagasamok sa Israel.”

²⁸³ Ingon siya, “Ikaw mao ang nagasamok sa Israel.” Oo, sir. Oh, igsoon! Oo, sir. “Ipagawas sila dinhi ang imong intelektuwal nga mga sacerdote, ug tan-awon nato kung si kinsa ang Dios.” Tan-awa. “Pangatkat kamo didto sa Bukid sa Carmelo, tan-awon nato kung motubag ba pag-usab ang Dios nga mitubag sa Pentecostes kaniadto. Tan-awon nato kung ang Dios mao ra sa gihapon nga Dios, kung si Jesus mao ba sa gihapon kagahapon, karon, ug hangtud sa kahangturan.” Sa dihang mikanaug siya sa bukid, aduna na siya og usa ka Mensahe. Oo. Naluya gayud siya una, bisan pa, nawala una ang tanan-tanan kaniya sa wala pa niya nabuhat kadto. Kinahanglan una niyang maluya sa dili pa siya mamahimong kusgan.

²⁸⁴ Ang kayano kini sa Maayong Balita ang nagapalibog sa mga tawo. Ginapaningkamotan nilang himoon Kini nga daw sa usa ka dakung intelektuwal nga butang, sa dihang yano ra unta kini kaayo. Apan ginakuha sa Dios ang mismong galamiton sa pagkamapainubsanon ug kahuyang ug kayano, aron magapamuhat sa Iyang mga buluhaton. Usa lang kana ka galamiton sa kamot sa Dios.

285 Si Juan Bautista, ang iyang Mensahe, ang maong mag-uuna ni Cristo, yano kaayo nga milabay ra Kini sa ulo sa mga tawo. Paminaw kamo sa makadiyut. (Wala ko unta kamo napalangan og ayo, kamong nanagtindog lang dinha sa palibot sa bungbong, kita n'yo.) Tan-awa ninyo! Si Juan, sa dihang . . . Nagpamatuod ang tanang mga propeta mahitungod sa pag-abot sa Mesias. Miingon ang usa kanila nga “Ang kabukiran manglukso nga sama sa gagmay'ng laki nga mga karnero.” Ang uban miingon, “Igapalampak sa mga dahon ang ilang mga kamot.” Miingon ang usa pa, “Ang tanang ubos nga mga dapit pagapatas-on, ug ang hatag-as nga mga dapit pagapaubson.” Oh, grabe! Daw sa unsa nga adlaw!

286 Nahunahunaan n'yo ba ang Eskwelahan sa mga Propeta ug ang intelektuwal nilang panghunahuna bahin niadto? Oh, grabe, aduna na kanila kaniadto ang tanan nga mga klasikal kaayong mga butang! Apan sa nahitabo na kadto, gikan sa kamingawan migula ang usa ka tigulang nga magwawali nga wala gayud nakaeskwela bisan usa ka higayon sa iyang kinabuhi, tingali'g salikwaut kaayo ang iyang gramatika. Ang iyang amahan usa ka sacerdote, apan gikuha siya sa Dios palayo niadto. (Nahisgotan na nato kini sa leksyon niadtong miaging Dominggo.) Wala siya gisagol ngadto sa mga denominasyon, ug nga gidala siya didto sa kamingawan aron nga mabansay Niya Mismo siya. Mga ingon niana nga matang—mga ingon niana nga matang ang magapabilin sa Pulong sa Dios.

287 Mitungha gikan sa kamingawan, mga traynta anyos na ang panuigon; mahanduraw ko nga nakadunghay ang itum niya nga bangas sa iyang tibuok nawong, nga dili na mailhan; adunay dakung panit sa karnero nga nakaputos kaniya; nagatindog sa lapok, nga taman sa iyang tuhod; miingon, “Ako mao ang gisulti sa propeta nga si Isaias.” Ug miabot ang pipila sa mga denominasyon; ingon siya, “Ayaw ninyo hunahunaa nga isulti sa inyong kaugalingon ‘Aduna kami *niini* ug *niana*,’ makahimo ang Dios sa pagpatindog og mga anak kang Abraham sa niining mga bato!” Oh, grabe! Ngano man? Anaa kaniya ang MAO KINI ANG GINAINGON SA GINOO! Anaa kaniya ang Mensahe. Gisulti nang daan sa Dios nga moabot kini siya. Ug ang hinungdan . . . Miabot siya sa ingon kayano gayud, nga milabay ra Kini sa ibabaw sa ilang mga ulo.

288 Sa pag-abot ni Jesus kaniadto, miingon Siya, “Unsa man ang giadto ninyo aron tan-awon, usa ba ka intelektuwal nga mamumulong nga mobalhin gikan sa pagka-Methodist ngadto sa pagka-Baptist, ug gikan sa pagka-Baptist ngadto sa pagka-Presbyterian, gikan sa pagka-Presbyterian ngadto na pud sa pagka-Pentecostal, ug gikan sa pagka-Pentecostal ngadto na pud sa uban pa? Miadto ba kamo aron tan-awon ang usa ka bagakay nga ginakusokuso sa bisan unsang hangin? Dili si Juan!” Miingon, “Miadto ba kamo aron tan-awon ang usa ka

tawo nga nagasul-ob og panapton nga hamili?” Ingon Siya, “Anaa sila sa mga palasyo sa hari, ang ingon niana nga ministro.” Ingon Siya, “Unsa man ang giadto ninyo aron tan-awon, usa ba ka propeta?” Ingon Siya, “Labaw pa gani sa usa ka propeta!”

²⁸⁹ Si Juan labaw pa kay sa usa ka propeta. Ug, tan-awa ninyo, miabot siya nga pinakamapainubsanon kanilang tanan. Apan labaw pa siya kay sa usa ka propeta. Kahibalo ba mo kung unsa si Juan kaniadto? Usa siya ka mensahero sa pakigsaad. Oo, siya gayud. Milabaw pa siya sa usa ka propeta. Ang *propeta* usa ka magtatan-aw nga makakita sa mga butang. Ingon niana si Juan, usab, apan labaw pa siya niana. Siya’y usa ka mensahero sa pakigsaad. Miingon Siya, “Oo, kini siya mao man ang gikahisgotan ‘Igapadala Ko ang Akong magsasangyaw nga magauna Kanimo.’” Mao kadto kung si kinsa siya, usa siya ka mensahero sa pakigsaad. Sigurado. Sa yano niya nga paagi sa pag-anhi, gibutahan gayud niadto ang mga intelektuwal.

²⁹⁰ Karon kinahanglan na natong humanon sa dili madugay, mga pipila pa ka minutos, adunay pipila pa ka butang dinhi nga gusto ko pang isulti, pipila ka mga Kasulatan ug pipila ka sinulat.

²⁹¹ Unsa man usab kadtong maong balo nga aduna na lang og usa ka kumkom nga harina? Miabot na siya sa iyang kaluyahon, tingali’g mamatay na siya kaniadto tungod sa gutom. Wala na siya’y harina. Wala siya’y maadtoan bisan asa man ug aron makahulam og bisan diyutay’ng harina, ngani ang uban wala na pud og bisan gamay. Apan miabot siya sa punto, nga usa ka dakung magtotoo, ang iyang bana kaniadto usa ka halangdong tawo sa Dios. Ug usa siya ka balo, nga adunay usa ka anak. Ug aduna na lang siya og usa ka kumkom nga harina, apan igo na kadto, mao lang kadto ang gikinahanglan niya; gipahinungod niya kadto sa mga kamot sa Dios, nabuhi siya tungod niadto sulod sa tulo ka tuig ug unom ka bulan, sa usa ra ka kumkom nga harina. Naluya siya.

²⁹² Migawas siya niadtong buntaga aron mamunit og duha ka sanga sa kahoy, ug giputol-putol kadto ug gitipon. Kita n’yo, ang maong duha ka kahoy mao ang Krus. Kita n’yo? Giputol-putol . . . Miingon siya, “Mokuha ako og duha ka sanga sa kahoy.” Wala siya miingon “Mokuha ako og ingon kadaghan nga mahimo nakong bitbiton sa akong mga bukton,” karon, duha lamang ka lugas nga kahoy. Kana lang. Makita ba ninyo ang simbolo?

²⁹³ Ug, oo, kinaraang paagi . . . Ang paagi aron sa paghimo og kalayo ingon niini, magkuha ka og mga kahoy ug i-krus ang mga niini, duslitan kini sa tunga. Pagnaga-camping ako, ako . . . didto sa kabukiran pagpanahon na sa kagabhion, aron dili ako mangurog sa katugnaw, nagabutang ko og kahoy nga *pa-ingon-niini* ug ang usa pa ka kahoy nga *pa-ingon usab niini*, ug paggabii na sige-sige ko lang ginatulod hangtud tumoy, ug magadilaab

na kadto samtang imong ginatulod, kita n'yo, hangtud niadtong maong krus.

²⁹⁴ “Magkuha ako og duha ka lugas nga kahoy. Maghimo ako og tinapay, lutoon kining harina, kining diyutay’ng kumkom nga harina, ug magbuhat og usa ka tinapay para kanako ug sa akong anak nga lalaki. Kaonon namo kini ug mamatay na.” Anaa na gayud siya sa kaluya niadto, dili ba? Miingon siya . . . Ug miliso siya ug misugod na sa paglakaw og balik. Oh, pagkainit niadtong buntaga! Oh, dugay na kaayo nga anaa sila sa kawalad-on niadtong tungora. Ang tanan . . . Walay tubig, ug nagasinggit ang mga tawo, nangamatay na ang mga tawo, sa bisan asa; walay mahulaman, og wala na gyu’y mahimo. Atua na siya sa kinatumyan sa iyang panaw. Atua na siya sa iyang kahuyang. Miingon siya, “Ako kining lutoon para kanako ug sa akong anak nga lalaki, ug pagkahuman kan-on namo kini ug mamatay na.” Ug mituyok siya ug ingon niya . . .

²⁹⁵ “Kadali lang!” Milingi siya. Ug atua nagsandig kadtong tigulang nga balbason ang nawong didto sa ilang ganghaan, miingon, “Lumakaw ka ug buhati una ako og usa ka gamay’ng tinapay, ug dalha kini kanako.” Oh! “Dad-i ako og tubig, ug usa ka buok nga tinapay, kay, MAO KINI ANG GIINGON SA GINOO!” Oh, grabe, mao na kadto. Oh, grabe! Kadtong diyutay na lang kaayo nga aduna siya, kita n'yo, gipahinungod niya kadto sa Dios. Ug nahimo kadtong igo kaniya sa tanan nga nahibiling panahon. Oo. Kita n'yo, sa diha nga siya nahimong luya nagmalig-on hinoon siya.

²⁹⁶ Aduna siyay usa na lang ka sudlanan nga may usa ka diyutay’ng lana niini. Ug wala na dayon siya’y bisan unsa pa, ang iyang duha ka anak igabaligya na aron mamahimong ulipon. Wala na gayud siya’y laing mahimo niadtong gamay’ng sudlanan sa lana. Dili na kadto paigo, anaa na siya sa katapusan.

Miingon si Elias kaniya, miingon, “Unsa ma’y anaa kanimo sa inyong balay?”

Miingon, “Madiyutay na lang nga lana sa usa ka sudlanan.”

Miingon, “Umadto ka sa imong mga silingan, manghulam ka og daghang mga sudlanan.”

²⁹⁷ Dinha, tan-awa ninyo, ginapaandam na sa wala pa gani kadto mahitabo. Hmm? Mangandam! Nadungog na ni David kadtong dahunog sa mga kahoy sa morales. Nakita na ni Elias kaniadto ang usa ka panganod nga ingon pa lang ka gamay sa usa ka kamot, miingon, “Madungog ko na ang dinaguok sa pagkadaghan nga ulan.” Kung mahimo pa unta nga makakuha ang Dios og mga sudlanan nga walay sulod! Husto kana.

Miingon siya, “Pun-a ang balay sa mga niana.” Amen!

²⁹⁸ Kita n'yo kung unsa gayud ang gusto sa Dios? Kinahanglan sa Dios og mga sudlanan nga walay sulod. Paminaw! Aduna

kita'y daghan kaayong doktrina, daghan kaayong mga butang-eklesiastikal nga walay pulos, hangtud nga mosangko na kita sa pinakaubos sa tadyaw. Usa na lang ka butang ang nahibilin, ang mobalik sa Dios ug sa Iyang Pulong. Ug kung buhaton ninyo kana, panguha mo og mga sudlanan nga walay sulod. Habwa-a ninyo ang tanang pagka-Methodist gikan niana, ang tanang pagka-Pentecostal gikan niana, ug ang tanang pagka-Baptist gikan niana, ug pasagdi ang mga niini nga mga sudlanan na lang, ug ipangbutang kini sa balay. Ug dayon pagkuha gikan niini nga Sudlanan ug sugdi ang pagpangbubu kanila, amen, sugdi lang sa pagbubo.

²⁹⁹ Aduna na siya'y igo nga makaon niya ug sa iyang mga anak, ug ang tanang uban pa, ug mabayran ang tanang mga utang. Ngano man? Ngano man? Tungod bisan sa diyutay lang nga aduna siya, gipahinungod man niya sa Dios, ug gituman ang pulong niadtong propeta, og okey na ang kahimtang niya.

³⁰⁰ Dios, padad-i kami og usa ka propeta nga kuhaon ang Pulong sa Dios, nga dili mokuha og bisan unsang *uban pa nga butang*, kondili mokuha lamang og mga sudlanan nga walay sulod. Kung mahimo lang unta nga makakuha ang Dios og mga sudlanan nga walay sulod, ug dayon kuhaon ang Pulong sa Dios ug ibubo Kini sa maong tawo.

³⁰¹ Dili nga ginasulti sa uban, "Oh, nangurog ko sa dihang nadawat ko Kini. Nakasulti ako og laing mga dila sa dihang nadawat ko Kini. Nagsayaw ako diha sa Espiritu." Kalimti kana, kita n'yo, kalimti ninyo kana!

³⁰² Pagpabilin lang dinha hangtud nga moabot Kini, kana lang, hangtud nga mapuno ang maong sudlanan. Mao kana. Ingon niana ang buhaton ninyo. Oo, sir, diha lang sa kayano Niini! "Hangtud nga mapuno ang mga sudlanan," kung mahimo lang unta nga makapabilin kita niana!

³⁰³ Ang mga tinun-an kaniadto, nangalibog na sila usa niadto ka adlaw, miingon si Jesus kanila, miingon, "Adunay lima ka libo nga mga tawo dinhi," ug miingon, "nangaluya na sila, gipanggutom na sila." Oh, mahimo kong magpabilin dinha og usa pa ka oras. "Lima ka libo, nga gipanggutom," adunay usa ka gatus ka bilyon ang gipanggutom!

Dunay miingon, "Papaulia na lang sila."

Miingon, "Dili ninyo kinahanglang buhaton kana." Ingon pa, "Pakan-a ninyo sila."

³⁰⁴ Oh, grabe! Mahanduraw ko sila nga ginatigum ang tanan nga makaplagan nila, ug kabalo mo sa diha nga nakuha na nila ang tanan (ang tanan-tanan) nga natigum nga . . . Pasayloa ko sa maong panultihon, "gipangtigum." Apan sa nakuha na nila ang tanan, miingon sila, "Karon, ania, gilibot na namo ang tibuok kampo. Wala gyud kami'y nakuha bisan usa ka sentimos nga kuwarta, busa dili na nato mapahigayon ang bulohaton." Nakita

n'yo? "Apan adunay nakuha namo dinhi, ug ang nakaplagan lang namo mao'y lima ka gagmay'ng tinapay ug duha ka gagmay'ng isda gikan sa usa ka gamay'ng bata" sama ni David, nga migula kaniadto gikan sa kamingawan. "Mao lang kana ang nakuha namo. Mao lang kana ang nahimo namong makuha. Anaa na kita sa kinatumyan sa atong nahibaloan. Wala na kita'y mahimo pa, Juan." Ang ingon ni Pedro, "Mao lang kana ang mahimo nato. Mao lang kana ang mahimo nato. Anaa na kita sa kinatumyan sa atong nahibaloan. Mao lang kana nga matang sa pagkaon ang atong nakuha."

³⁰⁵ Bueno, usa lang ka gamay'ng Kasulatan ang mahimo kong kuhaon, Mga Buhat 2:38, ug mao lang kana ang gikinahanglan nato, sundon lang Kana. Dili na ninyo kinahanglan nga magtuon sa mga seminaryo, mahitungod *niini*, *niana*, sa *uban pa*, dawata lang ninyo Kana. Oo, basta—basta dawata lang ninyo Kana, mao lang kana ang gikinahanglan ninyo, "Paghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, ug mapuno kamo sa Lana." Kita n'yo? Magmahimong walay sulod, mangandam alang nianang Usa, mao lang kana ang gikinahanglan ninyo. Pasagdi nga mabutangan kamo og bisan usa ra ka tinulo, ug tan-awa mapuno kini.

³⁰⁶ Kabalo mo, dili man kaayo malisud nga patuloan ang matag sudlanan. Tingali gamiton lang niya ang iyang tudlo, nga sama *niini*, patuloan lang ang matag usa ka sudlanan nga sama niana; paglingi nimo ug puno na kini. Patuloan lang kini, kita n'yo, mao lang kana ang gikinahanglan niya, tungod kay mapanalanginon man kadto nga lana.

³⁰⁷ Ayaw kamo panguha og unsa man nga pang-seminaryo nga kasinatian. Kuhaa ninyo ang Pulong sa Dios ug ipatulo Kini dinha, ug tan-awa ang pagpuno niini.

³⁰⁸ Miingon siya, "Bueno, unsa man nga matang sa tinulo ang kinahanglan natong himoon? Tingali'g puede ra kita nga mokuha gikan sa Mga Salmo."

³⁰⁹ Kuhaa ninyo ang kung kung unsay gisulti ko kaninyo, "Paghinulsol kamo, ug magpabautismo sa Ngalan ni Jesus Cristo alang sa kapasayloan sa mga sala, ug mapuno kamo gikan niana nga Tinulo." Pagpatulo lang kamo niana dinha, ug mapuno kamo gikan niana nga Tinulo. Mao kana ang Tinulo nga gigamit ni Pedro kaniadto sa Adlaw sa Pentecostes. Mao pud kana ang Tinulo nga gigamit ni Pablo. Mao kana ang Tinulo nga gigamit kaniadto sa mga tinun-an. Igadugang ra niana ang tanang uban pa, basta kuhaa lang ninyo kana nga Tinulo ug sundon kana, ug ang tanang uban pa niana mamaayo ra.

³¹⁰ Magmahuyang kamo! Magmahimong walay sulod! Habwa-a ninyo ang tanan, ug sugod niana padayon na kini nga magatulo, ug pagahimoon ra sa Dios ang uban pa nga pagpatulo. Basta

buhata lang ninyo kana. Pangluhod kamo ug dawata ninyo kana sa tibuok n'yong kasingkasing. Ipaubos ang inyong kasingkasing karon mismo ug moingon, "Dios, nagatoo ako Niini, sa tibuok kong kasingkasing!" Ang Dios na ang bahala sa tanang uban pa nga mga tinulo, mapuno ra kini, "Kamo mahimong map- . . . puno sa Espiritu Santo."

³¹¹ Karon nagkaaduna lang sila niadto og lima ka gagmay'ng tinapay ug duha ka isda. Busa unsa kaha'y pagabuhaton nila? Ug miduol sila ug miingon, "Mao lang kini ang nahimo namong natigum. Anaa na kami sa kinatumyan sa among nahibaloan. Wala na kami nakita nga usa pa ka buok nga tinapay sa bisan asa, wala na gyu'y nagkaaduna pa. Ug kadtong maong gamay'ng batang lalaki, tingali og nagahulagway siya nga . . . usa siya ka latagaw nga bata, nga moadto unta sa eskwelahan kaganinang buntag, ug wala man moeskwela ug nangisda na lang. Ug nakitan namo siya, didto sa sapa, mianhi siya aron nga maminaw. Ug, ania, nakakuha siya og lima." Salamat sa Dios tungod niadtong gamay'ng bata! Oo, sir. Miingon, "Among . . . ang usa lamang ka butang nga among nakuha sa among padayon nga pagpangita mao lang kining madiyutay nga tinulo dinhi." Miingon . . .

³¹² Miingon si Jesus, "Igo na kana. Dad-a ninyo ang mga niini dinhi." Kita n'yo? "Dad-a ninyo kana dinhi, ihatag kana Kanako. Ihatag Kanako kanang diyutay'ng tinulo, Ako na'y bahala niini. Karon, padayon lang mo sa pagpanghatag samtang nagahatag Ako kaninyo gikan niini nga tinulo."

³¹³ Ug ang matag usa kaninyo kuhaa ang maong tinulo sa Mga Buhat 2:38 niining buntaga, sulod sa inyong kasingkasing, ug sugod sa pagkuha n'yo dinha ug tan-awa ninyo Siya nga ginasugdan ang pagpikaspikas sa Tinapay sa Kinabuhi diha kaninyo. Maghinulsol kamo, magpabautismo sa Ngalan ni Jesus Cristo alang sa kapasayloan sa inyong mga sala, ug dayon tan-awa ninyo kung dili ba motulo ang Espiritu Santo, padayon nga motulo diha *niini* ug motulo diha *niana*, motulo *dinhi* ug motulo *dinha*, ug motulo *didto*, ug magkaaduna gayu'y pagpuno sa Espiritu Santo! Husto!

³¹⁴ Dili n'yo na kinahanglan nga moeskuwela pa sa mga seminaryo. Dili n'yo na kinahanglan nga mahimo pang maalamon. Ang butang lamang nga kinahanglan ninyong buhaton mao ang ilhon nga wala kamo'y unsa man nga nahibaloan. Tugotan ang Dios nga gunitan kamo, Siya na ang moatiman sa tanang uban pa niini.

³¹⁵ Bueno, dayon miingon ang Tingog, "Dad-a ninyo kana dinhi." Mao kana ang gusto sa Dios niining buntaga, nga dalhan nato Siya og usa ka hugpong sa mga sudlanan nga walay sulod. Siya na ang moatiman sa uban pa niini. Oo, sir.

³¹⁶ Ang buta nga si Bartimeo nga nagalingkod tupad didto sa ganghaan, nagkagidlay, gitugnaw, oh, atua siya sa

pinakamahuyang nga higayon sa iyang kinabuhi, sa diha nga nadungog niya ang usa ka Tingog, nga miingon, “Dalha siya dinhi.” Husto kana, usahay sa panahon kini nga mahuyang ka na kaayo.

³¹⁷ Atua si Maria niadto sa lubnganan, nga masulob-on, ang iyang Anak, gipatay ang anak niyang Lalaki, ang tanan, wala na gayu’y paglaum. Ug miadto siya didto aron embalsamahon Siya, ug bisan ang Iyang lawas gani wala na didto. Ug nadungog niya ang usa ka Tingog nga nag-ingon, “Nganong nagahilak ikaw, babaye?”

³¹⁸ Miingon siya, “Gikuha man nila ang akong Ginoo. Ug ako. . .” Ang gamay’ng makaluluoy nga babaye, gibutang sa kaulawan ang iyang Anak; gihuboan Siya sa tumang kahubo ug gibitay Siya didto sa Krus, ug gipaantus Siya ug gilansang Siya didto, human nga gipahayag Niya nga Siya mao ang Mesias, human nga nahibaloan niyang gilandongan siya sa Espiritu Santo ug gihimugso kadto nga Bata. Kadto mao’y Anak sa Dios. Nakita niya ang Iyang mga buhat, ug ang tanan, ug atua siya niadto sa iyang pinakamahuyang nga panahon. . .

³¹⁹ Ug didto mibarug gayud si Jesus batok sa kadautan, mibarug batok niadtong mga organisasyon, mibarug batok niadtong mga Fariseo; ug nahimong mahuyang ug gitugyan ang Iyang Kaugalingon ngadto sa kamatayon, ug namatay ingon nga usa ka makasasala didto sa Krus, nga dala ang atong mga kasalanan. Ang mismong Mga Salmo, ang mismong mga propeta nga ginatooan nila, gisulti na sa maong mga propeta (gatusan na ka tuig sa wala pa kadto) ang mismong mga Pulong nga gisulti Niya didto sa Kalbaryo, ug napakyas sila nga makita kadto. Ang bantugan nilang ekle- . . .

³²⁰ “Dios ko,” ang ingon ni David, “Dios ko, nganong gibiyaan Mo ako?” Mga Salmo 22, “Ang tanan kong mga bukog, nagatutok sila kanako, walay ni usa sa mga niini ang nabali. Ginalingolingo nila ang ilang ulo ug miingon, ‘Misalig Siya sa uban. . . Iyang—giluwas Niya ang uban, apan ang Iyang Kaugalingon dili Niya mahimong luwason.’” Ug ang tanang butang nga gisulti sa mga propeta, gisulti pud didto mismo! Ug si Jesus, nga naghimalatyon na niadto, nga ginakuptan kadto nga Pulong, gitugyan ang Iyang Kaugalingon. Ang Dios, si Emmanuel, nahimong luya kaayo hangtud nga gitugyan Niya ang Iyang Kaugalingon ngadto sa kamatayon, ug ngadto sa lubnganan, ug ang Iyang kalag ngadto sa impiyerno. Kahuyang! Apan gikan niadtong bug-os nga pagsurender. . . mibangon niadto nga buntag sa Pasko sa Pagkabanhaw, nga nagapaitaas Kini gikan sa pinakaubos.

³²¹ Siya mao ang Pinakataas, ug nahimong pinakaubos. Miadto Siya ngadto sa pinakaubos nga mga tawo, miadto ngadto sa pinakaubos nga siyudad. Ug paubos Siyang gilantaw sa

pinakaubos nga tawo didto sa maong lungsod. Gikan didto miadto sa kamatayon, ug gikan sa kamatayon miadto sa lubnganan, ug gikan sa lubnganan miadto sa impiyerno; ngadto sa pinakaubos nga mahimong maadtoan, ngadto sa pinakaubos nga impiyerno nga mahimong mahunahunaan, miadto Siya didto.

³²² Apan pagkahuman niadto, gikan didto, gipataas na Siya sa Dios. Padulong ngadto sa Paraiso, gikan didto paingon sa—paingon sa lubnganan, ug gikan sa lubnganan paingon sa Kahimayaan, ug Hataas na kaayo nga kinahanglan na Niyang motan-aw sa ubos aron makita ang Langit. Gibayaw ang Iyang mga trono sa Langit!

³²³ Kadtong makaluluoy'ng nagmasulob-on nga inahan, nga wala nasayod niadto, nagtindog siya didto, “Gikuha nila ang akong Ginoo, ug wala ako kahibalo kung hain na.” Siya’y . . . mao na kadto ang pinakamahuyang nga takna sa iyang kinabuhi. Ang iyang—iyang Ginoo nawala. Gilansang nila Siya sa krus, apan gitugot Niya kini . . . gilansang Siya sa krus diha sa kaulawan sa pagbitay Kaniya didto nga hubo atubangan niadtong mga tawo didto; ug giduslak Siya og bangkaw sa kilid, ug nagdugo, ug nadungog Siya sa mga tawo nga nagahilak didto sa Krus, ug nakita nila nga natay-og ang yuta, ug naila sa tibuok kalangitan nga Siya patay na. Paubos Siya nga gikuha, migahi ug bugnaw na, ug gipahimutang Siya sa lubnganan. Naghunahuna ang maong inahan, “Ang katapusang pagtahod nga mahimo ko sa akong pinalangga nga Anak mao na lang ang pag-anhi ug embalsamahon Siya, ug karon gikuha pa nila Siya.” Ug nagatindog siya didto nga nagahilak, kadtong luoy'ng inahan nagatindog intawon didto nga nagahilak, nagabakho. Oh, ang pinakamahuyang nga higayon!

“Nganong nagahilak ikaw, babaye?” ang ingon sa maong Tingog sa luyo niya.

³²⁴ Abi niya og ang tigbantay kadto sa lubnganan, miingon, “Oh, gikuha nila . . .” Dili gani niya mahimong molingi pa, luya na kaayo siya. Miingon siya, “Wala gyud ko’y tulog hangtud karon tulo na ka adlaw ug gabii. Nagtindog ako didto ug gitana-aw ang paglansang sa krus, gitana-aw ko ang kaugalingon kong Pinalanggang anak nga nasayod ko nga mao’y Anak sa Dios. Nasayod ko nga Siya gayud! Ug sa gihapon ilang . . .” (Nagatana-aw siya sa pikas nga bahin, ug Siya nga ana sa luyo.) “Ug gikuha nila Siya ug gilansang nila Siya sa krus. Nakita ko Siya nga nagbanhaw og mga patay gikan sa lubnganan. Nakita ko Siya nga nagbuhat og sunod-sunod nga mga milagro. Ug nasayod ko nga ang Balaang Espiritu . . . Nasayod gyud ang Dios sa akong kasingkasing, nga ulay ako kaniadto, ug gihatag kanako sa Balaang Espiritu ang maong Bata nga walay pagpakighilawas sa usa ka lalaki. Nasayod gayud ako nga matuod kadto! Ug nakita ko Siya nga gipakaulawan ug . . . gihukas ang Iyang sinina

gikan Kaniya, ug gibitay Siya didto ug gibunalan Siya og ayo. Makalilisang kaayo ang Iyang pagkamatay. Gihigugma ko gayud Siya, dili ko na igsapayan kung unsa ma'y gibuhat nila Kaniya. Gusto ko sa gihapon Siyang ilubong, gusto ko—gusto ko Siya nga hatagan og maayo nga matang sa paglubong, ug gikuha man nila Siya. Ako sa pipila na ka mga adlaw, nagmasulob-on ako. Nagaantus ako sa ingon niini nga kahimtang. Wala ako masayod kung unsay gibuhat nila sa akong Ginoo.”

325 Miingon Siya, “Maria.” Ug dayon nalig-on siya. Amen! “Lumakaw ka ug sultihi ang Akong mga tinun-an nga makigtagbo Ako kanila sa Galilea.” Oh, grabe!

326 Sa kahuyang nan nangahimo man hinoon kita nga malig-on. Sa diha nga ikaw mahuyang, dinha ka hinoon nagakalig-on.

327 Si Pedro, pagkahuman niyang nangisda didto, siya’y . . . pagpangisda ang iyang panginabuhian kaniadto. Medyo gusto ko ang iyang panginabuhian. Ug mao nga atua siya didto nga nagapangisda, nga nadiskurahi kaayo, nasayod man siya nga gilimod niya si Cristo. Oh, grabe! Nadungog niya kadtong propeta nga mitindog didto ug giingnan siya, “Pedro, ginaingon mo ba nga gihigugma mo Ako?”

328 Ingon niya, “Oh Ginoo, nahibalo Ka nga gihigugma ko Ikaw.” Ingon niya, “Gihigugma ko Ikaw. Andam ako nga mamatay para Kanimo.”

329 Miingon Siya, “Pedro, naghunahuna ka nga tininuod kanang imoha, apan igalimod mo Ako sa makatulong higayon sa dili pa . . . Igalimod mo Ako sa makatulo sa dili pa motogaok ang manok. Kita mo, igalimod mo Ako sa makatulo sa dili pa motogaok ang manok.”

330 Ug dayon nahitabo gayud kadto, sa dihang mitindog siya didto ug miingon, “Wala ako makaila Kaniya. Wala, wala ako’y hingsayran nga unsa man mahitungod kanila nga mga Pentecostal.”

331 Dili pa oras aron undangon na ang pagwali, wala lang kini nahan-ay ang akong relo. [Mitingog ang alarm sa relo ni Igsoong Branham—Ed.] Kita n’yo? Giingon nga . . . Ako—ako—nasayod ko nga angay na akong—akong mohunong karon, apan ako—dili pa ko puedeng mohunong niining orasa, kita n’yo, ug kinahanglan kong humanon kini sa makadiyut na lang.

332 Miingon, “Ako—ako—ako—nahibalo ako nga gilimod ko Siya. Gilimod ko Siya sa atubangan ni Pilato. Gilimod ko Siya sa atubangan niadtong gamay’ng babaye nga miduol kanako, nga miingon, ‘Dili ba usa man ka kanila?’ ‘Dili!’ Ug nanunglo pa gani!” Oh, dili maayo kaayo ang iyang kahimtang. Miingon, “Ako—ako—ako . . .” Gilimod niya . . . Gilimod niya Siya. Ug nakita niya si Jesus nga nagatindog didto ug mitan-aw, niadtong tungora nga mitugaok ang manok, mitan-aw ngadto kang Pedro.

Migawas siya. Oh, nadiskurahi gyud siya sa iyang kaugalingon, miingon, “Nganong nabuhi pa man ako?”

³³³ Ug dayon, gawas pa niadto, miingon siya, “Siguro mobalik na lang ko ug mangisda na lang pag-usab. Dili ko na mahimong mowali pa, busa mobalik na lang ko ug mosugod sa pagpangisda.” Gitaktak niya ang iyang mga pukot ug tibuok gabii nga gitaktak ang mga pukot, wala gyu’y ni usa ka isda. Ug atua siya sa usa ka mahuyang nga kahimtang, wala gayud siya’y bisan unsa, nadiskurahi siya sa iyang kaugalingon, miabot siya sa kinatumyan sa iyang mga abilidad.

³³⁴ Bueno, abi niya og usa siya ka maisog nga tawo, gitigbas ang dalungan sa anak sa labaw’ng sacerdote nga sama niadto. Bueno, abi niya og usa siya ka maalam nga tawo, kabalo na mo, nga aduna siya’y nahibaloan. Apan wala gyud siya’y nahibaloan! Kinahanglan niyang hikalimtan ang tanan nga nahibaloan niya.

³³⁵ Ug atua siya didto, miingon, “Bueno, nasayod ako og usa ka butang, usa man ako ka mangingisda. Mahimo ko pa sa gihapon nga himoong panginabuhian, ang pagpangisda.” Gitaktak niya ang pukot sa tibuok gabii ug walay nakuha nga bisan unsa. Oh, grabe nga pagkadiskurahi! Sa matag higayon nga birahon na niya kadto, walay sulod ang pukot. Ug nadiskurahi gayud siya! Anaa siya niadto sa pinakamahuyang nga kahimtang, miingon, “Nabati ko nga mas maayo pa nga molukso na lang ko gikan niini nga bangka. Wala man ko’y bili, bisan pa man.”

Miingon Siya, “Aduna ba kamo’y bisan unsa nga isda, mga anak?”

³³⁶ Mitan-aw siya didto sa pangpang, ug adunay usa ka Lalaki nga nagtindog didto. Ingon niya, “Wala, naghago kami sa tibuok gabii ug wala gayud kami’y nakuha. Nagtoo ko nga usa gyud ako ka mangingisda.”

“Ikaw ba kana, Simon?”

³³⁷ “Oo. Bueno, naghago ako sa tibuok gabii ug wala gyu’y nakuha. Oh, ako—ako . . . Wala gyud kami’y isda dinhi.”

Miingon Siya, “Bueno, itaktak ninyo ang inyong pukot sa pikas nga bahin.”

³³⁸ “Nahimo na namo . . . Unsa?” Dayon siya’y na- . . . Miingon, “Sa pikas nga bahin? Nahimo na namo kana!”

“Itaktak ninyo sa pikas nga bahin.”

³³⁹ Gitaktak niya ang iyang mga pukot, ug gibira niya. Miingon siya . . . Dayon nahimo siyang kusgan. Oh, grabe! Gikuha niya ang daan na niyang pangpangisda nga kupo ug iya kadtong gikupo kaniya, miingon, “Mga igsoon, Siya na Kana!” Ug giunahan niya ang tanang uban pa kanila paingon sa pangpang sa dili pa sila makaabot didto, nanagbugsay sila sa ingon kapaspas nga mahimo nila. Naunahan niya sila sa paglangoy, nga aduna pa’y ginasul-ob nga pangpangisda nga kupo, ngani

nakauna pa nga nakaabot ngadto sa pangpang. Ngano man? Tungod nagkakusgan siya. Sa kaniadtong kusgan siya wala gayud siya'y mahimo og bisan unsa, apan sa diha nga naluya siya nan nahimo siyang kusgan. Oo, sir.

³⁴⁰ Oh, ang stratehiya sa Dios mao ang mokuha og mga tawhanong sudlanan nga walay sulod ug tay-ogon ang kalibutan pinaagi kanila. (Karon, kadiyut na lang ug manguli na kita.) Sama kaniadto sa Pentecostes, kaniadto sa Pentecostes, unsa ma'y gibuhat Niya? Gikinahanglan pa nila og napulo ka adlaw aron nga mahimong bug-os nga mga wala na'y sulod. Ug nanagtindog silang tanan didto nga nakaabli ang ilang mga sudlanan, ug gikuha sa Dios ang Iyang Kaugalingon ug gipuno sila. Kadto lang! Gitay-og nila ang kalibutan; gibubo ang Iyang Kaugalingon ngadto kanila.

³⁴¹ Mao kana ang gikinahanglan sa karon. Mao kana ang kinahanglan nato karon, mao ang mga sudlanan nga walay sulod, oo, sir, aron nga mahimo silang pun-on sa Dios. Ug dili mo sila mahimong . . . Kinahanglan kong laktawan na ang pipila dinhi. Dili sila mahimong gamiton sa Dios samtang nga puno sila. Kung puno ka sa pagbansay sa teolohiya, dili ka mahimong gamiton sa Dios. Kinahanglan sa Dios nga magkaaduna og mga sudlanan nga walay sulod aron nga pun-on *Niya* ang mga niini.

³⁴² Karon, wala miingon si Elias, "Lumakaw ka ug panguha'g pipila ka mga sudlanan ug panghulam og daghang lana, ug tanawon nato kung dili ba kita makakuha og daku nga halin sa pagbaligya niini, ug mokuha lang ka og diyutay ug mahimo na nimong bayaran ang imong silingan sa imong gihulam." Ang ingon niya, "Panguha lang og mga sudlanan nga *walay sulod*. Mao lang kana ang gikinahanglan nimo."

³⁴³ Ingon niana kadto sa Pentecostes, aduna sila og mga sudlanan nga walay sulod mao nga mahimo silang pun-on sa Dios. Igsoon, ingon niana ang gikinahanglan sa niining adlaw. Sa niining adlaw; nagkinahanglan kita og ingon niana. Magkaaduna kita niana o mangalaglag kita. Humanon ko na gyud karon, paminaw mo. Kinahanglan nga magkaaduna kita niana o mangalaglag kita. Oo, sir.

³⁴⁴ Ang atong dagkung eklesiastikal nga mga makinarya, ang dinagkung makinarya pang-iglesia nangapuno na og carbon, aduna na kini og espirituwal nga mga kagulkol. (Ania dinhi si Igsoong Collins, ug si Igsoong Hickerson.) Siguro daut na ang pulohan-igpatuyok niana. Adunay sa kung unsa man nga daut na. Migamit sila og dili mao nga matang sa gasolina, napuno kini og carbon. Migamit hinoon sila og pang-seminaryo nga kasinatian imbis og iya sa Espiritu Santo.

³⁴⁵ Ang atong dagkung mga rebaybal sa kayutaan, ang atong bantugang mga tawo, ang atong mga dagkung buluhaton sa pagpang-ayo, nangapakyas kining tanan. Nahibalo kita

nga nangapakyas kini. Tan-awa ninyo ang halangdon natong ebanghelista, nga si Billy Graham, nalatas na ang nasud nga pabalik-balik, pabalik-balik, og pabalik-balik na. Unsa ma'y kaayohan ang nahimo niini? Si Oral Roberts, adunay mga dagkung buluhaton sa pagpang-ayo sa bisan asa, ug nagakahimo hinoon ang mga tawo nga mas dautan pa sa tanang panahon.

³⁴⁶ Tungod kay kining tanan nga Baptist, Presbyterian, Assemblies of God, ang tanan niining nagkalainlaing mga organisasyon, ipangtipon kining tanan, unsa man kini? Usa ka dakung eklesiastikal nga makinarya, ug gipuno kini sa Dios og carbon alang kaninyo. Karon nagakagalkal na lang gyud kini, “chug,” pum, pum, pum, “chug,” pum, pum, pum, diyutay dinhi ug didto. Human na siya! Tapus na siya! Hurot na ang gasolina, tubig na ang inyong gibubo niini. Wala na gayud (oo, sir), wala na'y hangin ang mga ligid sa matag kilid. Anaa na kita sa malisud nga kahimtang. Mihunong na ang maong eklesiastikal nga makinarya.

³⁴⁷ Ug, igsoon, naabli ang taklob sa impiyerno. Husto kana. Ug nagabuhagay ang agos sa gahum sa demonyo sa tanang dapit. Gisakop na niini ang mga nasud. Gisakop na niini ang pulitika hangtud nga dunot na kini sa kinasuloran niini. Gisakop na niini ang mga kaiglesiahan hangtud nga wala na sila'y nahibaloan nga unsa man gawas sa pagkadenominasyon.

Moingon ka, “Cristohanon ka ba?”

“Usa ako ka Methodist.”

“Cristohanon ka ba?”

“Ako—Pentecostal ako.”

³⁴⁸ Walay kalainan kana, sama sa gikaingon ko niadtong miaging adlaw, sa usa ka baktin, o usa ka baboy, o usa ka kabayo, o kung unsa man. Wala gayud kana'y kahilambigitan Niini. Usa ikaw ka Cristohanon sa dihang natawo ka na pag-usab ug napuno sa Espiritu Santo, kinahanglan nga mahitabo kana, ug bug-os ka na nga nagpasakop sa Espiritu. Kung wala ka pa nagpasakop sa Espiritu, kung ingon-ana wala ka pa natawo pag-usab ug wala ka pa'y Espiritu Santo. Mahimong makasulti ka og laing mga dila ug mangurog, ug molukso ug modagan, ug buhaton ang tanang matang sa . . .

³⁴⁹ Miingon si Pablo, “Mahimo kong mabalhin ang mga bukid pinaagi og pagtoo, mahimo kong ayohon ang mga masakiton, aduna ako'y kahibalo sa Biblia, mahimo kong moeskwela sa seminaryo ug makat-onan ang tanan niini nga mga butang, tanan-tanan na,” miingon, “wala gihapon ko'y kapuslanan!” Alleluyah!

³⁵⁰ Oh, grabe, mora lang og naabli nga taklob sa takuri! Nagalibot-libot nga mga demonyo, mga gahum sa yawa, ilalum sa ngalan sa Cristianismo, “nagapanudlo sa ilang

gipaka-Doktrina nga mga kasugoan nga iya sa mga tawo,” teolohikanhong mga doktrina gikan sa seminaryo, ginabalewala ang Biblia.

³⁵¹ Alleлуйah! Kinsa man ang dunay kasarang, kinsa man ang dunay igong kusog, kinsa man ang dunay igong kaalam? Kinsa man ang dunay igong gahum aron nga mosanta niining legion nga ginapahubo og mga sinina ang mga kababayan-an, sa ngalan sa mga magwawali, Methodist, Baptist, ug bisan ang mga Pentecostal? Ginapintalan ang ilang mga nawong nga sama ni Jezabel, ug ginapaputlan ang ilang buhok, ug ginapasul-ob og mga karsones nga sama sa mga kalalaken-an. Ang atong mga magwawali, wala sila’y mga igong baruganan aron sultihan sila mahitungod niini. Gipangyawaan! Ang legion kadto ang mao’y migisi sa sinina sa lalaki nga giyawaan kaniadto. Kinsa man kining nagangulob nga yawa?

³⁵² Kinsa man ang dunay igong kusog? Unsa man nga matang sa—sa denominasyon ang may kasarang sa pagbuntog kaniya nga nagalakaw-lakaw sa niining mga lapida sa mga denominasyon, nagasinggit, “Milabay na ang mga adlaw sa mga milagro, ug dili na namo kinahanglan ang Espiritu Santo”?

³⁵³ Ug kinsa man ang makasanta niana nga yawa? Ang Dios! Dili nato mahimo kini pinaagi og denominasyon. Dili nato mahimo kini pinaagi og eklesiastikal nga kusog. Apan adunay usa ka Tingog usa ka higayon kaniadto ang mihimo niini, amen, nga misanta niadto nga mga yawa, nga gibalik sila sa husto nila nga pangisip ug gipasul-ob sila og mga sinina. Kanang mao ra nga Tingog ang nagsaad kanato, “Ang mga buhat nga Akong ginabuhat pagabuhaton usab ninyo.” Dili ninyo mahimo kini pinaagi og eklesiastikal nga gasolina sa usa ka sakyanan nga nagkagulkol na sa carbon. Dili ninyo mahimo kini pinaagi sa usa ka organisasyon. Mahimo ninyo kini pagmanghabwa na kamo sa inyong kaugalingon ug magmahuyang, nga ginabubo pagawas ang inyong kaugalingon, ug ginatugotan ang Espiritu Santo nga mosulod ug palihokon ang matag tipik ninyo, tuhupon ang matag bahin sa inyong lawas. Mao lang kana ang bugtong. . . mohimo niini. Wala kita nagkinahanglan og usa ka bag-ong organisasyon.

³⁵⁴ Ang kinahanglan nato, Oh Dios, mabati ko Kini nga nagaagas na niining palibot karon. Ang kinahanglan nato mao’y usa ka propeta sa Dios nga motungha nga aduna og liti sa Dios, espirituhanong kilat nga motay-og niini nga kalibutan sa kaulawan! Alleлуйah! Sudlanan nga walay sulod ang gikinahanglan Niya, husto kana, usa ka Iglesiang tinawag-pagawas, diyutay’ng minority nga modawat sa gahum ug sa mga panalangin sa Dios ug sa Iyang Mensahe. Alleлуйah! Mao kana ang kinahanglan nato.

³⁵⁵ Magmahuyang kamo aron nga mahimo kamong kusgan. Pagabuntugon niini ang matag yawa. Ipahimutang niini ang mga maalamon sa kaulawan. Magahatud kini og mga kalalaken-an ug mga kababayan-an nga mga tinawag sa Dios, ug kana lang.

³⁵⁶ Hinumdumi, “Maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo, walo ra ka mga kalag ang nangaluwas.” Sa mga adlaw ni Elias adunay pito ka libo lang ang nagkaaduna Niini. Oh, hunahunaa lang ninyo ang gikinabuhian nato karon. Niadtong miabot si Juan sa esena, sigurado ang gamay’ng iglesia atua kaniadto sa minorya, apan aduna didto og mga sudlanan nga walay sulod nga mabuboan sa Lana. Alleluyah!

Dios, tugoti kami nga manghabwa sa among mga kaugalingon.

³⁵⁷ Magmahimo kamong walay sulod, mga higala. Magmahuyang kamo! Isalikway ninyo ang kaugalingon ninyong abilidad! Ug kamo nga anaa diha sa radyo...dili sa radyo, kondili mga diha sa...mga nagapaminaw niini nga mga teyp, hain man sila nagaadto, panghabwa kamo sa inyong mga kaugalingon. Ibubo ninyo ang inyong mga kaugalingon sa altar sa Dios ingon nga usa ka halad. Tugoti nga moabot ang Anghel nga may dala og бага sa Kalayo, og pun-on kana nga sudlanan sa gahum sa Dios nga Makagagahum sa tanan. Magma...Dayon himoon Niya kamong kusgan, hatagan Niya kamo og grasya nga makabarug.

Iduko nato ang atong mga ulo sa makadiyut.

³⁵⁸ Oh Ginoo, usa ka Dominggo sa buntag na usab ang milabay, ug ania kami nagalingkod sa niining maalampon nga panagtigum, kung diin ania ang mga kalalaken-an ug mga kababayan-an nga nakaila Kanimo, kung diin nagapuyo ang Imong Espiritu sulod sa ilang mga kasingkasing, ug nagatoo sila Kanimo ug nanglihok sumala sa matag Pulong nga Imong—Imong gisugo nga among pagabuhaton. Ug ginapasalamatan Ikaw namo tungod niini nga mga tawo.

³⁵⁹ Ug tingali adunay uban pa didto sa mga kayutaan diin magakadangat kini nga mga teyp, diin pagadalhon kini sa mga mapaubsanon nga mga kababayan-an ug mga kalalaken-an ngadto sa mga panimalay ug ngadto sa mga tribo ug didto sa uban pa nga mga kayutaan. Ug hinaut nga madungog nila, Ginoo, ug masabtan, nga manghabwa sila sa ilang mga kaugalingon aron nga mahimo silang pun-on sa Balaang Espiritu.

³⁶⁰ Tingali’g adunay pipila dinhi niining buntaga, Ginoo, nga...nga nanghabwa na sa ilang mga kaugalingon sukad nga nagsugod kami sa pagpakigsulti, nga naamgo nila nga nanagsalig gyud diay sila og ayo sa kaugalingon nilang mga panghunahuna, sa kaugalingon nila, sa ilang...kaugalingong

abilidad, nanagsalig sa—sa kaigmat sa ilang kaugalingon ug yano nga tawhanong panghunahuna, nga walay lain kondili kahugawan sa atubangan sa Dios. Oh Dios, hinaut nga manghabwa gayud sila sa ilang mga kaugalingon karon, mapainubsanon nga itugyan ang mga kaugalingon nila ug mangduol alang sa pagpuno sa Espiritu. Itugot kini, Ginoo.

Giingon kini diha sa Biblia, “Ang tanan nga nanagpanoo gibautismohan.”

³⁶¹ Adunay nagalingkod sa niini nga bilding karong buntaga, Amahan, usa ka gamay’ng babaye, nagalingkod dinha sa luyo, ug mahinumduman ko ang usa ka Mrs. Hicks nga mianha kanako usa niadto ka gabii ug nagahigda siya didto nga wala na’y bisan unsa gawas sa bukog, ugat, gagmay’ng ugat na lang sa panit nga nagakatay sa iyang tibuok lawas, giut-ut na sa kanser; ang iyang bana, dili pa usa ka Cristohanon kaniadto. Ug mahinumduman ko pa ang pag-ampo nga akong gi-ampo niadtong gabhiona: “Dios, Imong gipadala ang gamay’ng David aron sa pagbuntog sa usa ka leon pinaagi sa usa ka yano’g gamay lang nga lamboyog, ug nabawi niya ang karnero.” Miingon ko, “Gisakmit niini nga kanser ang igsoon kong babaye; usa kini ka yawa. Nasayod ako nga Dios Ikaw. Nakita ko Ikaw, Ginoo, ug nakahibalo ako. Nagpakig-istorya na ko Kanimo, ug mitubag Ka.” “Mianhi ako alang sa karnero sa Dios; kanser, buhian mo siya!” Dayon gisugo ko siya sa Ngalan ni Jesus Cristo nga “Mouli na.” Ug ang iyang bana, nga wala pa kaniadto mitugyan sa iyang kaugalingon, mitoo niadto nga Pulong ug gidala ang iyang asawa pauli. Ania siya dinhi karong buntaga, nga usa ka kusgan na kaayo ug himsog nga babaye, wala na’y kanser, mianhi siya niining buntaga aron magpabautismo sa Ngalan ni Jesus Cristo. Oh Dios, salamat Kanimo alang nianang sudlanan nga walay sulod nga andam nang magpapuno. Dios, nagaampo ako nga Imong panalangin kana nga kalag.

³⁶² Ginoo, usa lang kana ka panag-ingnan bahin sa daghang uban pa. Nagaampo ako nga ang Imong mga panalangin magapabilin sa niining mga mananambong, nga maalampoon gayud, Dios, maalampoon gayud. Kung. . .

³⁶³ Usa na lang ka butang ang nahibilin, Amahan, nga akong nakita, kana’y, kon magpatungha Ka sa kung asa man og mga sudlanan nga walay sulod ug himoon kining kalibutan nga maulaw sa kaugalingon niini, o kaha ipadala na si Jesus dihadiha dayon. Nga ang katapusan ania na, Ginoo, duha na lang ka butang ang nahibilin nga mamahitabo (ug makita gyud namo kini sa dili madugay) kay nasayod kami nga anaa na kini sa katapusan; makita namo ang usa ka gamhanang butang nga motungha dihadiha dayon, o kaha makita namo ang Pag-abot sa Ginoo.

³⁶⁴ Natuman na ang tanang propesiya. Ang ulahing butang sa wala pa gibanhaw ang Iglesia, sa wala pa Siya gisagaw diha sa Pinadayag sa ika-3 nga kapitulo, mao ang pag-abot sa usa ka mensahero sa Kapanahonan sa Iglesiang Laodicea, nga “mopasig-uli sa mga kasingkasing sa mga tawo balik ngadto sa unang mga amahan,” ipabalik sila ngadto sa matuod nga Pentecostes, sa kung unsay aduna sila kaniadto. Makalibo ka mga linibo, sama sa adlaw ni Noe kaniadto, Ginoo, ang mangalaglag. Daghan kanila ang mangalaglag. Nakita namo nga nangatuman na kana, Amahan.

³⁶⁵ Anhi na, Ginoong Jesus, sakgawa ang Imong Iglesia. Ug kung itugot Mo man, Ginoo, nga sa dili pa pagasakgawon ang Iglesia, hinaut nga adunay Gahum nga motungha. Oh Dios, pun-a kini nga mga sudlanan. Bangona sila, Ginoo! Tay-oga sa makausa pa kining kalibutan! Nasayod kami nga mamahitabo kini, nga wala na unya’y mga paghinulsol, mamahimong ulahi na para kanila nianang tungora. Apan ipakita ang Imong Gahum, Ginoo, pun-a kana nga mga sudlanan ug tay-oga kining kalibutan sa ingon nga wala pa gyud kini natay-og sukad-sukad! Kuhaa na ang Imong Iglesia nianang tungora. Biyaan na ang kalibutan sa kagubot nga nahimutangan niini, Oh Dios, nagapakigbisog gyud sila.

³⁶⁶ Dayon mahibaloan namo nga ang halangdong Balaang Espiritu moadto na ngadto sa mga Judeo nianang panahona. Pagmakita na namo ang usa ka gatus ug kap-ata’g upat ka libo nga nanagtindog didto sa Bukid sa Sinai, nanagtindog nga kauban ang Cordero, samtang atua na sa Langit ang Pangasaw-onon. Gikuha na Siya paitaas, ug mibalik na ang Cordero (si Joseph) aron nga igapaila ang Iyang Kaugalingon ngadto sa Iyang kabanay. Ug miingon ang Biblia nga magkaaduna og pagbalata sa taliwala nila pagmotan-aw sila ug makita Siya nga nagatindog didto. Sa diha nga igapaila na Niya ang Iyang Kaugalingon, moingon sila, “Diin Mo man nakuha kana nga mga ulat?”

Miingon Siya, “Sa balay sa Akong mga higala.”

Dayon moingon sila, “Siya mao Kadtong atong gilansang sa krus.”

³⁶⁷ Ug moingon Siya sama sa giingon ni Joseph, “Ayaw kamo kabalaka, tungod kay gibuhat kini sa Dios aron luwason ang kinabuhi sa mga Gentil. Dili kini inyong sayup.” Dayon miingon sila nga ihimulag nila, ang usa ka pamilya gikan sa usa pa, managbakho sila nga mora’g gikuha ang bugtong anak gikan sa panimalay.

³⁶⁸ Oh Amahan, haduol na kana nga adlaw, mao na kana ang pagkatapus sa Kapitoan ka Semana. Haduol na gyud kaayo kana nga panahon, Ginoo.

³⁶⁹ Oh Dios, hinaut nga magasinggit ang tingog—ang tingog sa tinuod nga mga propeta sa Dios batok niining moderno nga

babaye sa niini nga adlaw, batok niining moderno nga iglesia, sa niining moderno nga teolohiya sa iglesia.

³⁷⁰ Tay-oga kining mga magwawali nga mahadlok mosulti sa Kamatuoran. Oh Dios, kuhaa kini nga mga kalalaken-an ug tay-oga sila ingon nga wala pa gyud sila natay-og sukad-sukad, himoa nga mangaulaw sila sa ilang mga kaugalingon.

³⁷¹ Apan nasayod gyud kami niining usa ka butang, ug mahimo namong bug-os gayud nga saligan, nga, “Walay makahimo sa pag-ari Kanako gawas lamang kon pagadanihon siya sa Amahan. Ug magaduol ang tanan nga gikahatag sa Amahan.” Mangduol sila hangtud sa gilay-on nga Imong gikatagana. Apan Ikaw miingon, “Ayaw’g kahadlok, diyutay’ng panon, sa maayong kabubut-on kini sa inyong Amahan nga igahatag kaninyo ang Ginghamarian.” Nasayod kami nga tinuod Kana. Imo na kaming gipahimangnoan sa sugod pa lang nga aduna ra gyu’y pipila, pipila ra gayud nga mamahimong andam pagmoabot na kana nga panahon. Dayon magkaaduna og usa ka dakung pagkabanhaw, ug ang tanang tinubos nga gitubos sa tanan nga mga kapanahonan mangbangon. Apan sa niining ulahi nga adlaw, sa katapusang panahon, ang Iglesia anaa gayud diha sa minorya.

³⁷² Ug nakita namo kini, Amahan, nakita namo ang Mensahe sa niining panahon. Nakita namo ang pagsalikway Niini, nakita namo ang mga pag-ikyas pahilayo Niini, nakita namo kining mga butanga.

³⁷³ Nakita namo ang Imong mga katawahan nga nagasugid nga mga wala gyud sila . . . nga sila “walay kapuslanan.” Gusto lang nila nga mapuno Kanimo, Ginoo. Karon, ginaampo ko nga Imong pagatay-ogon ang kalibutan pinaagi kanila, pipila ka mga adlaw sa dili pa ang Pag-abot sa Ginoo.

³⁷⁴ Karon sa among taliwala adunay mga balatian, adunay mga tawo nga nagkinahanglan og pisikal nga kaayohan. Dili namo sila mapasagdan, Ginoo, kay ginaingon man, “Ayaw hikalimti ang tanan Niyang mga kaayohan: nga Mao ang nagapasaylo sa tanan mong kasal-anan; ug Siya mao ang nagaayo sa tanan nato nga mga balatian.” Ginaampo namo nga ang Iyang dakung gahum sa pagpang-ayo maanaa sa matag usa nga ania dinhi. Kung mahimo Mo man luwason ang usa ka kalag dinha nga walay ginabuhat, miliso lang ang iyang kasingkasing nganha Kanimo, unsa ka labaw pa nga mahimo Mong ayohon ang usa ka lawas!

³⁷⁵ Ania ang mga panyo nga nakapahimutang dinhi. Ginapalanginan ko ang mga niini sa Ngalan ni Ginoong Jesus, sama sa gibuhat sa bantugang si Apostol Pablo. Hinaut nga ang kinsa man nga mogamit niini nga mga panyo mamaayo. Hinaut nga ang mga nabungkag nga panimalay mahiusa pag-usab. Hinaut nga ang mga gagmay’ng bata, nga walay amahan,

walay inahan, nga tungod kay nagkabulag, hinaut nga mahiusa kana nga panimalay pag-usab. Itugot kini, Ginoo. Ayoha ang tanang masakiton karon, ug ang mga nanag-antus, angkona ang himaya alang sa Imong Kaugalingon.

³⁷⁶ Ug, Ginoo, kami nga nagapaningkamot nga padayong masentro paitaas ang among mga sudlanan, masentro paitaas ang among mga mata, masentro paitaas ang among mga kasingkasing diha Kanimo, ginalimod nga kauban kami niining kalibutana. Miingon ang Biblia nga “Migawas si Abraham gikan sa iyang panimalay, ug migawas gikan sa iyang lungsod, aron mopuyo sa yutang saad, ginapahayag nga siya’y ‘dili taga-dinhi niining kalibutana’ kondili siya mao’y ‘usa ka magpapanaw ug usa ka lumalangyaw.’” Si Abraham, ug si Isaac ug si Jacob, ang tanan nga nagkaaduna niini nga testimonyo nga sila’y “dili taga-dinhi niining kalibutana,” ginapahayag lamang nila nga adunay usa ka Lungsod Kinsang Magtutukod ug Magbubuhat mao ang Dios, ug nagapadulong na sila ngadto nianang dapita.

³⁷⁷ Hinaut nga mabag-o ang mga kasingkasing karon mismo samtang nagaampo ako, Amahan, ug hinaut nga mangawagtang na ang dili-maayo nga mga kinaiya. Ug sa pag-abot sa pangbautismo nga panerbisyo, hinaut nga adunay bug-os nga kadasig sa taliwala sa mga tawo, hinaut nga ang mga tawo nga wala pa nakahunahuna niini kaniadto, hinaut nga mapadayag na kini. Ug miingon Ikaw nga ang tanan nga Imong gipanagtawag, Imong—Imong sugoon.

³⁷⁸ Karon, ginatugyan ko kining tanan nganha Kanimo, Ginoo, pinaagi niining diyutay’ng putol-putol nga mensahe gikan sa usa ka kabus sudlanan nga wala gyu’y sulod, Ginoo. Nagaampo ako nga Imong kuhaon kana nga mga Pulong ug tunawon kini sulod sa mga kasingkasing sa mga tawo, ug hinaut nga dili na sila mopahilayo Niini. Itugot kini, Ginoo. Ginatugyan ko kini diha Kanimo karon, sa Ngalan ni Jesus Cristo. Amen.

³⁷⁹ [Usa ka igsoong lalaki ang nagahatag og mensahe—Ed.] Samtang nagahimo kamo sa inyong desisyon, pagdesisyon gyud mo. “Nganong nagaduhaduha man mo tali sa duha ka hunahuna?” Nadungog na ninyo ang Iyang gisulti. Kung Dios ang Dios, alagari ninyo Siya; kung ang kalibutan mao’y dios, pagpadayon lang mo. Kita n’yo? Kung husto ang denominasyonhong paagi, pagpadayon mo niini; apan kung husto ang Biblia, kung ingon-ana dumuol kamo Niini. Kita n’yo? Magpili kamo niining orasa kung kinsa ang inyong alagaron.

³⁸⁰ Kita, diha sa Espiritu, mag-awit kita og usa ka himno karon. Ang Biblia miingon, “Nag-awit sila og usa ka alawiton ug nangadto na.” Awiton nato kining bantugang karaan nga alawiton, *I Love Him*, samtang nagaduko ang atong ulo ug mga kasingkasing ngadto Kaniya.

I love Him,

Karon pagdesisyon na mo kung unsay pagabuhaton ninyo.

I love Him
Because He first loved me
And purchased my salvation
On Calvary's tree.

³⁸¹ [Ginasugdan paglaylay ni Igsoong Branham ang *I Love Him*—Ed.] Mahimo na ba ninyong magdesisyon alang kang Cristo? Dili usa ka desisyon, nga basta na lang, kondili manghabwa gayud sa inyong kaugalingon, “Ginoo, walay maayo kanako. Wala gyu’y bisan unsa nga maayo kanako. Itugot kanako nga mahikalimtan ang tanan kong nahibaloan. Karon umari Ka, Ginoong Jesus, ayaw tugoti nga molabay ra kini sa akong ulo. Itugot kanako nga madawat Kini ug mapuno sa Imong Espiritu, Ginoo. Sugod karong adlaw, itugot nga mamahimo akong bug-os nga Imoha.” Mag-ampo lamang karon, usa ka diyutay’ng pag-ampo ngadto sa Dios; yano, nga pag-ampo, mga anak, ug tanan.

Thou Lamb of Calvary
Saviour divine; (paghinulsol lang diha sa
inyong kasingkasing)
. . . hear me while I pray,
Take all my sins away,
O let me from this day
Be wholly Thine!

While life's dark maze I tread,
And griefs around me spread,
Be Thou my Guide;
Bid darkness turn to day,
Wipe sorrow, fears away,
Nor let me ever stray
From Thee aside.

³⁸² [Ginasugdan paglaylay ni Igsoong Branham ang *My Faith Looks Up To Thee*—Ed.] Kamong mga nanagpanoo, nga nanghabwa na sa inyong mga kaugalingon sa atubangan sa Dios, ug determinado nga wala na’y bisan unsa nga makababag pa kaninyo, nga dili na mo magapahayag og unsa man nga abilidad, ug gusto ninyong himoon kini nga klaro, tinuod ug tin-aw gayud diha sa Dios, aduna na’y tubig sa bautismohan, kadtong andam na alang sa pagbautismo. Mangadto ang mga kababayenan sa akong tuo, ug ang mga kalalaken-an pud sa akong wala. Pagasugdan na ang pangbautismo nga panerbisyo sa dili madugay. Kamo nga mga wala na’y sulod, kamo nga andam na nga dili toohan ang kung unsa’y ginaingon sa mga ministro, unsa’y ginaingon sa mga eklesiastikal, unsa’y ginaingon sa mga denominasyon, ug magalakaw lamang sa dalan sa Ginoo, ug motoo sa MAO KINI ANG GIINGON SA GINOO, dumuol na kamo.

While life's dark maze I tread,

Dinhi dapit ang mga kababayen-an, ang mga kalalaken-an pud *dinhi* dapit. Mao na kana ang inyong pagtawag sa altar, “Ang tanan nga nanagpanoo, nangduol ug gibautismohan.”

. . . my Guide;
Bid darkness turn to day,
Wipe sorrow's tears away,
Nor let me ever stray
From Thee aside.

³⁸³ Pila man sa mga kababayen-an ang ania dinhi karong buntaga. . . Ginasulti ko kini sa Ngalan ni Ginoong Jesus! Pila man kaninyo ang naulaw sa nianang mugbo ninyo nga buhok, nga gustong pataason kini sa Dios (pinaagi sa Iyang grasya) alang kaninyo? Panalanginan kamo sa Dios.

³⁸⁴ Pila man sa mga kalalaken-an dinhi ang naulaw nga gipahanugotan lang ninyo ang inyong asawa nga manigarilyo, ug magsul-ob og karsones nga para lang unta kaninyo?

³⁸⁵ Ug miingon ang Biblia, “Usa kini ka dulumtanan sa atubangan sa Dios.” Kahibalo ba mo nga dili mahimong mausab ang Dios? Dili Siya mahimong mausab. Aduna Siya’y usa lang ka kinaiyahan, kana mao ang pagkabalaan. Dili Siya mahimong mausab. Kung dili kamo mamahimong sama Kaniya, dili gyud ninyo Siya makita, “Kung wala ang pagkabalaan walay bisan kinsa nga makakita sa Ginoo.” Ug kung ang pagsul-ob og karsones mao’y. . . mahimong makapaluod sa Dios ug makapasuka, kasukaon Siya, ug *dulumtanan* gayud, “kahugawan,” unsaon man ninyo. . . sa pagpakaaduna og ingon niana nga espiritu sa sulod ninyo ug makaadto sa Langit? Unsaon man ninyo sa pag-adto sa Langit nga adunay mubo nga buhok, sa dihang miingon man ang Dios “Makauulaw kini alang sa usa ka babaye nga putlan ang iyang buhok”? Ginasalikway sa maong babaye ang mismong sukaranan sa usa—usa ka asawa. Wala nagausbang ang Dios. Mao kana ang Iyang Pulong, higala, mas maayo pa og maminaw ka.

³⁸⁶ Ug kamong mga kalalaken-an nga gipahanugotan ang inyong mga asawa nga buhaton kana, wala ba kamo naulaw sa inyong kaugalingon? Wala ba kamo naulaw?

³⁸⁷ Ayaw kamo magmahimong sama sa Unang Ginang sa nasud. Magmahimong sama sa Dios! Kita n’yo? Habwa-a na ninyo sa inyong kaugalingon ang modernong mga urog sa kalibutan, aron mahimong mabubo ni Cristo ang Iyang Kaugalingon diha kaninyo ug mapuno gayud kamo sa Balaang Espiritu.

³⁸⁸ Dili Niya mamahimo kana, dili Niya mamahimo kini, kini—batok kini sa Iyang mga prinsipyo; gikinahanglan Niya una nga supakon ang Iyang Pulong, ug dili Niya gayud kana buhaton; dili Niya kana buhaton hangtud nga—nga dili ka mosunod sa Iyang Pulong. Kinahanglan mo nga moabot. . . Kinahanglan natong makadangat ngadto Niini sa wala pa’y buhaton og bisan unsa.

Kahibalo mo niana, ang matag usa kaninyo nakahibalo niana. Pila ba kaninyo ang nagatoo niana, ipataas ang inyong kamot. Oo, nagatoo kamo niini, karon magbuhat kita og usa ka butang mahitungod niini.

³⁸⁹ Ang Dios, magmaluloy-on kanato! Daw sa unsa gayud nato Siya gikinahanglan! Ania kita, magkauban kitang tanan karon. Hinumdumi ninyo, sa Paghukom, kung ako . . . kinahanglan kong mobarug (ug tingali'g mamahimo kana sa dili pa mogabii) ug atubangon ang matag Pulong nga akong gisulti. Kita n'yo, kinahanglan ko kining atubangon. Karon, hinumdumi ninyo nga ang kasal-anan wala na sa akong mga kamot, wala na sa akong konsensiya, wala na sa akong kalag, wala na sa Dios.

³⁹⁰ Kung dili kamo . . . Kung anaa kamo sa ingon niana nga mga kahimtang ug sa gihapon dili mo mabati ang pagkondena (whew!), unsa—unsa—unsa'y buhaton ninyo? Kung ingon-ana masayran ninyo nga wala na nagapakighilambigit ang Dios diha kaninyo, mahibaloan ninyo nga nalaktawan n'yo Kana. Kita n'yo? Nalaktawan n'yo Kana. Mahimong relihiyoso kaayo kamo, mahimong miyembro kamo sa mga iglesia ug uban pa, apan nalaktawan gyud ninyo Kana. Nagasulod ang Pulong sa Dios ug ginapaduol ang usa ka tawo. Mao kana ang butang nga nagapabalik kanila. Kita n'yo? Busa ingon niana ang Pulong. Pangutan-on ko ang si kinsa man nga ministro, kinsa man nga tawo, sa bisan asa, kon masalikway ba nila Kana batok sa Pulong sa Dios. Husto kana. Dili gayud, kita n'yo.

³⁹¹ Busa magmahimo kitang matinud-anon nga mga Cristohanon. Bisan kita nga nagapaningkamot, ang uban nga nagapaningkamot, kinahanglan gyud natong magutad-gutad ug mapabukalan. Oo, sir, nagkinahanglan kitang tanan niana.

³⁹² Dios, maluoy Ka kanako. Dios, kuhaa ako ug hulmaha ako. Ako kining tinguha, human niining semanaha, nga moadto atubangan sa Dios, aron hibaloon kung unsa ang sunod nga pagabuhaton. Dios, kuhaa ako. Ang . . . Tanan—tanan kanako (ug pagkadaghan pa niini) nga walay kapuslanan, Dios, putla kini, mao'y akong pag-ampo karong buntaga. Sirkunsisyonaha ang akong kasingkasing, mga dalunggan, ang akong pagkatawo. Himoa ako, Ginoo, himoa ako nga mamahimong usa ka . . . unsa man ang gusto Niya nga mamahimo ako. Mao kana'y akong pag-ampo.

³⁹³ Unsa pa man ang kinahanglan aron mahulma ako, putlon, putla ako, Ginoo. Ipakita kanako diha sa Pulong, sultihi ako, buhaton ko kini. Tugoti ang Ginoo nga isulti kini, ug akong . . . maanaa ako dayon nga andam nga mosunod niini. Bisan unsa man ang isulti sa Pulong sa Dios, ingon niana ang gusto kong mamahimo ako. Gusto kong mamahimong usa ka—usa ka Cristohanon sa Pulong sa Dios, “Pasagdi nga bakak ang pulong sa tawo, ug ang sa Dios mao'y tinuod.” Dili ba ingon niana man

unta ang lakaw sa panahon, dili ba ingon niana man? Sa ingon niana unta ninyo kini pagatoohan?

³⁹⁴ Nagapangita ka ba sa lugar sa bautismohan, dong? Oo, dinhi dapit, igsoon, ayaw na paghulat. Sige, dinhi dapita mismo.

³⁹⁵ Daghan kaninyo ang kinahanglan nga moanhi, mga kalalaken-an ug kababayen-an nga mga magtotoo, nga... nagasugid sa ilang mga sala, aron mabaustismohan sa Ngalan ni Jesus Cristo. (Dinhi dapit, igsoon.) “Sa Ngalan ni Jesus Cristo alang sa kapasayloan sa ilang mga sala, ug mapuno sila sa Espiritu Santo.”

³⁹⁶ Karon, kaninyo nga mga Katoliko nga ania dinhi, ingon niana ang pagpasaylo sa sala. Ginaingon ninyo nga adunay gahum ang iglesia sa pagpasaylo og mga sala, giunsa man sa iglesia sa pagpasaylo og mga sala? Ang Dios... Miingon si Jesus sa iglesia, “Kinsa ganing mga sala ang inyong pasayloon, kini pagapasayloon kanila. Kinsa ganing mga sala ang inyong pahawiran, kini pagahawiran kanila.” Giunsa man nila sa pagpasaylo kaniadto, ang mga sala sa unang iglesia? Gipangtawag nila sila paingon sa paghinulsol, ug gibautismohan nila sila sa Ngalan ni Jesus Cristo alang sa kapasayloan sa ilang mga sala. Dili sulod sa dapit-kumpisalan; dili, gayud. Kondili nanaghinulsol sila sa atubangan sa Dios, sa ilang mga kasingkasing sa dihang nagapanindog sila didto, ug nanagpanoo sila. “Ug ang tanan nga gibau-... nga nanagpanoo gibautismohan sa Ngalan ni Jesus Cristo, ug napuno sila sa Espiritu Santo.” Amen. Gihigugma ba ninyo Siya?

Karon manindog kita.

³⁹⁷ Karon, adunay daghang gusto nga mohulat alang sa pangbautismo nga panerbisyo. Aduna pa ba’y gusto nga moduol, aduna pa ba’y gusto nga motoo? Dumuol kamo, niining duha ka dapit; ang mga kalalaken-an sa wala; sa tuo, ang mga kababayen-an. Toohi ninyo si Ginoong Jesus sa tibuok ninyong kasingkasing, uban sa tanan-tanan nga anaa kaninyo.

³⁹⁸ Karon magkauban natong iduko ang atong mga ulo, samtang dungan natong ginasulti kining sumbanan nga pag-ampo, tungod nga nabati ko nga daw sa ginapangunahan ako nga buhaton kini karon mismo. Samtang ginaduko nato ang atong mga ulo, mag-ampo kamo uban kanako. [Dungan nga nagaampo si Igsoong Branham ug ang kongregasyon—Ed.]

... Amahan namo Nga anaa sa langit, Pagabalaanon ang imong ngalan.


Umanhi ang imong gingharian. Pagabuhaton ang Imong kabubut-on dinhi sa yuta, maingon sa langit.

Hatagi kami karon sa pagkaon namo sa matag adlaw.

Ug pasayloa kami sa among mga sala, maingon nga nagapasaylo kami sa mga nakasala kanamo.

Ug ayaw kami itugyan sa mga panulay, kondili luwasa kami sa kadautan: Kay imo ang gingharian, ug ang gahum, ug ang himaya, hangtud sa kahangturan. Amen.

³⁹⁹ Karon padayon natong iduko ang atong mga ulo. Ug hangyoon ko si Igsoong Neville nga moanhi ug magpanalangin, isulti ang kung unsa'y anaa sa iyang kasingkasing, ug dayon ipahibalo ang mahitungod sa pangbautismo nga panerbisyo nga ginaandam na karon.

⁴⁰⁰ Panalanginan kamo sa Dios, mao'y akong pag-ampo. Iampo ko kamo, iampo ninyo ako. Kinahanglan ko gayud ang inyong mga pag-ampo. 

HINGPIT NGA GAHUM PINAAGI SA HINGPIT NGA KALUYA CEB61-1119
(Perfect Strength By Perfect Weakness)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Nobyembre 19, 1961, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org